

Matyu

ndê ñawaê ñayham

Yom whê ñawaê ñayham dindec sa-ñga

Matyu in Yisu ndê ñgacsêñomi 12 si dan, ma in ndê ñaê dan bu Liwai (Mak 2:14). Têñ ñamata-ñga in kôm gwelen whiñ gavman Rom-ñga ma kôc mone takis-ñga yêc lau Israel-ñga. Ma tiñambu Yisu kêgalêm in sa ti ndê ñgacsêñom dan.

Matyu in ñgac Israel-ñga, ma in to ñawaê ñayham dindec gic in dau ndê lau Israel-ñga ñawaê. In to tu bu whê sa bu Mesaya nañ Anötö gic bata bu êñkin têñ lau Israel-ñga, nañ Yisu dau. Matyu kôc yom daêsam yêc lau Israel si buku dabuñ (nañ dasam bu Yom Lêñsêm Akwa) bu puc yom nañ in to pi Yisu, nañ dôñ, ma bu tôc asê bu yom hoñ nañ propet akwa-kwa sêto pi Mesaya dau, nañ ñandô sa pi Yisu. Ma Matyu to yom daêsam pi yom nañ Yisu sôm ma kêdôhôn têñ lau, ma pi gêñ nañ in kôm.

Ñawaê ñayham dindec gic waê lau Israel-ñga tawasê dom, magoc gic waê lau nom-ñga hoñ. Nahu bu Matyu to yom daêsam pi †Anötö ndê gôlin (kingdom), ma whê sa bu Anötö tac whiñ bu lau hoñ sêsôc in ndê gôlin ñapu, ma sêti in ndê balêkoc. Tôm yom nañ Yisu sôm têñ lau Israel-ñga, ma Matyu to yêc 4:17, nañ yêc bocdec bu: Anötö ndê gôlin meñ kêpiñ su. Bocdinañ anem daôm kwi ma ahu mêtê sac siñ.

*Yisu ndê apai ñadênaŋ
(Luk 3:22-38)*

¹ Yisu †Kilisi ndê apai si ñadênaŋ dindec. Inj sa akêŋ Dawid ndê, ma Dawid sa akêŋ Abraham ndê.

² Abraham ndê atu inj Aisak. Ma Aisak ndê atu inj Jakob. Jakob ndê atui †Juda ti inj ndê asidôwai.

³ Juda gêm Tama ma injlu sêkwê balê lu asê, naŋ Peres lu Sera. Peres ndê atu inj Hesron, ma Hesron ndê atu inj Ram.

⁴ Ram ndê atu inj Aminadab. Aminadab ndê atu inj Nason, ma Nason ndê atu inj Salmon.

⁵ Salmon gêm Rahab, ma injlu sêkwê Boas asê. Boas gêm Rut, ma injlu sêkwê Obed asê. Ma Obed inj Jessi damba.

⁶ Ma Jessi ndê atu inj Kiŋ Dawid.

Dawid gêm Betsiba, naŋ munŋga ti Uria ndê awê, ma Dawid lu Betsiba sêkwê Solomon asê.

⁷ Solomon ndê atu inj Rehoboam. Ma Rehoboam ndê atu inj Abaisa. Abaisa ndê atu inj Asa.

⁸ Asa ndê atu Yehosapat, ma Yehosapat ndê atu inj Yehoram. Yehoram ndê atu inj Usiah.

⁹ Usiah ndê atu Yotam, ma Yotam ndê atu Ahas. Ahas ndê atu inj Hesekeya.

¹⁰ Hesekeya ndê atu inj Manase, ma Manase ndê atu Amon. Amon ndê atu inj Josaya.

¹¹ Ma Josaya ndê atui, naŋ Yekonaya ti ndê asii. Têŋ Josaya ndê têm lau Babilon-ŋga sêŋgaho lau †Israelŋga su, ma sêkôc ñac sa si sêndôc gameŋ apa Babilon-ŋga gitôm lau gapocwalô-ŋga.

¹² Têŋ ndoc lau Israel-ŋga sêmbo gameŋ Babilon-ŋga, naŋ Yekonaya kwê Sealtial asê. Tiŋambu lau Israelŋga sêmbu akêŋ gameŋ Babilon-ŋga sêmeŋ, ma Sealtial kwê Serubabel asê.

13 Serubabel ndê atu inɿ Abiud, ma Abiud ndê atu Eliakim. Eliakim ndê atu inɿ Aso.

14 Ma Aso ndê atu Sadok. Sadok ndê atu inɿ Akim, ma Akim ndê atu inɿ Eliud.

15 Eliud ndê atu inɿ Eleasa, ma Eleasa ndê atu Matan. Matan ndê atu inɿ Jakob,

16 ma Jakob ndê atu inɿ Josep. Josep gêm Maria naɿ kôc Yisu, ɿgac naɿ sêsam bu Kilisi.

17 Bocdinaɿ, têtɿ Abraham ndê têtɿ ma meɿ têtɿ Kiɿ Dawid ndê têtɿ, Yisu ndê apaɿgaci 14 sêmbo. Ma têtɿ Dawid ndê têtɿ ma meɿ têtɿ ndoc lau Israel-ɿga sêndöc Babilon, naɿ inɿ ndê apaɿ 14 tiyham sêmbo. Ma têtɿ ndoc lau Israel-ɿga sêndöc Babilon, e meɿ têtɿ ndoc Maria kôc Kilisi, naɿ apaɿ 14 tiyham sêmbo.

Yisu ndê dinda kôc inɿ

18 Yisu Kilisi dinda kôc inɿ ɿnamiɿ dau dec. ɿac sêhê inɿ dinda Maria têtɿ Josep su, magoc inɿlu sêmbo sêwhiɿ dau dom, ma sêlic bu Maria daê. Inɿ daê akêtɿ ɿalau Dabuɿ ndê.

19 Josep, naɿ sêmasaɿ yom bu nem Maria, naɿ ɿgac gitêtɿ, ma bu kôm inɿ maya sa dom, dec gauc gêm bu hu inɿ siɿ gelec.

20 Inɿ kôc gauc dinaɿ su, goc Pômdau ndê aɿela daɿ hoc dau asê têtɿ inɿ ɿa mbê, ma sôm, “Josep, Dawid ndê apaɿgac, töc daôm dom bu kôc Maria sa ti am nem awhê, bu ɿalau Dabuɿ dau kêtɿ balêkoc naɿ mbo inɿ ɿatac ɿalôm.

21 Maria oc kôc balê daɿ, ma am oc sam inɿ ndê ɿaê bu †Yisu, ɿahu bu inɿ oc nem inɿ ndê lau si yêc ɿac si sac ɿagêyô.”

22 Gêñ honj dinañ hóc asê ma bocdinañ Pômdau ndê yom nañ propet Aisaya hoc asê munj su, nañ ñandô sa. Inj hoc yom dau asê bocdec bu:

23 Alic su nañ. Awhê akiñ dañ oc daê e kôc balêkoc ñgac dañ, ma ñac oc sêsam inj ndê ñaê bu Imanuel. *[Ais 7:14]*

(Ñaê ‘Immanuel’ dau ñahu bu ‘Anötö mbo whin yac.’)

24 Têñ ndoc Josep tapo sa, nañ inj kôm gitôm Pômdau ndê añela gic atù inj, ma kôc Maria sa menj mbo inj ndê andu ti inj ndê awhê.

25 Inju sêmbô sêwhin dandi, magoc Josep gic ahê Maria mbo e gitôm inj kôc balêkoc dau su. Ma inj sam inj ndê ñaê bu Yisu.

2

Lau tigauc sêñsalê Yisu

1 Yisu dinda kôc inj yêc malac Betlehem yêc gamen Judia-ñga, têñ têm Kiñ †Herod gêm gôlinj mbo. Tinjambu lau apa ñatô sêhóc asê Jerusalem. Ñac lau tigauc tu sêñyalê tata-ñga, ma sêmenj akêñ gamen ac pi-ñga.

2 Sêhóc asê ma sêndac, “Balêkoc nañ bu ti lau Israel si kiñ, nañ dinda kôc inj yêc nde? Yac alic tata wakuc dañ pô yac mba gamen dec kêñ puc yac bu inj hóc asê su. Ma yac amenj bu atoc inj sa ti apôñ hanjduc têñ inj.”

3 Ñac si yom dinañ kôm Kiñ Herod sö ma gauc gêm yom daêsam. Ma lau Jerusalem-ñga honj bocdinañ.

4 Goc Herod kêgalêm lau Israel si †dabuñsiga atu-tu ti lau nañ sêndôhôn yomsu, nañ sa sêpitigenj, ma

ndac ñac, “Mac nem †Mesaya dinda oc kôc in yêc malac bocke?”

⁵ Ma sêo in ndê yom ma sêsôm, “In dinda oc kôc in yêc malac Betlehem yêc gameñ Judia-nga. Propet akwa dan to yom pi in mun su bocdec bu:

⁶ O malac Betlehem yêc gameñ nan †Juda ndê ton sêwêkain. Malac atu-tu hon nan sêyêc Juda ndê gameñ, nan ñadan hóc gêlêc am su dom, ñahu bu gôlinwaga nan oc sa yêc am, nan oc ti ñgac atu tu yob aneñ lau Israel-nga.” [Mai 5:2]

⁷ Herod ñgô yom hon dinañ su, ma kên ñac sêsa si. Goc in gic lau tigauc dinañ sa tiyham gelec, ma kip yom sa yêc ñac, bu bêc bocke tata dau meñ hóc asê ma ñac sêlic. Ñac sic min yom hon têt in su,

⁸ ma in kêkin ñac bu sêtêt malac Betlehem sêndi, ma sôm têt ñac, “Andi anşalê balêkoc dau, ma têt ndoc mac atap in sa, nan goc ambu amen akên ñawaê têt aô bu aô dauñ waloc, ma watoc in sa.”

⁹ Lau dinañ sêngô Herod ndê yom su, ma sêsa si. Ma tata nan sêlic su yêc ñac si gameñ ac pi-nga, nan wê ñac gi e kalhac andu nan balêkoc yêc, nan ñahô solop.

¹⁰ Ñac sêlic tata dau dec kôm ñac atac ñayham atu.

¹¹ Sêsôc andu dau si, ma sêlic balêkoc lu dinda Maria. Ma sêpôn haduc têt balêkoc dau ma sêtoc in sa. Goc ñac sêkac si talhi sa, ma sêkêt si awalaun nan ñaôli atu-tu têt in kain gitôm gol, ma a ñakwi ñamalu ti gêt ñamalu ñayham.

¹² Têt ndoc dinañ Anôtô kên puc ñac ña mbê bu sêmbu sêtêt Herod sêndi dom. Bocdinañ sêlhô sêsa sen dan dau-nga dan, ma sêmbu sêtêt ñac si gameñ si.

Josep lu Maria ma Yisu sêsip Isip si

¹³ Têñ têm lau tigauc dinañ sêhu ñac siñ su, Pômdau ndê añela dañ suñ mbê têt Josep ma sôm, “Herod kêsâlê balê dau bu ndic iñ ndu. Bocdinañ tisa, ma kôc balê lu dinda sa ma asip Isip andi. Ambo dinañ e tôm aô wakêt puc mac.”

¹⁴ Josep ñgô añela ndê yom su, goc tisa têt ôbwêc dinañ ma kôc balê lu dinda sa, ma sêsip Isip si.

¹⁵ Ma ñac sêmbo gameñ dinañ, e Herod mbac ndu su. Ma ñalêt dau dinañ dec Pômdau ndê yom nañ propet dañ hoc asê muñ su, nañ ñandô sa. Yom dau bocdec bu:

Aô kagalêm aneñ atungac sa akêt gameñ Isip-nga meñ. *[Hos 11:1]*

Herod gic balêkoc dedec ndu

¹⁶ Têt ndoc Josep kôc Maria lu Yisu sa sêsip Isip si, nañ Herod hêt lau tigauc bu sêkêt ñawaê têt iñ pi balê dau. Magoc ñac sêmeñ dom, dec iñ kêyalê bu ñac sêñsau iñ, ma iñ tac ñandê atu. Goc kêkiñ iñ ndê lau siñ-nga sêtêt Betlehem si, ma sic balêkoc ñgac dedec hoñ ndu yêc malac Betlehem, ma yêc gameñ ñamakê-nga whiñ. Iñ tap ñawaê sa su yêc lau tigauc, pi bêc nañ tata hôt asê ñac-nga, ma bocdinañ ñac sic balêkoc ñgac dedec e gi tap ñac nañ si yala tilu, nañ hoñ ndu.

¹⁷ Ma tu dinañ-nga yom nañ propet Jeremaya to, nañ ñandô sa. Iñ to yom bocdec bu:

¹⁸ Lau sêtañ dangibo atu yêc malac Rama. * Raket ndê lau wakuc sêtañ ñac si balêkoc nañ siñga

* **2:18:** Rama - malac saun dañ nañ yêc kêpiñ Jerusalem.

su. Ma lau danj sêtom bu sênem malô njac dom.
[Jer 31:15]

Josep kôc Yisu lu dinda sêmbu sêmenj

¹⁹ Tinjambu Herod mbac ndu, ma yêc Isip, Pômdau ndê anjela hoc dau asê têtj Josep nj mbê,

²⁰ ma sôm têtj inj, “Tisa ma kôc balê lu dinda sa, ma ambu atêtj gamenj Israel-njga andi. Lau nanj sêkôm bu sêndic balê dau ndu, nanj honj sêmbac ndu su.”

²¹ Goc Josep tisa, kôc balê lu dinda sa, ma njac sêmbu sêtêtj Israel si.

²² Tigenj Josep ngô bu Akelaus gêm gôlinj gamenj Judia-njga ô damba Herod su, dec tötôc dau bu mbu têtj gamenj Judia-njga ndi. Ma Pômdau kêtj puc inj nj mbê bu têtj gamenj Galili-njga ndi.

²³ Goc njac sêtêtj Galili si, ma sêndöc malac danj njâ Nasaret. Ma bocdina nj yom nanj propet akwa-kwa sêto munj su, nanj njandô sa pi Yisu. Njac sêto yom yêc bocdec bu, “Lau oc sêsam inj bu njac Nasaret-njga.”

3

Jon, Njac Kêku Lau-njga kêmasanj Yisu ndê senj
(Mak 1:2-8; Luk 3:2-17)

¹ Tinjambu Jon, Njac Kêku Lau-njga hôt asê gamenj Judia-njga, ma gêm mêtê mbo gamenj sawa.

² Inj sôm têtj lau, “Anötö ndê gôlinj menj kêpinj su. Bocdina nj anem daôm kwi ma ahu mêtê sac sinj.”

³ Gêtj dau kêkuc yom nanj propet Aisaya hoc asê munj su bocdec bu:

Ŋamalac daŋ ta yom mbo gameŋ sawa, bocdec bu, ‘Amasaŋ Pômdau ndê seŋ tisolop. Amasaŋ nem ŋalôm bu akôc iŋ sa.’ [Ais 40:3]

⁴ Jon sôc ŋakwê naŋ sêmasaŋ ŋa kamel ŋamlicihu, ma kic piŋkap yêc iŋ ŋampêbalê. Ma iŋ gêŋ gêŋ bambaliŋ gitôm wakô ma lêp.

⁵ Lau daêsam sêsa sêtêŋ Jon si. Ŋac lau akêŋ malac atu Jerusalem ma malac hoŋ yêc gameŋ Judia-ŋga, ma lau naŋ sêndôc Bu Jordan ŋamakê.

⁶ Ŋac sêhoc si sac asê têŋ Jon, ma iŋ kêku ŋac yêc Bu Jordan.

⁷ Ma lau †Palêsai ti lau †Sadiusi daêsam sêsa sêtêŋ gameŋ naŋ Jon kêku lau mbo, naŋ si. Têŋ ndoc Jon gêlic ŋac iŋ sôm ŋac bocdec bu, “Mac mboc ŋatui mac! Tu sake-ŋga mac alhõ amen? Mac akôc gauc pi Anötö ndê tac ŋandê naŋ lau propet sêkêŋ puc yac bu oc meŋ sa, dec gauc gêm bu amen ma aliŋ sanŋu ŋambwa, a?

⁸ Anŋô! Akôm mêtê ŋayham naŋ tôc asê bu mac am daôm kwi yomandô.

⁹ Ma asôm têŋ daôm dom bu, ‘Abraham apai yac, ma tu dinaŋ-ŋga Anötö oc kôc yac sa.’ Aô wasôm têŋ mac bu Anötö gitôm bu nem hoc hoŋ dindéc kwi sêti Abraham ndê atui sêô mac.

¹⁰ A hoŋ naŋ sem ŋandô ŋayham dom, naŋ kwahic dec Anötö kêŋ ki ŋamata têŋ ŋawakac, ma iŋ oc lêŋ su ma tuc pi ya ndi.

¹¹ “Aô wasôm têŋ mac hoŋ bu ŋgac daŋ oc meŋ êŋkuc aô, naŋ ndê ŋaclai hôc gêlêc aneŋ su. Aô ŋgac ŋambwa, gitôm dom bu wati iŋ ndê ŋgac akiŋ tu waken iŋ ndê atapa-ŋga. Aô dec kaku mac ŋa bu ŋambwa, naŋ tôc asê bu mac am daôm kwi su. Tigeŋ iŋ ŋgac dau oc êŋku mac ŋa Ŋalau Dabuŋ ti ya.

¹² Inj meņ bu êņsahê lau, gitôm ηgac naņ whê wit ηandô ti ηapa kôc, goc gic ηandô sa sôc andu gêņ ηandô-ηga gi, ma tuc ηapa sip ya naņ sa ηapaņ, naņ gi.”

Jon kêku Yisu

(Mak 1:9-11; Luk 3:21-22; Jon 1:32-34)

¹³ Têņ dinaņ Yisu meņ akêņ gameņ Galili-ηga ma hóc asê Jon yêc Bu Jordan. Inj tac whiņ bu Jon êņku inj.

¹⁴ Magoc Jon gic yao dau têņ inj ma sôm, “Am bu êmku aö, oc ηayham. Bocke dec am sôm bu aö waņku am?”

¹⁵ Tigeņ Yisu ô Jon ndê yom ma sôm, “Am tec dom. Kwahic dec am êmku aö, bu taņkuc lêņ solop naņ Anötö kêmasaņ gwanaņ su.” Yisu sôm su ma Jon gôlôc bu êņku inj.

¹⁶ Yisu gêliņ sanġu su ma pi akêņ bu meņ. Ma undambê kac sa, ma inj gêlic Anötö ndê Nalau sip meņ gitôm balusi ma sac inj ηahô.

¹⁷ Ma awha daņ sa akêņ undambê, naņ sôm bu, “Aö Atuņgac atac whiņ-ηga dau dindec. Aö gatisambuc inj ηandô.”

4

Sadaņ kêtôm Yisu

(Mak 1:12-13; Luk 4:1-13)

¹ Tiņambu Nalau Dabuņ wê Yisu sa gameņ sawa gi, bu †Sadaņ êntôm inj.

² Yisu gêņ gêņ daņ dom tôm acsalô 40 ma ôbwêc 40, ma tiņambu gêņ yô inj ηandô.

³ Ma têtj dinan̄j Sadan̄j hôc asê in̄j ma sôm têtj in̄j, “Am Anötö ndê Atu, a? Bocdinan̄j sôm têtj hoc dindec bu sênem dau kwi ti gêtj danen̄-nga.”

⁴ Magoc Yisu ô yom ma sôm, “Mba! Sêto Anötö ndê yom yêc bocdec bu, ‘*Gêtj danen̄-nga ñambwa kêtj lau sêndöc tali dom. Nac dan̄ga wambu yom hon̄ nan̄j Anötö sôm, dec ñac oc sêndöc tali.*’ ”

⁵ Goc Sadan̄j kôc in̄j sa pi malac dabun̄j Jerusalem gi, ma kêtj in̄j kalhac †lôm dabun̄j ñapoc lôlôc.

⁶ Ma sôm têtj in̄j, “Am Anötö ndê Atu, a? Bocdinan̄j pwê sip ndi. Am oc tisac dom, bu sêto yom yêc bocdec bu, ‘*Pômdau oc êñkin̄j ndê an̄jela bu sêyob am, ma sêpê am sa lôlôc bu am tin̄j gahim pi hoc dan̄j dom.*’ ”

⁷ Magoc Yisu sôm têtj in̄j, “Mba! Sêto yom dan̄j tiyham yêc bocdec bu, ‘*Êmsahê Pômdau am nem Anötö dom.*’ ”

⁸ Goc Sadan̄j kôc in̄j sa, ma lu sêpi lôc balin̄j dan̄j si. Ma gameñ hon̄ nan̄j kin̄j nom-nga sem gôlin̄j, ma kin̄j dau si awa ti gêtj ñayham-ñayham hon̄, nan̄j Sadan̄j tôc têtj Yisu.

⁹ Ma sôm, “Am bu pôtj hamduc têtj aö ma nem akin̄j aö, goc wakêtj gêtj hon̄ dec sip am amam.”

¹⁰ Magoc Yisu sôm têtj in̄j, “Mba, Sadan̄j! Am kôc daôm sa ndi! Sêto yom yêc bocdec bu, ‘*Pôtj hamduc têtj Pômdau am nem Anötö, ma nem akin̄j in̄j tawasê.*’ ”

¹¹ Têtj dinan̄j Sadan̄j hu in̄j sin̄j, ma an̄jela sêmeñ ma sem akin̄j in̄j.

Yisu gic hu ndê gwelen̄j

¹² Tin̄jambu †Herod kêtj in̄j ndê lau sin̄j-nga si ma sêkôc Jon dôñ, ma sêkêtj in̄j ndöc gapocwalô. Ma têtj

ndoc Yisu ngô njawaê, goc inj mbu têtj gamej Galili-nga gi.

¹³ Inj gi ndöc malac Nasaret dom, magoc inj gi ndöc Kapenaom, malac nanj yêc kêpij Bugictonj Galili-nga. Munj-nga andô †Jakob ndê atu lu, Sebulun lu Naptali sêwêkaij nom yêc gamej dinaj.

¹⁴ Njalêj dinaj yom nanj propet Aisaya to munj su, nanj njandô sa. Yom dau bocdec bu:

¹⁵⁻¹⁶ Nawê atu danj mej pô lau nanj sêndöc Sebulun lu Naptali si gamej nanj yêc kêpij bugictonj, ma yêc Bu Jordan njamakê. Gamej Galili-nga dinaj sêsam bu lau apa si gamej, ma lau nanj sêndöc dinaj, nanj sêmbo tôm lau nanj njasec atu kôm njac ahuc, ma tôm lau nanj sêmpinj bu sêmbac ndu. Magoc kwahic dec sêlic njawê atu su. *[Ais 9:1-2]*

¹⁷ Têtj ndoc dinaj Yisu gic hu ndê gwelenj nem mêtê lau-nga, ma inj hoc yom asê têtj lau bocdec bu, “Anötö ndê gôlij mej kêpij su. Bocdinaj anem daôm kwi, ma ahu mêtê sac sij.”

Yisu mbwêc lau hale tu sêjkuc inj-nga
(*Mak 1:16-20; Luk 5:1-11; Jon 1:35-42*)

¹⁸ Têtj bêc danj Yisu kêsêlêj mbo Bugictonj Galili-nga njamakê. Ma inj gêlic Saimon nanj ndê njê danj Pita, lu asi Andru. Injlu sêkêj wasanj sêmbo, bu injlu njac sêkôc i-nga lu.

¹⁹ Goc Yisu sôm têtj injlu, “Amlu amenj anjuc aö, ma aö wakêj amlu ahê njamalac sêmenj sêjkuc aö, tôm nanj kwahic dec amlu ahê i.”

²⁰ Ma njagahô injlu sêtec si wasanj yêc, ma sêjkuc inj.

21 Sêñsêlêñ si, ma Yisu gêlic Sebedi ndê atu lu, nan Jems lu Jon. Sêndöc wan sêwhin damba Sebedi, ma sêpô si wasañ kic sêmbo. Yisu mbwêc inlu bu sêmen sêñkuc in,

22 ma ñagahô inlu sêhu damba ti wan sin, ma sêñkuc Yisu.

Yisu gêm lau gêmbac sa

23 Dinan su, goc Yisu kêsêlêñ golom-golom malac yêc gameñ Galili-nga. In kêdôhôn lau mbo ðlôm wê-nga, ma gêm mêtê ñawaê ñayham pi Anötö ndê gôlin. Ma in kôm lau ti gêmbac tidau-tidau hon ñayham sa.

24 Ñawaê pi gêñ dau gêm gameñ Siria-nga hon ahuc, ma tu dinan-nga lau sêkôc ñac si lau gêmbac hon sêtêñ Yisu si, ma in kôm ñac ñayham sa. Lau nan sêhóc ñandê atu, lau ti ñalau sac, lau bôlin, ma lau denñ ti mboloctê, lau ti ñawapac hon dinan in gêm ñac sa.

25 Ma lau daêsam sêsa si ma sêñkuc in. Ñatô sêmen akêñ gameñ Galili-nga, ma ñatô akêñ gameñ Dekapolis-nga.* Ma ñatô sêmen akêñ malac Jerusalem ma malac hon yêc gameñ Judia-nga, ma ñatô sêmen akêñ Bu Jordan ñadanğa.

5

Yisu gêm mêtê mbo lôc

(Luk 6:20-23)

1 Têñ bêc dan Yisu gêlic bu lau daêsam sêñkuc in, goc pi lôc dan gi. In ndöc sic, ma in ndê ðsêñomi sêtigasuc in.

* 4:25: Dekapolis - ñaê dinan danem kwi bu 'malac amanlu.' Malac amanlu dinan sêyêc Bugicton Galili-nga ñagameñ têt ac pi-nga.

- 2 Ma in̄ gic hu kédôhôn̄ ñac ma sôm,
- 3 “Anötö ndê mwasin̄ gic waê lau nan̄ sêngwinin̄ dau yêc in̄ an̄gô-ñga. In̄ gêlic ñayham bu kôc ñac sa sêmbô in̄ ndê gôlin̄ ñapu.
- 4 Anötö ndê mwasin̄ gic waê lau nan̄ sêndöc ti ñalôm ñawapac. In̄ oc kôm ñac si ñalôm timalô.
- 5 Anötö ndê mwasin̄ gic waê lau ti lêng malô ma yom malô. Bu ñac oc sêwêkain̄ gameñ nom-ñga sambob.
- 6 Anötö ndê mwasin̄ gic waê lau nan̄ atac whin̄ ndu andô bu sêsa lêng gitên̄ en̄. In̄ oc nem ñac sa sêti lau gitên̄ ñandô.
- 7 Anötö ndê mwasin̄ gic waê lau nan̄ tawalô lau. In̄ oc tawalô ñac.
- 8 Anötö ndê mwasin̄ gic waê lau ti ñalôm ñawasi. Ñac oc sêlic Anötö.
- 9 Anötö ndê mwasin̄ gic waê lau nan̄ sêñsalê lêng tu sêmbô ti yom malô-ñga. In̄ oc sam ñac bu in̄ dau atui awhê ma ñgac.
- 10 Anötö ndê mwasin̄ gic waê lau nan̄ sêtap kisa sa tu sêsa Anötö ndê lêng gitên̄-ñga. In̄ gêlic ñayham bu kôc ñac sa sêmbô in̄ ndê gôlin̄ ñapu.
- 11 “Tên̄ ndoc lau sêkên̄ kisa mac ma sêpu mac ti sêngôlin̄ yom sac daêsam pi mac tu mac an̄kuc aö-ñga, nan̄ ahêgo daôm dom. Bu Anötö oc êmwasin̄ mac.
- 12 Atac ñayham ma atisambuc, bu Anötö oc kên̄ ñaôli ñayham tên̄ mac yêc undambê. Ma gauc nem bu ñalên̄ tigen̄, lau sêkên̄ kisa Anötö ndê lau propet nan̄ sêmbô mun̄ su.”

Anötö ndê lau sêtôm gwêc so ma sêtôm ñawê

13 Ma Yisu sôm, “Dakêḅ gwêc so sip gêḅ danêḅ-ḅga bu dakôm gêḅ dau ḅayham. Ma mac ambo lau nom-ḅga ḅalôm atôm gwêc so. Tigeḅ gwêc so bu ḅamakic niḅga, oc dakôm ḅamakic sa tiyham ḅalêḅ nde? Iḅ tisac su, ma tambaliḅ siḅ niḅga, ma lau sêkwê dôḅ.

14 “Ma mac ambo nom atôm ḅawê bu pô gameḅ. Malac daḅ bu yêc lôc, oc tôm dom bu siḅ dau kwi.

15 Ma têḅ ndoc datuḅ lam asê, oc taḅgatôc ḅa suc ahuc dom. Taḅkiḅ sa bu ḅawê pô gameḅ hoḅ.

16 Bocdinaḅ, akôm mêtê ḅayham yêc lau hoḅ aḅgô-ḅga, naḅ gitôm mac nem ḅawê bu pô gameḅ. Ma lau oc sêlic mac nem mêtê ḅayham, ma sêmpinḅ Damam undambê-ḅga.”

Yisu sôm yom pi yomsu ma propet si yom

17 “Gauc nem dom bu aô gameḅ tu wasêḅ Anôtô ndê yom naḅ Moses ti lau propet sêto yêc, naḅ su-ḅga. Aô gameḅ tu wasêḅ su-ḅga dom, tigeḅ tu wakôm yom dau ḅandô sa-ḅga.

18 Yomandô, aô wasôm têḅ mac bu undambê ti nom bu niḅga, magoc yom ḅalhô sauḅ daḅ oc niḅga yêc yomsu dom e aô dauḅ wandic dabiḅ gêḅ hoḅ.

19 Asa naḅ kêgîli yomsu naḅ hêganôḅ gêḅ sauḅ andô daḅ, me kêdôhôḅ lau ḅatô bu sêkôm bocdinaḅ, naḅ ti ḅamalac waêmba yêc Anôtô ndê gôliḅ ḅapu. Magoc asa naḅ daḅga wambu Anôtô ndê yomsu, ma kêdôhôḅ lau ḅatô bu sêkôm bocdinaḅ, naḅ ti ḅamalac tiwaê yêc Anôtô ndê gôliḅ ḅapu.

20 Aḅgô! Lau Palêsai ti †kêdôhôḅ-waga yomsu-ḅga sêḅsahê ḅaḅga bu sêti lau gitêḅ, tigeḅ aô wasôm têḅ mac, bu mac bu ati lau gitêḅ ahôc gêlêc ḅac dom,

dec oc tòm dom bu mac ambo Anötö ndê gôlinj ñapu.”

Yomsu dandic ñamalac ndu-nga ñahu

²¹ Ma Yisu sôm têtj ñac, “Mac anyalê yom nañ Anötö kêtj têtj abañi bocdec bu, ‘*Ndic ñamalac ndu dom.*’ Ma ‘Asa nañ bu ndic ñamalac ndu, nañ oc tap ñagêyô sa.’

²² Tigenj kwahic dec aö wasôm têtj mac, bu asa nañ tac ñandê têtj ñamalac ñañ, nañ oc tap ñagêyô sa gitôm inj nañ gic ñamalac ndu. Ma mac nem ñagôlinj ñañ sôm bu lau atu-tu sêmatôc ñamalac nañ sam ndê asidôwa bu ñamalac gauc mbasi-nga. Magoc aö wasôm têtj mac, bu asa nañ sôm yom kainj ñañ, nañ gitôm bu tap ñagêyô lambwam-nga sa.

²³ “Bocñañ têtj ndoc am bu lic om ma bu kêtj nem da têtj Anötö, ma bu gauc nem yom ñañ yêc amlu ñamalac ñañ ñasawa,

²⁴ nañ goc hu nem da sinj yêc alta ñamakê ma sa ndi tap ñamalac ñañ sa. Gêtj ñamata-nga amlu amañ yom nañ yêc amlu ñasawa, goc mbu ndi ma kêtj nem da têtj Anötö.

²⁵ “Ma am nem tôp bu yêc ñamalac ñañ, ma inj bu wê am têtj ñgac êmatôc yom-nga ndi, nañ êmasañ yom têtj inj ñgahô, têtj ndoc amlu anjêlêñ ambo senj. Ma bocñañ ñgac ñañ oc kêtj am têtj ñgac êmatôc yom-nga ñañ. Bu mba, mboe ñgac êmatôc yom-nga oc kêtj am têtj ñgac yob gapocwalô-nga, ma inj êmbalinj am sôc gapoc-walô ndi.

²⁶ Aö wasôm yom ñandô têtj am, am oc ndöc gapocwalô ñañ e am ndic nem tôp hoñ pacndê.”

Yomsu mockainj-nga ñahu

27 “Ma mac aɲyalê yom naɲ Moses to bocdec bu, ‘Kôm gêɲ mockaiɲ-ɲga dom.’

28 Tigeɲ kwahic dec aö wasôm têɲ mac, ɲgac daɲ bu tahê awhê daɲ e ɲalôm ɲagalac, naɲ giôm in kôm mêtê mockaiɲ-ɲga têɲ in su, yêc in ndê ɲalôm.

29 “Am tanôm daɲga bu hê am têɲ sac, goc kip tanôm dinaɲ sa ma êmbaliɲ ɲiɲga. Am tanôm daɲ bu ɲiɲga, naɲ hóc gêlêc am tanôm lu yêc ma hê am bu kôm sac, ma tiɲambu Anötö kêɲ am sip ya lambwam-ɲga ti ɲamlic sambuc ndi.

30 Ma amam daɲga bu tim am, goc tim kic ma êmbaliɲ ɲiɲga. Amam daɲ bu ɲiɲga, naɲ hóc gêlêc am mbo ti amam lu-lu ma kôm sac su, ma tiɲambu sip ya lambwam-ɲga ti ɲamlic sambuc ndi.”

Awhê lu ɲgac sêhu dau siɲ dom

31 “Ma Moses to yom daɲ bocdec bu, ‘*Ngac daɲ naɲ gauc gêm bu hu nawhê siɲ, naɲ kêɲ bapia sêhu dau siɲ-ɲga têɲ nawhê, goc hu in siɲ.*’

32 Tigeɲ aö wasôm têɲ mac, bu yom tigeɲ yêc bu ɲgac hu in nawhê siɲ, naɲ awhê dau kôm mêtê mockaiɲ-ɲga whiɲ ɲgac daɲ. Ngac daɲ bu hu nawhê siɲ ɲambwa, naɲ kôm in ti awhê mockaiɲ-ɲga. Ma ɲgac wakuc daɲ bu nem awhê dau, naɲ

kôm mêtê mockaiŋ-ŋga* whiŋ.”

Dasôm yom tidôŋ goc dakôm ŋandô sa

³³ “Mac aŋyalê yom daŋ tiyham naŋ Anötö kêŋ têtê abañi bocdec bu, ‘Yom bocke naŋ mac amatiŋ tidôŋ, naŋ akôm popoc dom,’ ma ‘Yom naŋ mac bu apuc dôŋ bu yomandô yêc Pômdau aŋgô-ŋga, naŋ akôm ŋandô sa.’

³⁴⁻³⁵ Magoc aö wasôm têtê mac, bu asôm yom daŋ tu apuc nem yom dôŋ-ŋga dom. Asôm yom pi undambê me pi nom tu bu apuc nem yom dôŋ-ŋga dom, ŋahu bu Anötö iŋ undambê ti nom ŋadau. Ma asôm yom pi Jerusalem dom, bu Anötö kêyalin malac dau sa ti iŋ ndê kiŋ atu ndê malac.

³⁶ Ma asôm yom pi nem ŋagôlôŋ dom, bu mac atôm dom bu akôm nem kêclauŋ daŋ tisêp me tiyec.

³⁷ Asa bu lôc bu kôm gêtê daŋ, naŋ sôm ‘Aêc, aö wakôm,’ ma bu kôm dom goc sôm, ‘Mba, aö wakôm dom.’ Yom ŋatô bocke naŋ mac asôm tu apuc yom dau dôŋ-ŋga, naŋ meŋ akêtê Sadaŋ ndê.”

Daô sac naŋ sêkôm têtê yac, naŋ dom

³⁸ “Ma mac aŋyalê yom naŋ Moses to bocdec bu, ‘Ŋamalac daŋ bu ndic am tanôm tisac, naŋ ndic iŋ ndê

* **5:32:** Lau ŋatô gauc gêm bu yom dau ŋahu bocdec. Ngac daŋ bu hu ndê nawhê siŋ ŋambwa, ma awhê dau bu mbo tawasê, dec lau ŋatô oc gauc nem bu iŋ nakweŋ hu iŋ siŋ tu iŋ kôm mêtê mockaiŋ-ŋga whiŋ ngac daŋ, ma bocdinaŋ ŋac oc sêlic iŋ tôm awhê mockaiŋ-ŋga. Ma lau ŋatô gauc gêm bu yom dau ŋahu bocdec. Têtê ndoc awhê dinaŋ nakweŋ hu iŋ siŋ, goc iŋ oc nem ngac wakuc. Tigeŋ Anötö gêlic bu iŋ nakweŋ hu iŋ siŋ ŋambwa, dec iŋlu si yom sênem dau-ŋga gacgeŋ yêc. Bocdinaŋ awhê dau lu nakweŋ wakuc sêkôm mêtê mockaiŋ-ŋga yêc Anötö aŋgô-ŋga.

ô. *Ma asa nanj tuc nem njalhôm danj dulu, nanj tuc inj ndê dulu ô.*

³⁹ Tigenj aö wasôm têtj mac bu akôm mêtê sac ô mêtê sac nanj lau sêkôm têtj mac, nanj dom. Danj bu tap am sip alim andô danja, nanj kênj danja bu inj ndic whinj.

⁴⁰ Ma njac danj bu wê am têtj lau sêmatôc yom-nja, ma inj tac whinj bu am nemlhi inj ja am nem gêtj saunj danj, goc kênj nem gêtj atu têtj inj whinj.

⁴¹ Ma lau †Rom-nja si njac sinj-nja danj bu kac yom am bu honj inj ndê wapa senj njasawa apê, goc honj wapa dau êmsêlênj senj njasawa balinj whinj inj ndi.

⁴² Êmgaminj nem gêtj têtj lau nanj sêtenj gêtj têtj am, nanj dom, ma danj bu ndac am bu nem inj sa ja gêtj danj, nanj puc dômwêm inj dom.”

Atac whinj nem njacyo

(Luk 6:27-36)

⁴³ “Ma mac anjalê yom nanj Moses to bocdec bu, ‘*Atac whinj nem lau menpanj am-nja,*’ ma yom nanj lau sêsôm bocdec bu, ‘*Atac tec nem njacyo.*’

⁴⁴ Tigenj aö wasôm têtj mac bu atac whinj nem njacyo, ma atenj mbec tu lau nanj sêkênj kisa mac-nja.

⁴⁵ Mac bu akôm boc-dinanj, goc Damam undambê-nja oc sam mac bu inj atui awhê ma njac. Inj dau kênj ndê ac pi pô lau sac ti lau njayham, ma kênj u gic lau gitêtj ti lau nanj sêsa lêtj giso.

⁴⁶ Lau sac ma lau nanj sêkôc takis-nja atac whinj lau nanj atac whinj njac, ma sêtec lau nanj sêtec njac. Mac bu anjuc njac si mêtê, dec tu sake-nja Anötö oc lic mac njayham?

⁴⁷ Lau sambuc sêtoc dau si asidôwai sa, magoc sêtec lau ñatô. Bocdinañ mac bu atoc nem asidôwai tawasê sa, dec tu sake-ñga Anötö oc lic mac ñayham hôc gêlêc lau sambuc?

⁴⁸ Akôc gauc pi yom hoñ dinañ, ma akôm mêtê solop eñ, tôm Damam undambê-ñga ndê mêtê.”

6

Yom pi sakiñ gitêñ ñatô

¹ Ma Yisu gic têku yom ma sôm, “Ayob daôm bu akôm nem sakiñ anem akiñ Anötö-ñga tu bu lau sêlic e sêmpinñ mac-ñga dom. Mac bu akôm tu bu lau sêmpinñ mac-ñga, oc atap nem ñaôli dañ sa yêc Damam undambê-ñga dom.”

Mêtê dakêñ gêñ têñ lau-ñga

² “Bocdinañ têñ ndoc am bu nem lau ñalôm sawa sa, nañ goc sêc gêñ dau ahuc. Ndic dahuc tañ bu kêñ puc lau dom. †Lau sêtim yom lau-ñga nañ sêtoc dau sa, nañ sêkôm bocdinañ yêc lôm wê-ñga ti malac lôm, bu lau sêlic e sêmpinñ ñac. Yomandô aö wasôm têñ mac bu lau si sêmpinñ ñac, dinañ ti ñac si ñaôli sambuc nañ sêkôc sa su.

³ Tigeñ têñ ndoc am bu kêñ gêñ têñ lau ñalôm sawa, nañ siñ ma kêñ gelec têñ ñac, ma yob bu lau dañ sêngô ñayom dom.

⁴ Bocdinañ am nem mêtê kôm yác lau-ñga oc yêc siñ dau. Ma Damam nañ gêlic gêñ nañ yêc siñ, nañ oc kêñ ñaôli têñ am.”

Mêtê datenñ mbec-ñga (Luk 11:2-4, 9-13)

⁵ “Ma têtj ndoc am bu têtj mbec, nañ têtj tòm lau sêtim yom lau-nga dom. Nac atac whinj bu sêtenj mbec sêlhac lôm wê-nga ti señ ñamakê, tu bu lau sêlic ma sêmpiñ ñac-nga. Yomandô aö wasôm têtj mac bu lau si sêmpiñ ñac, dinañ ti ñac si ñaôli sambuc nañ sêkôc sa su.

⁶ Têtj têtj am bu têtj mbec, nañ goc sôc nem andu ñalôm ma sêc gatam ahuc, ma têtj mbec têtj Damam yêc malam nañ lau danj sêlic dom. Ma Damam nañ kêyalê gêñ nañ yêc siñ dau, nañ oc kêñ ñaôli têtj am.

⁷ “Ma têtj têtj mac bu atetj mbec, nañ atetj mbec baliñ tòm lau sambuc dom. Nac gauc gêm bu mbec dau oc ñandô sa tu ñac si yom ñalhô daêsam-nga.

⁸ Ankcuc ñac si gêbôm dom, bu Damam kêyalê gwanaj su, gêñ nañ mac apônda.

⁹ Bocdinañ atetj mbec bocdec bu:

Damañ, am nañ mbo undambê. Am nem ñaê lau sênem dabuj mañ.

¹⁰ Mweñ ti lau hoñ si Pômdau. Kêñ lau danja wambu nem yom ñapep yêc nom, gitôm yêc undambê.

¹¹ Kêñ yac mba gö têtj ac dindec.

¹² Suc yac mba sac ñatôp kwi, tòm yac asuc lau nañ sêkôm sac têtj yac, nañ si sac ñatôp kwi.

¹³ Yob yac têtj lêtôm bu tap yac sa dom, ma têtj ñgac sac Sadañ bu kôm yac ñayom dom.

¹⁴ Mac bu asuc lau nañ sêkôm sac têtj mac, nañ si sac kwi, goc Damam undambê-nga oc suc mac nem kwi bocdinañ.

¹⁵ Magoc mac bu asuc lau si sac kwi dom, dec Damam oc suc mac nem kwi dom bocdinañ.”

Mêtê dahu gêṅ daney-nga siṅ tu danem akiṅ Anötö-nga

¹⁶ “Ma têtṅ têtṅ mac bu ahu gêṅ daney-nga siṅ tu anem akiṅ Anötö-nga, naṅ akôm aṅôm andô masiṅ-masiṅ tôm lau sêtṅim yom lau-nga sêkôm, naṅ dom. Lau dinaṅ sêkôm aṅgô andô tisac, bu lau sêlic ma sêṅyalê bu ṅac sêhu gêṅ daney-nga siṅ ma tu dinaṅ-nga sêmpṅiṅ ṅac. Yomandô aô wasôm têtṅ mac bu lau si sêmpṅiṅ ṅac, dinaṅ ti ṅac si ṅaôli sambuc naṅ sêkôc sa su.

¹⁷ Bocdinaṅ têtṅ têtṅ mac ahu gêṅ daney-nga siṅ tu anem akiṅ Anötö-nga, naṅ aliṅ bu ma amasaṅ daôm ṅapep.

¹⁸ Ma ṅalêṅ dinaṅ lau daṅ oc sêṅyalê dom bu mac ahu gêṅ daney-nga siṅ. Tigeṅ mac nem Damam naṅ mbo siṅ dau, naṅ kêyalê gêṅ hoṅ naṅ yêc siṅ dau, ma bocdinaṅ oc kêṅ nem ṅaôli têtṅ mac.”

*Taṅsalê awa ṅandô undambê-nga
(Luk 12:33-34)*

¹⁹ Ma Yisu sôm, “Andic nem awa ti wapa sa lhac nom dom, bu sop oc neṅ, ma u oc nôṅm gêṅ dau tibalê, ma lau kaṅ oc sênem kaṅ sa.

²⁰ Apo gêṅ undambê-nga sa ti nem awa ṅandô, ma sop ti u oc seṅ su dom, ma gitôm dom bu lau kaṅ sêsôc sêndi bu sênem kaṅ.

²¹ Aô gasôm yom dinaṅ, ṅahu bu gameṅ bocke naṅ mac nem awa yêc, naṅ mac nem ṅalôm ti gauc oc sap dôṅ ṅapaṅ.”

*ṅamalac si tandô gitôm ya ṅawê
(Luk 11:33-36)*

²² “ṅamalac si tandô gitôm ya ṅawê naṅ tôc seṅ têtṅ ṅac. Bocdinaṅ mac nem tanôm bu wê mac asa lêṅ

ņayham, goc mac nem ņamlic ņagêņ honj oc yêc ņawê ņalôm eņ.

23 Magoc tanôm bu wê mac asa lêņ sac-ņga, goc mac gacgeņ ambo ņasec ņalôm. Bocdinaņ mac bu gauc nem bu ambo ņawê ņalôm, magoc asa lêņ ņasec-ņga, naņ dec ņasec gêm mac ahuc sambuc.”

Danem akiņ ņadau lu dom

24 “Ņamalac daņ gitôm dom bu nem akiņ ņadau lu, bu inj oc tec daņ, ma atac whiņ daņ, me sap daņ dôn ma pu daņ. Ma mac bocdinaņ, gitôm dom bu mac atoc Anötö ma awa nom-ņga lu-lu sa ti mac nem ņadau.”

Dahêgo dauņ dom (Luk 12:22-32)

25 “Tu dinaņ-ņga dec ahêgo daôm dom tu gêņ aneņ-ņga ti anôm-ņga, me tu ņakwê asôc-ņga. Anötö kêņ mac ambo tamli, ma gêņ dinaņ inj gêņ atu. Gêņ daneņ-ņga inj gêņ atu dom. Ma Anötö kêņ mac nem ņamlic ņagêņ honj, ma gêņ dinaņ inj gêņ atu. Ņakwê asôc-ņga inj gêņ atu dom.

26 “Akôc gauc pi mbac. Ņac sêsô gêņ dom, sêhoņ gêņ ņandô ma sic sa sôc andu gêņ ņandô-ņga dom. Tigenj Damam undambê-ņga gôlôm ņac. Ma inj tac whiņ mac ņamalac hóc gêlêc mbac honj su.

27 Ma mac nem asa bu hêgo dau, dec oc tôm bu ndic têku ndê têm mbo tali-ņga?

28 “Tu sake-ņga mac nem ņalôm ņawapac tu ņakwê asôc-ņga? Akôc gauc pi ņaola ņayham naņ sêpo sêlhac kwanj ņalôm, naņ sêkôm gwelenj ti sêmasaņ ņakwê dom.

²⁹ Tigen aö wasôm têñ mac bu Kiñ Solomon in sôc ñakwê ñayham andô, magoc in ndê gôlôn ti ñawasi hôc gêlêc ñaola dinañ dan su dom.

³⁰ O mac lau nan akêñ whiñ gwalec, anğô! Kwan ti ñaola nom-ñg a sêlhac bêc daêsam dom, ma lau oc sêkêñ ya neñ su. Magoc Anötö kên gêñ dau ti ñadalô ñayham, ma yob ñapep. Ma bocdinañ anjyalê bu yom ñandô, in oc yob mac, ma kên ñakwê têñ mac whiñ.

³¹ Bocdinañ ahêgo daôm dom ma asôm bu ‘Daneñ sake?’ me ‘Danôm sake?’ me ‘Dasôc ñakwê bocke?’ lec dom.

³² Lau sambuc nan sêñyalê Anötö dom, nan sêhêgo dau tu gêñ hon dinañ-ñga, tigen Damam undambê-ñga kêyalê su bu mac apônda gêñ hon dinañ.

³³ Gêñ ñamata-ñga akôm ñanğa bu atap malam sa yêc Anötö ndê gôlin ñapu, ma bu asa in ndê lêñ gitêñ. Ma in oc yob mac tu gêñ nom-ñga-ñga whiñ.

³⁴ “Bocdinañ ambo ti nem ñalôm ñawapac tu gêñ lañsê-ñga dom. Ahu siñ yêc e lañsê dau hôc asê. Ñawapac bêc tigen-ñga nan gitôm bêc tigen dinañ.”

7

Dapu lau ñambwa dom (Luk 6:37-42)

¹ Ma Yisu sôm, “Alic lau sac ñambwa tu ñac si lêñ ti sakin-ñga dom, dec Anötö oc lic mac sac tu nem-ñga dom.

² Bu Anötö oc êñsahê mac tôm mac anñsahê lau, ma nem dôhôn mac nem lêñ ti sakin tôm dôhôn nan mac am dôhôn lau si.

3 “Tu sake-nga am hêgo daôm tu gêñ golop saun nan yêc nem asidôwa tandô, tigen gêñ golop atu nan yêc am daôm tanôm, nan gêlic apu?”

4 Ma bocke am sôm têñ nem asidôwa, ‘Aö bu wakôc gêñ golop nan yêc am tanôm, nan sa.’ Tigen gêñ golop atu pôc daôm nem tanôm ahuc?

5 Am ngac tim yom lau-nga! Kôc gêñ golop atu sa yêc daôm tanôm mun e tanôm njawa sa, nan goc kôc gêñ golop saun dinañ sa yêc nem asidôwa tandô.”

Dayob Anötö ndê gêñ dabuñ njapep

6 “Akêñ gêñ dabuñ têñ giam dom, bu oc sêkac dau kwi ma sêsen mac. Ma ambalin nem gôlônñ njayham têñ bôc dom, bu oc sêkwê popoc.”

Anötö in njadau bu kêñ gêñ têñ yac-nga

7 “Ateñ gêñ têñ Anötö, dec oc akôc njandô, anjalê in ti ndê lêñ, ma oc atap sa, ma bu amati gatam oc lêc su têñ mac.

8 Bu Anötö kêñ gêñ têñ lau hon nan sêndac in, ma lau hon nan sêñsalê in ti ndê lêñ, nan oc sêtap sa, ma nac nan sêmati gatam nan oc lêc su têñ nac.

9 “Mac dambai anğô! Nem balê dan bu teñ gö têñ am, dec am oc kêñ hoc têñ in, a?”

10 Ma bu teñ i oc kêñ mboc sac têñ in, a?”

11 Mba! Mac lau sac, tigen atoc nem balêkoc sa na gêñ njayham. Magoc Damam nan mbo undambê in gitên en, ma oc kêñ gêñ njayham-njayham en têñ lau nan sêteñ in.

12 Akôm mêtê njayham têñ lau hon, gitôm mêtê njayham nan mac atac whin bu sêkôm têñ mac. Yom hon nan Moses ti lau propet sêto, nan hêganônñ yac dakôm mêtê njayham bocdinañ.”

Yom seņ lu-ņga

13 “An̄sahê ņan̄ga bu atap gameņ andöc tamli ņapaņ-ņga sa, magoc aņyalê bu gatam gameņ di-naņ-ņga iņ gatam sauņ. Bu gameņ andiņam-ņga dê yêc, ma seņ têņ gameņ dau iņ seņ atu, ma ņagatam atu bocdinaņ. Lau daêsam sêsa seņ atu dinaņ, ma oc sêsôc gatam atu dau.

14 Magoc gameņ dandöc taņli ņapaņ-ņ ga ņagatam iņ gatam sauņ, ma seņ têņ gameņ dinaņ iņ seņ atu dom, ma lau daêsam oc sêtap sa dom.”

Yom pi propet tasan

15 “Ayob daôm tu propet tasan-ņga. Țac sêtôm giam pôm naņ sêmpan̄ dau ahuc ņa domba ņamlic, tu bu sêti gasuc domba-ņga ma sêseņ ņac su. Țalêņ tigeņ propet tasan oc sêtêņ mac sêloc tu sêņsau mac-ņga.

16 An̄sahê ņac si lêņ dec tôm bu mac aņyalê bu ņac lau tasan. Țalêņ tigeņ, yac dalic a ņandô ma taņyalê a dau bu ņayham me sac. Oc tôm dom bu dahiņ ņandô ņayham yêc a sac.

17 Yomandô! A ņayham sem ņandô ņayham, ma a sac sem ņandô sac.

18 A ņayham daņ gitôm dom bu nem ņandô sac, ma a sac gitôm dom bu nem ņandô ņayham.

19 Ma a hoņ naņ sem ņandô sac, naņ oc sêlêņ su ma sêtuc pi ya ndi, ma ya neņ su.

20 Bocdinaņ an̄sahê propet si lêņ, ma aņyalê ņac bu propet ņayham me sac.”

Pômdau kêyalê iņ ndê lau su

21 “Lau daêsam sêsam aö bu, ‘Pômdau,’ tigeņ ņac hoņ oc sêtap gameņ undambê-ņga sa dom.

Mba! Lau nanɔ daŋga wambu Damaŋ undambê-ŋga ŋapep, ma sêkôm mêtê tôm inɔ atac whiŋ, nanɔ oc sêtap undambê sa.

²² Têŋ Anötö ndê bêc êmatôc lau-ŋga, nanɔ lau tasanɔ daêsam oc sêsôm têŋ aô bu, ‘Pômdau, Pômdau! Yac ahoc yom asê atôm propet, ma atiŋ ŋalau sac su ma akôm gêŋ dalô daêsam am am aŋôm. Bocdinanɔ kôc yac sa.’

²³ Tigenɔ aô wasôm têŋ ŋac bu, ‘Aô kayalê mac dom sambuc mac lau sac. Alhö su yêc aô!’ ”

*Yom gôlinɔ pi ŋac lu nanɔ sêkwê andu
(Luk 6:46-49)*

²⁴ “Lau nanɔ sêŋgô aneŋ yom ma sêkôm ŋandô sa, nanɔ sêtôm ŋac tigauc nanɔ kwê ndê andu kalhac nom ŋaŋga ma kêŋ hoc kêgapiŋ alhö dôŋ.

²⁵ Têŋ ndoc u gic e bu hêc, ma mbu puc ŋadinda hôc pi andu dau, nanɔ andu dau ku sa dom bu hoc kêgapiŋ dôŋ.

²⁶ Magoc lau nanɔ sêŋgô aneŋ yom ma sêkôm ŋandô sa dom, nanɔ sêtôm ŋac gauc mba nanɔ kwê ndê andu kalhac nom babalê.

²⁷ Ma u gic ti bu hêc, ma mbu puc ŋadinda hôc pi andu dau, goc ku sa ma tisac sambuc.”

²⁸ Yisu gic bata ndê yom dinaŋ, ma lau hoŋ sêhêdaê tu inɔ ndê yom-ŋga.

²⁹ Ŋahu bu yom nanɔ inɔ kêdôhônɔ têŋ ŋac nanɔ yom ti ŋaclai, hôc gêlêc lau Israel-ŋga si kêdôhônɔwaga yomsu-ŋga si yom hoŋ su.

8

*Yisu kôm ŋac ti gêmbac leprasi ŋayham sa
(Mak 1:40-45; Luk 5:12-14)*

¹ Yisu sip akêñ lôc meñ, ma lau daêsam sêñkuc in.

² Ma ñgac dañ ti gêm bac fleprasi têtñ in gi, goc pôn haduc ma sôm, “Pômdau. Am bu tac whiñ dec gitôm bu am oc kôm aõ ñamlic ñawasi sa.”

³ Yisu kêm atôc amba sa gi ma kêmasec in, ma sôm, “Aõ atac whiñ, dec wasôm têtñ am bu ñamlic ñawasi sa.” Ma ñagahô eñ gêm bac hu in siñ, ma in ñamlic ñayham sa.

⁴ Ma Yisu sôm têtñ in, “Am ñgô! Gêñ nañ kwahic dec hôc asê am, nañ sôm asê têtñ lau dañ dom. Tigen têtñ †dabuñsiga ndi, tôc daôm têtñ in bu lic bu am nem ñamlic ñawasi sa su. Ma kêtñ da tôm yomsu nañ Moses kêtñ têtñ yac. Ma ñalêtñ ðinañ lau honj oc sêñyalê bu am ñamlic ñayham sa.”

*Ñgac bata siñ-ñga dañ kêtñ whiñ ñanğa
(Luk 7:1-10)*

⁵ Tiñambu Yisu sôm malac Kapenaom gi. Ma ñgac bata Rom-ñga dañ, nañ gêm gôlinj lau siñ-ñga 100, nañ têtñ in gi ma ndac in bu nem in sa.

⁶ In sôm, “Pômdau, aneñ ñgac akiñ dañ ndöc bôlinj. In yêc andu ñapañ ma kêsahê ñandê atu.”

⁷ Ma Yisu sôm têtñ in, “Aõ oc waloc ma wakôm in ñayham sa.”

⁸ Tigen ñgac bata dau ô yom ma sôm, “Pômdau, am ñgac atu ma aõ ñgac apa, dec mayañ daun bu am sôm aneñ andu. Tigen aõ kayalê su bu am ñgac ti ñaclai atu, ma bocdinañ dec am bu ndic atu yom, goc aneñ ñgac akiñ oc ñayham sa.

⁹ Bu aõ daun dañañ wambu lau nañ si ñaclai hôc gêlêc aõ neñ, ma aneñ lau siñ-ñga dañga wambu aõ. Aõ bu wasôm têtñ dañ, ‘Am ndi!’ goc in oc ndi. Ma bu wasôm têtñ dañ, ‘Am mweñ,’ goc in oc meñ.

Ma bu wasôm têñ aneñ ñgac akiñ bu kôm gêñ dan, goc in oc kôm.”

¹⁰ Yisu ñgô ñgac bata ndê yom ma hêdaê, ma sôm têñ lau nañ sêñkuc in bu, “Yomandô wasôm têñ mac, bu yêc lau Israel honj aö gatap ñac si dan nañ kênñ whiñ ñaŋga gitôm ñgac Rom-ŋga dindec, nañ sa dom.

¹¹ Anğô! Lau daêsam nañ lau Israel dom, nañ oc sêmeñ akêñ nom ñabatiñ honj, ma sêtap mwasiñ atu sa yêc undambê sêwhiñ Abraham, Aisak ma Jakob.

¹² Tigenñ lau Israel daêsam nañ gauc gêm bu sic waê bu sêndöc undambê, nañ Anötö oc êmasuc ñac su sêndöc gameñ ñasec-ŋga, ma sêtañ ti lhö êñsiñ pi dau.”

¹³ Yisu sôm yom dinañ têñ lau honj su, goc sôm têñ ñgac bata, “Am lhö mbu ndi. Aö oc wakôm am nem ñgac akiñ dinañ ñayham sa, tôm am kênñ whiñ.” Ma têñ ndoc dau dinañ gêmbac hu ñgac akiñ dau siñ, ma in ñayham sa.

*Yisu kôm lau daêsam ñayham sa
(Mak 1:29-34; Luk 4:38-41)*

¹⁴ Tinjambu Yisu têñ Pita ndê andu gi ma gêlic Pita lawawê gêmbac lic ñandê atu ma yêc.

¹⁵ Yisu têñ in gi ma kêmasec in amba, goc gêmbac hu in siñ. Ma in tisa, ma ndê gêñ daneñ-ŋga ma kênñ têñ Yisu.

¹⁶ Têñ telha dinañ ac gi sip su, g oc lau malac-ŋga sêkôc lau daêsam nañ ñalau sac sêmo ñac si ñalôm, nañ sa sêtêñ Yisu si. Ma in gic atu yom, goc ñalau sac sêhu lau dau siñ, ma in kôm lau gêmbac honj ñayham sa.

17 Njalêḅ dau dinaḅ yom naḅ propet Aisaya sôm su naḅ dec ḅandô sa. Muḅ-ḅga iḅ to yom pi Mesaya bocdec bu:

Iḅ hóc yac neḅ ḅawapac tu nem yac sa-ḅga. [*Ais 53:4*]

Lêḅ taḅkuc Yisu-ḅga
(*Luk 9:57-62*)

18 Têḅ bêc daḅ Yisu gêlic lau daêsam sêḅgihi iḅ ahuc, goc sôm têḅ ndê †ḅgacsêḅomi bu sêlom bug-ictōḅ ma sêpi daḅga sêndi.

19 S êmasaḅ dau sêmbo ma kêdôhôn-waga yomsu-ḅga daḅ meḅ ma sôm têḅ iḅ, “Kêdôhônwaga, aô bu waḅkuc am, wawhiḅ am watêḅ gameḅ bocke naḅ am oc ndi.”

20 Ma Yisu ô iḅ ndê yom ma sôm, “Giam pôm si hocsuḅ yêc, ma mbac lôlôc-ḅga si ḅaic yêc, tigeḅ †ḅamalac ndê Atu dau ndê mala yêc bêc-ḅga mba.”

21 Ma sêḅom daḅ sôm têḅ iḅ, “P ômdau, aô bu waḅkuc am, magoc gêḅ ḅamata-ḅga aô wandi wambo wawhiḅ aneḅ lau e aḅsuhuḅ damaḅ su naḅ.”

22 Tigeḅ Yisu sôm, “Mba! Am bu gauc nem bu êmkuc aô, naḅ gêḅ ḅamata-ḅga. Tec lau batê sêḅsuhuḅ lau batê.”

Yisu kôm bu ḅamponḅ timalô
(*Mak 4:35-41; Luk 8:22-25*)

23 Yisu sôm yom dinaḅ su, goc pi waḅ daḅ gi. Ma iḅ ndê ḅgac-sêḅomi sêḅkuc iḅ ma sêpi waḅ sêwhiḅ.

24 Sêlac si, ma mbu puc atu ma gêli bu ḅamponḅ sa gic sip waḅ, e kêpiḅ bu waḅ pac. Tigeḅ Yisu yêc bêc yêc waḅ.

25 Dec sê têtêj inj si, sêuj inj sa ma sêsôm, “Pômdau, nem yac sa, bu yac oc dapac dandinan.”

26 Magoc Yisu sôm têtêj nac, “O mac lau nan akêj whinj gwalec. Tu sake-nga mac atôc daôm?” Goc inj tisa ma sôm yom nannga têtêj mbu ti bu nampon, ma gamen nanen sa.

27 Ma nac honj sêhêdaê ma sêsôm têtêj dandi, “Ei! Inj ngac kainj bocke? Bu gêj honj sêsôc inj ndê yom napu, ma mbu ti bu sêwhinj.”

*Yisu soc nalau sac su yêc ngac lu
(Mak 5:1-20; Luk 8:26-39)*

28 Nac sêhêc asê bugictonj nadannga ma sêsôc lau Gadala-nga si gamenj si. Ma yêc dindê ngac lu sêsa akêj ôm sêhê-nga ma sê têtêj Yisu si. Inlu ngac lu nan nalau sac sêmbo injlu nalôm, ma sêkôm injlu sêti ngac pôm. Ma bocdinanj lau honj sêtôc injlu ma sêmbo ahê injlu, ma injlu sêndôc ôm sêhê-nga napanj.

29 Têtêj ndoc injlu sêhêc asê Yisu, nanj nalau sac nanj sêmbo injlu nalôm, nanj sêmbwêc bocdec bu, “O Anötö ndê Atu! Am bu kôm sake têtêj yac? Têm bu Anötö êmatôc yac-nga yêc dôj yêc. Ma bocke am kwahic dec mwenj bu kôm yac nayanom?”

30 Bêc tonj atu danj senj gêj sêmbo ahê gamenj nanj nac sêlhac.

31 Goc nalau sac sêtenj Yisu bu, “Am bu soc yac su, nanj kêj yac asip bêc nalôm.”

32 Ma inj sôm têtêj nac, “Andi!” Goc sêhu ngac lu dinanj sinj ma sêsôc bêc nalôm si. Ma bêc honj sênti sêsip salic sac, sêsip bugictonj nalôm si, ma bu kô nac sêmbac ndu.

33 Lau sêyob bêc-nga sêlic gêj dau, goc sêlhô sêsa malac si, ma sic minj têtêj lau malac-nga pi gêj honj

dinaŋ, ma pi gêŋ naŋ Yisu kôm têŋ ŋac lu ti ŋalau sac.

³⁴ Ma lau malac-ŋga hoŋ sêsa sêtêŋ Yisu si, ma têŋ ndoc sêlic iŋ, naŋ sêteŋ iŋ bu hu ŋac si gameŋ siŋ.

9

*Yisu kôm ŋac bôliŋ daŋ ŋayham sa
(Mak 2:3-12; Luk 5:17-26)*

¹ Goc Yisu pi waŋ gi ma gic bugictoŋ kic, ma têŋ iŋ ndê malac Kapenaom gi.

² Ma lau gameŋ dinaŋ-ŋga sêmbalaŋ ŋac bôliŋ daŋ yêc sac daŋ ma sêtêŋ Yisu si. Iŋ gêlic bu ŋac sêkêŋ whiŋ iŋ, dec sôm têŋ ŋac bôliŋ dau, “Aneŋ balê, atac ŋayham sa. Kwahic dec aö oc wasuc am nem sac kwi.”

³ Kêdôhônwaga yomsu-ŋga ŋatô s êŋgô Yisu ndê yom dau, goc sêsôm têŋ dandi, “Ŋac dê ndê yom sac sambuc! Anötö tigeŋ gitôm bu suc sac kwi.”

⁴ Yisu kêyalê ŋac si gauc, goc ndac ŋac, “Tu sake-ŋga mac gauc gêm yom sac yêc nem ŋalôm?”

⁵ Mac akêŋ whiŋ dom bu aneŋ ŋaclai yêc bu wasôm têŋ ŋac dau bu, ‘Aö wasuc am nem sac kwi.’ Bocdinaŋ aö wasôm têŋ iŋ bu, ‘Tisa ma êmsêlêŋ.’

⁶ Ma têŋ ndoc mac alic bu aneŋ yom dinaŋ ŋandô sa, goc aŋyalê bu Anötö kêŋ ŋaclai têŋ Ŋamalac ndê Atu yêc nom, bu suc ŋamalac si sac kwi whiŋ.” Goc Yisu sôm têŋ ŋac bôliŋ bu, “Tisa ma hêc nem mbô sa, ma lhö têŋ nem andu ndi!”

⁷ Goc ŋac dau tisa ma kölhö têŋ ndê andu gi.

⁸ Ma lau daêsam naŋ sêlic gêŋ dau sêhêdaê ŋandô, ma sêmpin Anötö naŋ kêŋ ŋaclai bocdinaŋ têŋ ŋamalac.

*Yisu kêgalêm Matyu bu ênkuc in
(Mak 2:13-17; Luk 5:27-32)*

⁹ Yisu kêsêlêḅ gi ma gêlic ḅgac dan ḅaê Matyu nan ndöc ndê mala kôc takis-ḅga. Ma in sôm têḅ in, “Êmkuc aö!” Goc Matyu tisa ma kêkuc in.

¹⁰ Tinambu Yisu gêḅ gêḅ ndöc Matyu ndê andu ḅalôm, ma lau daêsam sêmeḅ ma seḅ gêḅ sêndöc sêwhin Yisu ti ndê ḅgacsêḅomi. ḅac lau sêkôc takis-ḅga ti lau ḅatô nan lau Palêsai sêsam ḅac bu lau sac.

¹¹ Ma lau Palêsai ḅatô sêlic gêḅ dinaḅ, goc sêndac in ndê ḅgacsêḅomi bocdec bu, “Tu sake-ḅga mac nem kêdôhônḅwaga gêḅ gêḅ ndöc whin lau sac dindê?”

¹² Yisu ḅgô ḅac si yom dau ma sôm, “Lau nan sêlic dau bu gêmbac mba, nan oc sêḅsalê dokta dom, magoc lau ti gêmbac oc sêḅsalê dokta.

¹³ Gauc nem Anötö ndê yom nan propet akwa dan to yêc bocdec bu, ‘*Gêḅ atu nan aö atac whin, nan bu mac tamwalô lau, hóc gêlêc domba hon nan mac bu andic ndu ma akêḅ ti da, nan su.*’ Andi ma akôc gauc pi yom dau e anyalê ḅahu ḅapep. Bu aö gameḅ bu wanḅgalêm lau nan sêlic dau bu lau gitêḅ, nan sa dom. Aö gameḅ bu wanḅgalêm lau sac sa, bu sênem dau kwi ma sêsôc Anötö ndê gôlin ḅapu.”

*Yao gêḅ daney-ḅga-ḅga
(Mak 2:18-20; Luk 5:33-35)*

¹⁴ Ma Jon, ḅgac Kêku Lau-ḅga ndê sêḅomi ḅatô sêtêḅ Yisu si ma sêndac in bu, “Bocke dec yac ti lau Palêsai akêḅ bêc ḅatô bu aney gêḅ dom tu gauc nem Anötö-ḅga, tigeḅ am nem ḅgacsêḅomi seḅ gêḅ tôm bêc hon?”

15 Ma Yisu sôm têtj ñac, “Ñgac nem awhê-ñga dan bu êngalêm lau sa sêmbo sêwhiñ iñ tu sêneñ mwasiñ nem awhê-ñga, dec oc tòm dom bu sêhu gêtj daneñ-ñga siñ ma sêndöc ti ñalôm ñawapac têtj ndoc ñgac dau mbo whiñ ñac. Mba! Ma bocdinañ aneñ ñgacsêñomi sêmbo sêwhiñ aö ti atac ñayham, ma sêhu gêtj daneñ-ñga siñ dom. Tigeñ ndoc oc meñ nan lau oc sêkôc aö su yêc ñac, ma têtj têm dinañ ñac oc ñalôm ñawapac ma sêñkuc lêñ dahu gêtj daneñ-ñga siñ-ñga.”

*Yisu ndê yom gitôm gêtj wakuc
(Mak 2:21-22; Luk 5:36-39)*

16 Ma Yisu sôm, “Yac dasi po wakuc pi ñakwê akwa nan kic, nan dom. Bu po wakuc oc hôc ñakwê akwa kic e tisac sambuc.

17 Ma têtj ndoc lau sêmasañ wain wakuc, nan sêkêc sip bôc ñamlic wain-ñga akwa dom. Mba! Ñac bu sêkôm, goc wain wakuc oc hôc ñamlic akwa kôc. Ma wain oc wê niñga, ma ñamlic dau oc tisac. Bocdinañ lau sêkêc wain wakuc sip bôc ñamlic wakuc, ma lu-lu oc sêyêc ñayham.”

*Yisu kôm awhê lu ñayham sa
(Mak 5:21-43; Luk 8:40-56)*

18 Yisu sôm yom dinañ mbo, ma ñgac bata dan meñ pôtj haduc têtj iñ ma sôm, “Aneñ atuñwê kwahic dec mbac ndu su, magoc am bu mweñ ma kêtj amam sac iñ, dec iñ oc mbo tali tiyham.”

19 Goc Yisu tisa ma iñ ti ndê ñgacsêñomi sêwhiñ ñgac dau si.

20 Sêñsêlêñ sêmbo, ma awhê dan tigasuc iñ kalhac iñ dômbwê ma kêmasec iñ ndê ñakwê ñadali.

Awhê dau hôc ñawapac gêm dac-nga ñapanj gitôm yala 12 su, dec

²¹ gauc gêm yêc dau bu, “Aö bu wamasec inj ndê ñakwê ñambwa, dec oc kôm aö ñayham sa tiyham.”

²² Yisu kac dau kwi e gêlic inj, goc sôm, “Aneñ bawhê, atac pa su. Am ñayham sa tiyham tu am nem kêñ whinj aö-nga.” Ma têtñ ndoc dau dinanj awhê dau ñayham sa.

²³ Ma tinjambu Yisu gi e hôc asê ñgac bata dau ndê andu, ma gêlic bu lau tonj atu sêmbo. Ñatô sêyu gasuc ma ñatô sêtanj ti ñanta atu.

²⁴ Goc sôm, “Alhö su, bu bawhê dau mbac ndu dom. Inj yêc bêc nanj yêc.” Magoc ñac sêmbwac inj.

²⁵ Dec Yisu sôm bu sêsoc ñac sêsa sêndi, goc sôc gi kêñ bawhê sip amba, ma inj tisa.

²⁶ Ma yom dau ñawaê tiapa sambuc yêc gameñ dinanj.

Yisu kôm ñgac tapec lu ñayham sa

²⁷ Dinanj su, goc Yisu kêsêlêñ gi. Ma ñgac tapec lu sêñkuc inj ma sêmbwêc, “O †Dawid ndê Atu, tamwalô alu!”

²⁸ Magoc Yisu kêsêlêñ gi sôc andu danj, dec ñgac lu dinanj sêtêñ inj si, ma inj ndac, “Amlu akêñ whinj bu aneñ ñaclai yêc bu wakôm amlu ñayham sa, me mba?” Ma injlu sêsôm, “Aêc, Pômdau!”

²⁹ Goc Yisu kêmasêc injlu tandô, ma sôm bu, “Tu amlu akêñ whinj aö-nga, dec gêtñ nanj amlu andac, nanj oc ñandô sa.”

³⁰ Ma injlu tandô po asê. Goc Yisu gic yao injlu bu sêsôm gêtñ dau ñayom asê têtñ lau danj dom.

³¹ Magoc injlu sêsa si, ma sêkôm inj ndê waê sa e tiapa gêm gameñ dinanj ahuc.

Yisu kôm ngac awha mba sôm yom asê

³² Nac sêsa si ma lau natô sêtêñ Yisu sêmeñ. Nac sêkôc ngac dañ, nañ ñalau sac kôm in awha mba.

³³ Yisu soc ñalau sac sa awê gi su, goc awha mba dau sôm yom asê. Lau daêsam dinañ sêseñ amba ma sêsôm bu, “Yac dalic gêñ dañ bocdec yêc Israel dom andô.”

³⁴ Magoc lau Palêsai sêsôm bu, “In kôc ñaclai yêc ñalau sac si ñadau Sadañ, dec tin ñalau sac su.”

Yisu tawalô lau

³⁵ Ma Yisu kêsêlêñ golom-golom malac atu ti saun. In kêdôhôn lau mbo lôm wê-nga, ma hoc ñawaê ñayham pi Anötô ndê gôlin asê. Ma in kôm lau ti gêmbac tidau-tidau hon ñayham sa.

³⁶ Magoc têtñ ndoc in gêlic lau daêsam nañ sêñkuc in, nañ tawalô ñac. Nahu bu in gêlic ñac sêtôm domba nañ si ngac yob ñac-nga mba, dec giam pôm sêtê ñac salin-salin ñapañ.

³⁷ Goc in sôm têtñ in ndê ngacsêñomi, “Gêñ ñandô daêsam yêc ôm, magoc lau sêndic ñandô sa-nga daêsam dom.

³⁸ Bocdinañ atên mbec têtñ ôm ñadau bu êñkin lau gwelen-nga sêsôc in ndê ôm ma sêndic gêñ ñandô sa.”

10

*Yisu kêyalin ñaposel 12 sa
(Mak 3:16-19; Luk 6:12-16)*

¹ Yisu ta in ndê ngac-sêñomi 12 sêtêñ in si, ma kêtñ ñaclai têtñ ñac bu sêsoc ñalau sac su yêc lau, ma bu sêkôm gêmbac hon ñayham sa.

² Aposel 12 dau si ñaê bocdec. Ngac ñamata-nga inñ Saimon nanñ sêsam bu Pita, lu inñ asi Andru, ma Sebedi ndê atu lu Jems lu Jon,

³ P ilip ma Batolomeas, Tomas ma ngac kôc takis-nga Matyu, ma Alpayas ndê atu Jems, Tadaus,

⁴ Saimon nanñ sêsam bu ‘Ngac †Selot,’ ma Judas Iskeriot nanñ tinjambu hoc Yisu asê.

*Yisu kêkinj aposel 12 sêsa si bu sênem mêtê lau
(Mak 6:7-11; Luk 9:1-5)*

⁵ Yisu kêkinj lau 12 dinanñ sêsa si bu sênem mêtê, ma gic yomsu ñac bocdec bu, “Asôc lau apa ti lau †Samaria-nga si malac danñ dom,

⁶ tigenñ gêñ ñamata-nga atêñ domba Israel-nga nanñ sinñga su, nanñ andi.

⁷ Anem mêtê ma asôm têtñ lau bu Anötö ndê gôlinñ menñ kêpinñ su.

⁸ Akôm lau gêmbac ñayham sa, ma akôm lau ti gêmbac leprasi ñamlic ñawasi sa. Auñ lau batê sêtisa, ma asoc ñalau sac su yêc lau. Anötö kêñ ñaclai têtñ mac ñaôli mba, ma bocdinanñ anem lau sa ñambwa.

⁹⁻¹⁰ Ma têtñ ndoc mac anñsêlêñ andi, nanñ gauc nem wapa señ-nga dom. Anñsêlêñ amam sawa, akôc mone dom, ampwic talhi dom, akôc ñakwê aô daôm-nga ti atapa dom, ma ahôc tôc dom. Nalêñ solop bu lau sêlôm lau nanñ sem gwelenñ mêtê-nga ma sêpuc ñac dôñ ña gêñ dinanñ, nanñ ti ñac si ñaôli ô gwelenñ.

¹¹ “Malac bocke mac bu asôc andi, nanñ anñsalê ñamalac ñayham nanñ toc Anötö sa ñapep, bu ambo awhinñ inñ e mac ahu malac dau sinñ.

¹² Têtñ ndoc mac api inñ ndê andu andi, nanñ anem mbec inñ ndê lau ña mbec yom malô-nga.

¹³ Ma ñac lau dau bu lau gitêñ, goc yom malô oc yêc ñac. Ma ñac bu lau gitêñ dom, goc mac nem mbec yom malô-ñga oc gacgen yêc mac-ñga.

¹⁴ Ma lau malac dan bu sêkôc mac ti nem yom sa dom, goc ahu malac me andu dinan sij ma aton kop su yêc gahim.

¹⁵ Aö wasôm têñ mac bu têñ Anötö ndê bêc êmatôc lau-ñga, lau malac dinan-ñga oc sêtap ñagêyô sac sambuc sa, hóc gêlêc ñagêyô nan in oc kêñ têñ lau Sodom ti Gomora-ñga têñ têm ñambu-ñga, nan su.”

*Yisu ndê lau oc sêtap kisa sa
(Mak 13:11-13; Luk 21:12-17)*

¹⁶ “A ñgô su nan! Aö wanñiñ mac asa andi, atôm domba nan sêsip giam pôm si gameñ. Bocdinan akôc gauc ñapep ma akôm nem gwelen, ma akôm mêtê ñayham eñ e lau dan gitôm dom bu sêpu mac.

¹⁷ Ayob daôm têñ lau nan sêkêñ whiñ aö dom, bu ñac oc sêkêñ mac atêñ lau sêmatôc yom-ñga andi, ma sêhi mac ña sö yêc ñac si lôm wê-ñga.

¹⁸ Tu mac anñkuc aö-ñga dec ñac oc sêkêñ mac alhac gôlinwaga ti kiñ si anñgô-ñga. Ndoc dinan ti mac nem ndoc bu awhê aneñ yom sa têñ lau atu-tu dinan, ma têñ lau akêñ gameñ hon, nan whiñ.

¹⁹ Ma têñ ndoc sêkôc mac dôñ, nan ahêgo daôm dom tu yom asôm-ñga. Anötö oc nem mac sa tu asôm yom-ñga.

²⁰ Ma yom nan mac bu asôm, nan mac nem yom dom. Damam undambê-ñga oc kêñ in ndê Ñalau puc mac dôñ, ma hóc nem awham sa.

²¹ “Têñ ndoc ñawapac-ñga dinan, lau nan sêkêñ whiñ dom oc sêhoc si asidôwai sêkêñ whiñ aö-ñga

asê bu sêndic ñac ndu, ma dambai oc sêkôm têtj atui boc-dinañ. Balêkoc oc sêli dau sa têtj damba ti dindai, ma sêkêtj ñac sêtêtj lau bu sêndic ñac ndu.

²² Ma lau sambob oc atac tec mac tu aö-ñga. Magoc asa nañ bu lhac ñañga ma hu aö siñ dom, nañ oc tap Anötö ndê mwasinj nem inj si-ñga sa.

²³ Ma lau bu sêkêtj kisa mac, goc ahu ñac si malac siñ ma atêtj malac dañ andi. Yom ñandô aö wasôm têtj mac! Mac nem gwelenj anem mêtê ñawaê ñayham-ñga yêc malac Israel-ñga hoñ oc pacndê dom, e Ñamalac ndê Atu meñ sa tiawê.”

*Lau nañ sêñkuc Yisu oc sêhóc ñawapac gitôm inj dau
(Luk 6:40)*

²⁴ “Kwapuc dañ oc hóc gêlêc gwalam akwa nañ kêdôhôn inj, nañ dom. Ma ñgac akiñ oc hóc gêlêc inj ndê ñadau dom.

²⁵ Kwapuc bu tôm ndê gwalam akwa ma ñgac akiñ bu tôm ndê ñadau, goc tôm. Lau sêpu gôlôwac ñadau aö ma sêsam aö bu †Belsebal, ma bocdinañ ñac oc sêkôm têtj ñadau ndê lau mac, hóc gêlêc su.”

*Atöc lau nom-ñga dom
(Luk 12:2-7)*

²⁶ “Magoc atöc daôm tu lau nañ sêkêtj kisa mac-ñga dom. Ñahu bu gêtj hoñ nañ lau sem ahuc, me yêc siñ dau, nañ oc meñ sa tiawê.

²⁷ Yom nañ aö gasôm têtj mac têtj ôbwêc, nañ asôm asê têtj acsalô, ma yom nañ aö gac yom sec têtj mac, nañ asôm tiatu alhac malac lôm.

²⁸ Atöc lau nañ bu sêndic mac ndu-ñga dom, bu ñac gitôm dom bu sêsenj mac gatôm su whinj. Atöc lau dom, magoc atöc Anötö ma asôc inj ñapu. Bu

mba, goc in̄ gitôm bu kêñ mac ñamlic ti gatôm lu-lu sêsip lambwam sêndi e sêñinga gacgen̄.

²⁹ “Akôc gauc pi mbac kecsoc nan̄ lau sêlic bu gêñ ñambwa. Tigen̄ Anötö gêlic gêñ saun̄ dinan̄ bu gêñ ñambwa dom, ma in̄ bu lôc dom, dec dan̄ oc niñga dom.

³⁰⁻³¹ Bocdinan̄ ahêgo daôm dom, bu Anötö tac whin̄ mac hôc gêlêc mbac kecsoc daêsam su. In̄ kêyalê mac e pi sa, gitôm in̄ sê mac nem kêclaun̄ hon̄ sa timala.”

Dasêc Yisu ahuc dom
(Luk 12:8-9)

³² “Asa nan̄ sôm asê yêc ñamalac an̄gô-ñga bu in̄ kêñ whin̄ aö, nan̄ aö wasôm in̄ ndê ñaê asê yêc Daman̄ undambê-ñga an̄gô-ñga.

³³ Tigen̄ asa nan̄ sêc in̄ ndê kêñ whin̄ aö-ñga ahuc yêc ñamalac an̄gô-ñga, nan̄ wasêc in̄ ahuc yêc Daman̄ an̄gô-ñga bocdinan̄.”

Tañkuc Yisu ti dahôc ñawapac
(Luk 12:49-53; 14:26-27; 9:48)

³⁴ “Gauc nem bu aö gameñ bu wahê wamba lau dom. Mba! Tu aö-ñga dec lau oc sêwhê dau kôc ma sêkêñ kisa dau.

³⁵ Tu aö-ñga dec damba lu atun̄gac oc sêkêñ kisa dau, ma dinda lu atuwê, ma lawawê akwa lu lawawê wakuc oc sêkêñ kisa dau bocdinan̄.

³⁶ Ngac dan̄ oc tap in̄ ndê ñacyo sa yêc in̄ dau ndê lau.

³⁷ “Asa nan̄ tac whin̄ damba me dinda me atun̄gac me atuwê hôc gêlêc in̄ ndê atac whin̄ aö su, nan̄ oc tôm dom bu ti aneñ dan̄.

³⁸ Ma asa nanj tec bu hôc inj ndê a gicso dau* ma ênkuc aö, nanj tòm dom bu ti anej danj bocdinañ.

³⁹ Lau nanj takwê gêñ nom-nga napanj tu puc ñac si ñamlic dôñ-nga, nanj oc sêñinga. Magoc asa nanj bu hu gêñ nom-nga sinj tu aö-nga, nanj oc mbo tali napanj.

⁴⁰ “Lau nanj sêkôc mac sa, nanj gitôm sêkôc aö daunj sa, ma ñac nanj sêkôc aö sa, nanj sêkôc Anötö nanj kêkinj aö gameñ, nanj sa.

⁴¹ Asa nanj toc anej propet danj sa, ma kôc inj sa tu inj ti propet gêm aö anôñ-nga, nanj Anötö oc kêñ ñagêyô ñayham têñ inj gitôm inj kêñ têñ propet dau. Ma asa nanj toc ñamalac gitêñ danj sa, ma kôc inj sa tu anej ñaê-nga, nanj Anötö oc kêñ ñagêyô ñayham têñ inj gitôm inj kêñ têñ ñgac gitêñ dau.

⁴² Ma asa nanj kôm gêñ saunj bocke bu nem lau nanj sênkuc aö, nanj sa, tòm inj kêñ bu ñalhuc têñ ñac sênôm, nanj Anötö oc êñlhiñ inj sinj dom. Inj oc kêñ ñagêyô ñayham têñ inj yomandô.”

11

¹ Yom honj dinañ Yisu sôm têñ inj ndê ñgacsêñomi 12 tu êndôhônj ñac-nga. Inj gic bata yom dau, goc kêselêñ golom-golom malac nanj sêyêc gameñ Galili-nga dinañ, ma gêm mêtê ti kêdôhônj lau.

*Yisu sôm yom pi Jon, Ngac Kêku Lau-nga
(Luk 7:18-35)*

² Têñ ndoc dinañ Jon, Ngac Kêku Lau-nga ndöc gapocwalô, ma inj ñgô ñawaê pi gêñ honj nanj Kilisi

* **10:38:** Yisu ndê yom pi a gicso dau, nanj ñahu bu tamasañ daunj tòm bêc honj bu dahôc ñandê ti ñawapac tu inj-nga e tòm dambac ndu tòm inj dau mbac ndu.

kôm. Bocdinañ inj kêkinj inj ndê sêñomi ñatô sêtêñ Yisu si,

³ ma sêndac inj bocdec bu, “Anötö gic bata têtñ yac bu oc êñkinj Mesaya. Am daôm dinañ, me yac oc akêñ batañ ñgac dañ tiyham?”

⁴ Yisu ô yom ma sôm, “Ambu andi ma asôm yom têtñ Jon pi mêtê nañ mac añgô aö gahoc asê, ma pi gêñ nañ mac alic aö gakôm.

⁵ Lau tapec sêlic gameñ tiyham, lau bôlinj sêñsêlêñ tiyham, lau ti gêmbac leprasi ñamlic ñawasi sa, lau dañgasuñ bic sêñgô yom, lau batê sêtisa, ma lau ñalôm sawa sêñgô ñawaê ñayham.

⁶ A ñgô! Lau nañ atac lu-lu tu aö-ñga dom, nañ oc sêtap Anötö ndê mwasiñ sa.”

⁷ Jon ndê sêñomi sêsa si, ma Yisu sôm yom pi Jon têtñ lau toñ atu nañ sêmbo sêwhiñ inj. Inj ndac ñac bocdec bu, “Têtñ ndoc mac asa atêñ Jon yêc gameñ sawa a, dec gauc gêm bu atap ñamalac kainj bocke sa? Mac bu alic ñgac gauc babalê gitôm gakoc nañ mbu kêwic, a?

⁸ Mac asa a bu alic ñgac dañ nañ sôc ñakwê ñayham, a? Mba! Lau nañ sêsôc ñakwê ñayham, nañ sêmbo gameñ ñayham gitôm kinj si andu.

⁹ Bocdinañ aö wandac mac, mac asa a bu alic sake? Bu alic propet dañ? Yomandô! Inj propet dañ, ma inj hôc gêlêc propet honj su.

¹⁰ Propet akwa dañ to yom nañ Anötö sôm têtñ Mesaya bocdec bu, ‘Aö *wanñkinj aneñ ñgac aheñ-ñga muñ am, bu êmasañ am nem señ.*’ Y om pi ñgac aheñ-ñga dau hêganônj Jon solop.

¹¹ Yêc ñamalac nom-ñga, dañ hôc gêlêc Jon, Ñgac Kêku Lau-ñga su dom. Tigenj aö wasôm yom ñandô

têñ mac, bu lau honñ nanñ sêmbô Anötö ndê gôliñ ñapu, lau tiwaê, ma lau waêm̄ba boc-dinanñ, nanñ honñ sêhóc gêlêc Jon su yêc Anötö anğô-ñga.

12-13 “Muñ-ñga, Moses ti propet akwa-kwa sêhoc yom asê gwananñ pi Anötö ndê gôliñ. Ma ñac si yom ñandô sa dom, e Jon meñ ma gêm mêtê bu Anötö ndê gôliñ meñ kêpiñ. Têñ ndoc Jon gic hu yom dau e meñ têñ kwahic dec, Anötö ndê gôliñ kêsôwec gi tiatu, ma lau daêsam sêkôm mwasac bu sêsôc Anötö ndê gôliñ ñapu.

14 Anötö gic bata bu êñkinñ propet danñ muñ Mesaya, nanñ gitôm propet Elaija. Ma aô wasôm têñ mac bu yomandô, Jon inñ propet dau dinanñ. Mac akêñ whiñ yom dinanñ, me mba?

15 Mac bu danñamsuñ yêc, nanñ anğô aneñ yom!

16 “Lau têm dindec-ñga ñac lau kainñ bocke? Ñac sêtôm balêkoc nanñ sêkóc whê sêmbô malac lôm, nanñ sêtucdiñ ñac si silip ñatô ma sêsôm,

17 “Têñ ndoc nanñ yac ac oñ bu datê wê, nanñ mac atec. Ma têñ ndoc yac am wê danğibo-ñga, nanñ mac atec bu atanñ awhiñ.’

18 Ma lau têm dindec-ñga bocdinanñ. Jon meñ ma gêñ gêñ ti nôm gêñ ñayham dom, ma sêsôm bu ñalau sac mbo inñ ndê ñalôm.

19 Ma Ñamalac ndê Atu meñ nôm ti gêñ gêñ ñayham, tigenñ sêsôm bu inñ ñgac gêñ gêñ ti nôm wain ñawahô-ñga, ma bu inñ hê silip têñ lau sac ti lau sêkóc takis-ñ ga. Bocdinanñ, mac lau têm dindec-ñga atôm balêkoc nanñ sêkôm tô anñiñ ñapanñ. Tigenñ Anötö ndê gauc hóc gêlêc gêñ honñ, ma inñ ndê lau sêñyalê bu inñ ndê lêñ inñ lêñ solop.”

*Yisu sôm yom pi lau nanj sem dau kwi dom
(Luk 10:13-15)*

²⁰ Têñ dinan Yisu gic hu pu lau nanj sêndöc malac ñatô. Nahu bu inj k ôm gêñ dalô daêsam yêc ñac anjô-nga, tigenj ñac sem si ñalôm kwi dom.

²¹ Inj sôm, “Oyaê mac lau Korasin ti lau Betsaida-nga. Mac ac waê bu atap Anötö ndê atac ñandê sa. Lau apa nanj sêndöc Taya ma Saidon, nanj bu sêlic gêñ dalô nanj aô gakôm yêc mac anjôm-nga, dec oc tôm sênem dau kwi wandêc su, ma sêndöc ti sêtañ si sac.

²² Tigenj mac akôm dom, dec wasôm têñ mac bu têñ ndoc Anötö êmatôc lau-nga, nanj inj oc kênj ñagêyô sac sambuc têñ mac, hóc gêlêc ñagêyô nanj inj oc kênj têñ lau Taya ti Saidon-nga, nanj su.

²³ “Ma mac lau Kapenaom-nga. Mac gauc gêm bu Anötö oc kôc mac sa andöc undambê, a? Aô wasôm mba! Inj oc êmasuc mac su asip lambwam andi. Lau Sodom bu sêlic gêñ dalô gitôm mac alic su, dec oc tôm sêhu si sac sinj ma sêndöc ñayham e kwahic dec.

²⁴ Aô wasôm têñ mac bu Anötö oc kênj ñagêyô sac têñ mac, hóc gêlêc ñagêyô nanj inj oc kênj têñ lau Sodom-nga.”

*Yisu kênj Damba
(Luk 10:21-22)*

²⁵ T êñ ndoc dinan Yisu teñ mbec ma sôm, “O Damanj, undambê ti nom ñadau. Aô wampinj am bu am tôc nem yom ña-ñandô asê têñ lau nanj sêngwininj dau, ma sinj kwi têñ lau nanj gauc gêm bu ñac lau tiguauc ma sêñyalê gêñ hoñ.

²⁶ Aêc, Damanj, am kôm bocdinanj kêkuc am daôm nem atac whinj.”

²⁷ Goc Yisu sôm, “Damañ kêñ gêñ hon sip aö aman. Lau dan sêñyalê Atu dom, Damba tawasê kêyalê in. Ma lau dan sêñyalê Damba dom, tigen in ndê Atu kêyalê in, ma lau nan Atu dau atac whin bu tôc in asê têñ ñac, nan sêñyalê Damba.”

Yisu gêm malô lau kwapac

²⁸ “Mac lau hon nan ahôc ñawapac ma kwapac, nan atêñ aö amen, ma aö wakêñ mac asê awham su.

²⁹ Amen ma akôm aö neñ gwelen awhin aö, ma aö oc wandôhôn mac. Aö ñgac malô ma gatoc daun sa dom, ma mac oc atap malam anwhan daôm-ñga sa yêc aö.

³⁰ Nahu bu gwelen nan mac akôm awhin aö, nan ñadehe dom, ma aö wakêñ mac ahôc ñawapac atu dom.”

12

*Yisu in Pômdau bêc Sabat-ñga
(Mak 2:23-3:6; Luk 6:1-11)*

¹ Têñ têm dinañ ñabêc †Sabat-ñga dan, nan Yisu ti ndê ñgacsêñomi sêñsêlêñ sêmbo lôcwha nan gic ôm wit-ñga dan kic. Ma gêñ yô ñgacsêñomi, dec sêkôc wit ñandô ma señ.

² Lau Palêsai ñatô sêlic, goc sêsôm têñ in, “Lic su nan. Am nem ñgacsêñomi sêkôc wit ñandô ma yomsu gic yao bu dakôm gwelen kain dinañ têñ bêc Sabat-ñga dom.”

³ Goc Yisu ô ñac si yom ma sôm, “Gauc nem yom nan sêto yêc, pi gêñ nan Kin Dawid ti ndê lau sêkôm têñ ndoc gêñ yô ñac. Mac asam su, me?

⁴ Dawid sôc Anötö ndê andu gi, ma kôc bolom dabuñ nan lau sêkêñ ti da, nan Moses kêñ yao bu dabuñsiga tawasê sêneñ, ma lau bambaliñ sêneñ dom. Ma Dawid ti ndê lau señ, magoc lau dan sêngôliñ yom pi Dawid ma sêsôm bu in kêgili yomsu lec dom.

⁵ “Ma gêñ dan tiyham, nan mac asam su yêc Moses ndê yomsu. Têñ bêc Sabat-nga hon dabuñsiga sêkôm gwelen yêc lôm dabuñ, ma gwelen dinañ kêgili yomsu Sabat-nga. Magoc lau sêngôliñ yom pi ñac dom.

⁶ “A ö wasôm têñ mac, bu gwelen nan aö gamen tu wakôm-nga, nan hóc gêlêc sakiñ lôm dabuñ-nga hon su.

⁷ Sêto Anötö ndê yom yêc bocdec, ‘*Gêñ atu nan aö atac whiñ, nan hóc gêlêc mac nem da hon su, nan bu mac tamwalô lau.*’ Mac anyalê yom dau ñahu dom. Mac bu anyalê, dec gitôm dom bu mac anğôliñ yom pi lau nan sêkôm gêñ so dan dom.

⁸ Bu Ñamalac ndê Atu in gêñ hon ñadau, ma in Pômdau bêc Sabat-nga whiñ.”

Yisu kôm ñgac amba balê ñayham sa têñ bêc Sabat-nga

(Mak 3:1-6; Luk 6:6-11)

⁹ Yisu kêsêlêñ gi, ma sôc ñac si lôm wê-nga gi.

¹⁰ Ma yêc dinañ, ñgac amba tibalê dan ndôc. Lau Palêsai sêñsalê yom tu sêngôliñ pi Yisu-nga, goc sêndac in, “Yac bu dakôm ñamalac dan ñamlic ñayham sa têñ bêc Sabat-nga, oc tanğili yomsu Sabat-nga, me mba?”

11 Ma Yisu sôm têtj ñac, “Mac nem domba danj, bu peñ sip sê ñalôm têtj bêc Sabat-ñga, nanj mac oc akôm sake? Mac oc akôc sa.

12 Aêc! Ma ñamalac sêhôtê gêlêc domba su! Boc-dinañ yac bu dakôm ñayham ma danem lau sa têtj bêc Sabat-ñga, oc daso yomsu Sabat-ñga dom.”

13 Goc Yisu sôm têtj ñgac dau, “Êmatôtê amam!” Ma inj kêmatôtê amba, ma amba dau ñayham sa tiyham, gitôm inj amba danja.

14 Tigenj lau Palêsai sêsa si ma sem yomgalôm pi lêtj sêndic Yisu ndu-ñga.

Yisu inj Anötö ndê Ngac Akinj

15 Yisu kêyalê lau Palêsai si gauc, goc hu gameñ dinañ sinj. Lau daêsam sêñkuc inj, ma inj kôm ñac si gêmbac hoñ ñayham sa.

16 Tigenj inj gic yao bu sêsôm inj ñahu asê dom.

17 Ñalêñ dinañ yom nanj propet Aisaya sôm pi Mesaya munj su, nanj ñandô sa. Yom dau sêto yêc bocdec bu:

18 Alic aneñ ñgac akinj dindec, nanj aô kayalinj inj sa. Aô atac whinj inj kêlêc, ma aneñ ñalôm tisambuc inj. Wakêñ aneñ Ñalau nem inj ahuc, ma inj oc hoc yom gitêñ matôtê-ñga asê têtj lau akêñ gameñ nom-ñga hoñ.

19 Inj oc sôm yom tac ñandê-ñga me mbwêc ñanja dom. Ma lau danj oc sêngô inj whasuj yêc malac lôm dom.

20 Gakoc timdec inj oc pôñ dulu dom, ma ya ñawê nanj tisaun, nanj inj oc yu ndu dom.* Ma inj

* **12:20:** Yom pi gakoc timdec ma ya ñawê nanj mbac, nanj hêganônj lau nanj sêkêñ whinj ñanja dom.

oc kôm bocdinaŋ e nditôm in̄ ndê yom gitêŋ matôc-ŋga nem nom sambuc ahuc.

²¹ Ma lau akêŋ gameŋ nom-ŋga hon̄ oc sêkêŋ bata bu Anötö nem ŋac si tu in̄ ndê ŋaê-ŋga. [*Ais 42:1-4*]

*Yisu ndê ŋaclai ŋahu
(Mak 3:23-27; Luk 11:14-22)*

²² Têŋ têm dinaŋ lau sêwê ŋgac daŋ naŋ ŋalau sac kôm in̄ tandô t ipec ma awha mba, naŋ sêtêŋ Yisu sêmeŋ. Yisu soc ŋalau sac dinaŋ su, goc kôm ŋgac dau ŋayham sa, ma in̄ gêlic gameŋ ma sôm yom asê.

²³ Lau hon̄ sêhêdaê tu Yisu-ŋga, ma sêsôm, “Mboe †Dawid ndê Atu in̄ ŋgac dau dec, me?”

²⁴ Tigeŋ lau Palêsai sêŋgô ŋawaê, dec sêpu Yisu ma sêsôm, “In̄ kôc ŋaclai yêc ŋalau sac si ŋadau †Belsebal, dec in̄ soc ŋalau sac su.”

²⁵ Yisu kêyalê ŋac si gauc, ma sôm, “Lau gameŋ daŋ, me malac daŋ, me gôlôwac daŋ, bu sêwhê dau kôc, dec ŋac oc sêlhac ŋaŋga dom, ma ŋac si ŋacyo oc sêku ŋac dulu.

²⁶ Ma Sadaŋ boc-dinaŋ. In̄ bu soc dau ndê ŋalau sac su, dec in̄ kêŋ kisa dau, ma in̄ ndê ŋaclai oc niŋga.

²⁷ “Mac asôm bu aö gakôc ŋaclai yêc Belsebal, dec gasoc ŋalau sac su. Ma bocke? Mac nem sêŋomi naŋ sêsoc ŋalau sac sêwhiŋ, naŋ mac aŋgôliŋ yom dau pi ŋac whiŋ, a? Ŋac oc sêlic mac nem yom bu so ma sêmatôc mac!

²⁸ Tigeŋ aö gasoc ŋalau sac ŋa Ŋalau Dabuŋ ndê ŋaclai, dec aŋyalê bu Anötö ndê ŋaclai bu nem gôliŋ gêŋ hon̄, naŋ hôt asê mac su.

29 “Ngac daŋ oc sôc ngac ti licwalô atu daŋ ndê andu ma êngaho in ndê wapa su ŋalêŋ bocke? Gêŋ ŋamata-ŋga in sô ngac dau dôn, goc kôc in ndê wapa su. Ma Sadaŋ in gitôm ngac ti licwalô atu.

30 “Asa naŋ kalhac whin aô dom, naŋ ti aneŋ ŋacyo. Ma asa naŋ gic lau sa sêteŋ aô sêmeŋ dom, naŋ soc ŋac su yêc aô.

31 Tu dinaŋ-ŋga aô wasôm têŋ mac bu ŋamalac naŋ kac ndê ŋalôm kwi ma hu ndê sac siŋ, naŋ Anötö oc suc in ndê sac ti yom sac-sac hoŋ kwi. Tigeŋ yom sac naŋ ŋamalac daŋ bu sôm pi Nalau Dabuŋ, naŋ Anötö oc suc kwi dom.†

32 Asa naŋ bu sôm yom sac pi Namalac ndê Atu, tigeŋ tiŋambu kac ndê ŋalôm kwi, naŋ Anötö oc suc in ndê sac kwi. Magoc asa naŋ bu sôm yom sac pi Nalau Dabuŋ, naŋ Anötö oc suc in ndê sac kwi têŋ têm dindec-ŋga dom, ma têŋ têm ŋambu-ŋga dom bocdinaŋ.”

Lau si mêtê whê ŋac sa bu ŋayham me sac

(Luk 6:43-45)

33 Ma Yisu sôm, “A ŋayham sem ŋandô ŋayham. Ma a sac sem ŋandô sac. Dalic a ŋandô, dec taŋyalê a bu ŋayham me sac.

34 Mac lau sac atôm mboc ŋatui! Mac atôm bu asôm yom ŋayham daŋ dom! Bu lau sêsôm yom kêkuc gauc ti mêtê naŋ hóc ŋac si ŋalôm ahuc.

35 Gauc ti mêtê ŋayham hóc lau ŋayham si ŋalôm ahuc, dec sêsôm yom ŋayham. Ma gauc ti mêtê sac hóc lau sac si ŋalôm ahuc, dec sêsôm yom sac.

† **12:31:** Lau Palêsai sêsôm bu Yisu kôc ŋaclai yêc Sadaŋ ndê ma soc ŋalau sac su, ma Yisu tôc asê bu yom dau gitôm yom sac sambuc naŋ sêsôm pi Nalau Dabuŋ.

³⁶ Aö wasôm yom ñandô têt mac. Tiñambu Anötö oc êmatôc lau pi yom sac ti yom ñambwa hon ñañ ñac sêsôm.

³⁷ Lau ñañ si yom ñayham, ñañ in oc sam ñac bu lau gitêt, magoc ñac ñañ si yom sac, ñañ oc sêtap in ndê matôc sa.”

Lau sêndac Yisu bu kôm gêt dalô
(Luk 11:29-32)

³⁸ Goc lau Palêsai ti kêdôhôn-waga yomsu-nga ñatô sêsôm têt Yisu, “Kêdôhôn-waga, yac bu alic am kôm gêt dalô atu bu whê nem ñahu sa.”

³⁹ Ma Yisu sôm, “Mac lau têt dindec-nga, mac lau sac ñañ apuc dômwêm Anötö, ma asa nem lêt bambalin gitôm lau mockain-nga. Mac andac bu alic gêt dalô, magoc Anötö oc kêt gêt dalô tigen têt mac alic, tôm gêt dalô ñañ in kôm pi propet Jona.

⁴⁰ Jona mbo i atu ñalôm gitôm acsalô tö ti ôbwêc tö. Ma bocdinañ Ñamalac ndê Atu oc yêc nom ñalôm nditôm acsalô tö ti ôbwêc tö.

⁴¹ Têt ndoc Jona gêm mêtê lau Ninewa, ñañ sêcac si ñalôm kwi. Ma ñgac ñañ hêc gêtêc Jona su dec mbo, tigen mac am daôm kwi dom. Tu dinañ-nga têt bêc matôc-nga, lau Ninewa oc sêtisa akêt lau batê sêwhin mac lau têt dindec-nga, ma ñac oc sêhoc mac nem sac asê.

⁴² Munnga, Kwin Siba-nga‡ kêsêlêt señ balin bu ngô Kin Solomon ndê yom ti gauc atu. Ma kwahic dec ñgac ñañ hêc gêtêc Solomon su, ñañ mbo dec.

‡ **12:42:** Matyu to yom pi Kwin akêt gameñ ñapu-nga (South). Yom dau hêganôn Kwin Siba-nga, ñañ ndê min sêto yêc 1 Kin 10:1-13. Kwahic dec dasam gameñ Siba-nga bu ‘Arabia.’

Magoc mac akêñ danam in dom. Tu dinañ-nga, têtñ bêc matôc-nga, Kwin dau oc tisa whiñ mac lau têtñ dindec-nga, ma hoc mac nem sac asê.”

*Nalau sac sêñsalê mala nan yêc ñambwa
(Luk 11:24-26)*

⁴³ “Têtñ ndoc ñalau sac dan sa yêc ñamalac dan, nan gitôm in kêgihi mbo gameñ sawa ma kêsalê mala êñwhañ dau-nga. Tigen têtñ ndoc in tap sa dom,

⁴⁴ nan in oc sôm têtñ dau, ‘Aö wambu wandi wasôc andu nan aö gahu siñ su.’ Ma in oc mbu ndi ma tap sa bu ñamalac dau ndê ñalôm yêc ñambwa, gitôm andu nan sêmasañ ñawasi sa.

⁴⁵ Dec in oc sa ndi, wê ñ alau 7 nan sac sambuc sêhóc gêlêc in su, nan sêmeñ, ma hoñ sêsôc ñamalac dau ndê ñalôm sêndi, ma sêmbo dinañ. Bocdinañ ñawapac nan tap ñamalac dau sa, nan hóc gêlêc ñawapac ñamata-nga-nga su. Ma ñalêñ tigen mac lau sac têtñ dindec-nga, oc atap ñawapac atu sa têtñ têtñ ñambu-nga.”

*Yisu dinda ti asii
(Mak 3:31-35; Luk 8:19-21)*

⁴⁶ Lau daêsam sêmbo andu dan sêwhiñ Yisu têtñ ndoc in sôm yom dinañ mbo, ma in dinda ti asii sêmeñ sêlhac awê, ma bu sêsôm yom têtñ in.

⁴⁷ Goc ñamalac dan kêñ ñawaê têtñ in ma sôm, “Am dinam ti asimi sêlhac awê ma bu sêsôm yom têtñ am.”

⁴⁸ Magoc Yisu ô yom ma sôm, “Aneñ dinañ asa, ma asiñi ñac lau asa?”

⁴⁹ Goc in tôc amba têtñ ndê ñgacsêñjomi, ma sôm, “Aö dinañ ti asiñi dau dindec.

50 Bu lau nanj danja wambu Damanj undambê-
nnga ndê yom, nanj njac aö asinji ti lhuñwêi ma di-
nanji.”

13

*Yom gôlinj pi njac kêbalip wit njawhê
(Mak 4:1-9; Luk 8:4-8)*

¹ Têñ béc dinanj Yisu hu andu sinj ma sa gi ndöc
Bugictonj Galili-nnga njamakê.

² Ma lau daêsam sêkac sa sênghihi inj ahuc e njasawa
mbasi. Tu dinanj-nnga dec inj pi gi ndöc wanj danj nanj
poc kêpiñ baö. Ma lau honj dinanj sêlhac baö.

³ Goc Yisu sôm yom gôlinj daêsam têñ njac. Inj
sôm yom gôlinj danj bocdec bu, “Njgac danj sa gi bu
êmbalip wit njawhê yêc inj ndê ôm.

⁴ Ma têñ ndoc inj kêbalip gêñ dau, nanj njatô sêpeñ
sêsip señ, dec mbac sêmeñ ma señ su.

⁵ Ma njawhê njatô sêpeñ sêsip gameñ hoc-hoc, nanj
nom njagec sac hoc njahó njambwa. Njawhê dau sêsip
nom njalôm gacgeñ si dom, dec sêpo sêpi sêmeñ
njagahô.

⁶ Magoc tinjambu ac pec njagatôm ma gêm bôlinj.
Njahu bu nom njayham mba tu njawakac sip ndi-nnga.

⁷ Ma wit njawhê njatô sêpeñ sêsip kwanj ti njakwa
njalôm, magoc têñ ndoc sêpo sêpi sêmeñ, nanj kwanj
pi whinj e yanj ndu.

⁸ Ma njatô sêpeñ sêsip nom njayham ma sêpo sêpi
njayham e sem njandô. Njatô sem njandô 30, ma njatô
sem 60 ma njatô sem njandô 100.

⁹ Asa bu danjasunj yêc, nanj njgô aneñ yom.”

*Yom gôlinj njahu
(Mak 4:10-12; Luk 8:9-10)*

10 Tinjambu Yisu ndê ngac-sêñomi sêtigasuc inj ma sêndac, “Tu sake-nga am sôm yom têtj lau ña yom gôlinj?”

11 Ma inj ô yom ma sôm, “Anötö ndê gôlinj ñalêtj ñahu sip ñalôm gi. Inj kêyalinj mac sa bu añyalê ñahu ðau, magoc lau nanj sêkêtj whinj aö dom, nanj oc tôm dom bu sêñyalê.

12 Asa nanj kôc Anötö ndê yom sa sip ndê ñalôm e tidônj, nanj Anötö oc kêñ gauc têtj inj êñlêc, e inj êñyalê yom dau timala eñ. Magoc asa nanj yom dau tidônj inj dom, nanj Anötö oc kôc gêtj honj su yêc inj.

13 Tu dinanj-nga aö wasôm yom têtj lau ña yom gôlinj. Nac sêlic gêtj ñapanj, tigenj ñac si gauc sa dom, ma ñac sêñgô yom ñapanj, tigenj ñac sêñyalê ñahu dom.

14 Yom nanj propet Aisaya hoc asê munj su, nanj dec ñandô sa. Yom dau yêc bocdec bu:

Ñac sêñgô anenj yom ñapanj, magoc sêñyalê ñahu dom. Ma sêlic gêtj nanj aö gakôm nanj ñapanj, tigenj ñac si gauc sa dom.

15 Lau dau si ñalôm ñadandi. Nac si ðangasunj hôc ahuc, ma ñac sêpôc si tandô ahuc. Bu bocdinanj dom, dec oc tôm bu tandô sêlic ma ðangasunj sêñgô, ma sêñyalê aö tidônj yêc ñac si ñalôm e sênem dau kwi, ma aö wakôm ñac ñayham sa.”

[Ais 6:9-10]

16 Ma Yisu sôm têtj ngacsêñomi, “Aö wampinj mac nem tanôm ti ðanjamsunj, bu mac alic gêtj atu-tu nanj aö gakôm, ti anjgô anenj yom.

17 Aö wasôm yom ñandô têtj mac bu propet ti lau gitêtj ðaêsam nanj sêmbô munj su, nanj sêkêtj bata bu sêlic gêtj nanj mac alic su, magoc sêlic dom. Ma

sêkêñ bata bu sêngô yom nanj mac anjô su, tigenj sêngô dom.”

*Yisu whê yom gôlinj wit ñawhê-ñga ñahu sa
(Mak 4:13-20; Luk 8:11-15)*

¹⁸ Ma Yisu sôm, “Dec akêñ danjam ma wawhê yom gôlinj ñgac kêbalip wit ñawhê-ñga sa.

¹⁹ Yom pi ñawhê nanj sêpenj sêsip senj, nanj hêganônj lau nanj sêngô yom pi Anötö ndê gôlinj, magoc sênyalê ñahu dom. Bocdinañ Sadanñ dau menj kêgaho yom dau su yêc ñac si ñalôm.

²⁰ Ma yom pi ñawhê nanj sêpenj sêsip gamenj hoc-hoc, nanj hêganônj lau nanj sêngô Anötö ndê yom, ma sêkôc sa ñagahô ma ti atac ñayham.

²¹ Magoc tôm ñawhê dinañ ñawakac sip gi dom, nanj yom dau tidônj yêc lau dinañ si ñalôm dom. Sêlhac ñasawa saunj, tigenj têñ ndoc sêtap ñawapac sa me lau sêkêñ kisa ñac tu Anötö ndê yom-ñga, nanj sêhu si sêkêñ whinñ sinñ ñagahô enj.

²² Ma yom pi ñawhê nanj sêpenj sêsip kwanj ti ñakwa ñalôm, nanj hêganônj lau nanj sêngô Anötö ndê yom, magoc yom dau gêm ñandô yêc ñac si ñalôm dom. Ñahu bu ñac sêhêgo dau pi gêñ nom-ñga ñapanj, ma sêsa lêñ atac whinñ mone-ñga e gêñ kainñ dinañ kôm Anötö ndê yom ahuc.

²³ Ma yom pi ñawhê nanj sêpenj sêsip nom ñayham ma sem ñandô 30, me 60, me 100, nanj hêganônj lau nanj sêngô yom ma sênyalê ñahu, ma sem ñandô daêsam.”

Yom gôlinj pi wahô

²⁴ Yisu sôm yom gôlinj danj tiyham bocdec bu, “Aö bu wawhê Anötö ndê gôlinj sa ñalêñ bocdec. Ngac danj kêbalip wit ñawhê ñayham sip ndê ôm.

²⁵ Magoc têtj ndoc lau sêyêc bêc, nanj inj ndê njacyo meñ, ma kêbalip wahô njawhê sip ôm dau whinj wit njawhê njayham, goc kôlhô gi.

²⁶ Tinjambu wit njawhê po pi meñ, ma têtj ndoc njandô sa, nanj lau sêlic bu wahô pi meñ whinj.

²⁷ Goc ôm njadau ndê lau akiñ sêtêtj inj si ma sêsôm, ‘Njadau, yac alic bu am kêbalip njawhê njayham sip nem ôm. Magoc wahô dec meñ akêtj nde?’

²⁸ Ma inj ô yom ma sôm, ‘Nacyo danj kôm gêtj dau.’ Ma sêndac inj, ‘Am tac whinj bu yac asa andi ayê wahô dau sa, me?’

²⁹ Ma inj sôm, ‘Mba! Bu mboe mac ayê wahô ma apuc wit sa whinj.

³⁰ Atec lu-lu sêlhac sêwhinj dau ma sêtiatu e ndoc sêndic gêtj njandô sa-nja. Têtj dinanj aô oc wasôm têtj lau sêndic gêtj njandô sa-nja bu sêndic wahô sa munj, goc sêkic dôñ ma sêkêtj pi ya ndi. Ma tinjambu sêndic wit njandô sa pi anej andu gêtj njandô-nja.’ ”

*Yom gôlinj pi gêtj njawhê sauj
(Mak 4:31-32; Luk 13:18-19)*

³¹ Ma inj sôm yom gôlinj danj têtj njac bocdec, “Anötö ndê gôlinj gitôm a soc njawhê, nanj njac danj sô sip inj ndê ôm.

³² Njawhê dau inj gêtj sauj-têc, tigenj tinjambu oc po pi meñ e ti a atu hôc gêlêc gêtj ôm-nja honj, ma mbac lôlôc-nja oc sêmenj sêhê si njac yêc njasanjac.”

*Yom gôlinj pi yist
(Luk 13:20-21)*

³³ Ma inj sôm yom gôlinj danj tiyham bocdec, “Anötö ndê gôlinj gitôm yist, nanj awhê danj kêtj sip plawa lôñ atu danj ma kêgaluj e kôm plawa honj suñ.”

*Yisu sôm yom gôlinj daêsam
(Mak 4:33-34)*

³⁴ Yom hoŋ naŋ Yisu sôm têtj lau toŋ atu dinaŋ, naŋ inj sôm ŋa yom gôlinj ŋambwa. Ma inj sôm yom ŋalêtj daŋ dom.

³⁵ Ma boc-dinaŋ propet ndê yom bocdec ŋandô sa:

Aô wasôm aneŋ yom ŋa yom gôlinj, ma gêtj naŋ yêc siŋ dau têtj têtj Anötö kêtj undambê ti nom e meŋ, naŋ kwahic dec wasôm asê. [BW 78:2]

Yom gôlinj wahô-ŋga ŋahu

³⁶ Goc Yisu hu lau hoŋ siŋ ma sôc andu gi. Ma inj ndê ŋgacsêŋomi sêtêtj inj si ma sêndac, “Gitôm bu am whê yom gôlinj wahô-ŋga ŋahu sa têtj yac?”

³⁷ Ma Yisu sôm, “Ŋgac naŋ kêbalip ŋawhê ŋayham, naŋ ŋamalac ndê Atu.

³⁸ Ma inj ndê ôm, naŋ nom sambuc lec. Yom pi ŋawhê ŋayham hêganônj lau naŋ sêmbo Anötö ndê gôlinj ŋapu, ma wahô hêganônj ŋalau sac si ŋadau ndê lau.

³⁹ Ma ŋacyo naŋ kêbalip wahô ŋawhê, naŋ Sadaŋ dau. Ndoc sêndic gêtj ŋandô sa-ŋga, naŋ tôm bêc ŋambu-ŋga, ma lau sêndic gêtj ŋandô sa-ŋga, naŋ Anötö ndê aŋela.

⁴⁰ Têtj bêc ŋambu-ŋga, lau sac oc sêsip ya atu ŋalôm sêndi, ŋalêtj tigenj tôm wahô naŋ lau sic sa ma sêkêtj pi ya gi.

⁴¹ ŋamalac ndê Atu oc êŋkiŋ ndê aŋela, ma ŋac oc sêkôc gêtj lêtôm-ŋga ti lau hoŋ naŋ sêkôm sac, naŋ su yêc Anötö ndê lau.

⁴² Ma ŋac oc sêmbaliŋ ŋac sêsip ya atu ŋalôm sêndi, ma ŋac oc sêtaŋ atu ti lhô êŋsiŋ pi dau.

⁴³ Têḅ dinanḅ lau gitêḅ si ḅawasi ti ḅawê oc pô gamenḅ gitôm ac, yêc ḅac si Damba ndê gamenḅ undambê-ḅga. Mac bu danḅamsuḅ yêc, nanḅ anḅgô anenḅ yom.”

Yom gôliḅ lu pi Anötö ndê gôliḅ

⁴⁴ “Anötö ndê gôliḅ ḅamwasinḅ gitôm awa ḅayham andô danḅ nanḅ yêc sinḅ dau yêc nom danḅ ḅalôm. ḅamalac nanḅ tap awa dau sa, nanḅ oc sinḅ kwi tiyham, ma lhô ndi ti atac ḅayham atu ma kêḅ ndê gêḅ hoḅ têḅ lau sênemlhi, goc nemlhi nom dinanḅ bu kôc awa dau sa.

⁴⁵⁻⁴⁶ “Ma Anötö ndê gôliḅ ḅamwasinḅ gitôm yac ḅapa ḅaôli atu. Ngac tidulu gêḅ-ḅga nanḅ kêsalê yac ḅapa ḅayham tu êmasanḅ gôlôn-ḅga, nanḅ bu tap yac ḅapa ḅayham andô dau sa, dec inḅ oc lhô ndi ma kêḅ ndê gêḅ hoḅ têḅ lau sênemlhi, goc nemlhi yac ḅayham dau.”

Yom gôliḅ pi wasanḅ

⁴⁷⁻⁴⁸ “M a yom gôliḅ danḅ tiyham. ḅalêḅ nanḅ Anötö kêgalêm lau sa bu s êmbo inḅ ndê gôliḅ ḅapu, nanḅ gitôm wasanḅ nanḅ lau sêkêḅ sip gwêc, ma i tidau-tidau sêsip wasanḅ dau si e menḅhu. Goc lau sêhê sa pi baô gi. Ma sêndôc sic ma sêḅyalinḅ i ḅayham-ḅayham sa sip dalu, ma i sac-sac, nanḅ sêmbalinḅ sinḅga.

⁴⁹ Ma ḅalêḅ tigenḅ têḅ bêc ḅambu-ḅga, anḅela oc sêmenḅ ma sêwhê lau sac ti lau gitêḅ kôc.

⁵⁰ ḅac oc sêmbalinḅ lau sac sêsip ya atu ḅalôm sêndi, ma ḅac oc sêtanḅ ti lhô êḅsinḅ pi dau.”

Awa akwa ma awa wakuc

51 Yisu gic bata yom dinan, goc ndac in ndê ngacsêñomi, “Mac anjalê aneñ yom hon dindac nahu, me mba?” Ma sêlôc, “Aêc.”

52 Goc in sôm têtñ nac, “Kêdôhônwaga yomsu-nga nan sêñyalê Anötö ndê gôlin nahu tidôn whin, nan sêtôm bu sêwhê yom akwa sa têtñ lau, ma yom wakuc whin. Ma bocdinan nac sêtôm andu nadau dan nan gic awa daêsam sa, dec tôc awa akwa ti awa wakuc asê têtñ lau.”

*Yisu ndê lau sêkôc in sa dom
(Mak 6:1-6; Luk 4:16-30)*

53 Yisu sôm yom gôlin hon dinan pacndê, goc hu gameñ dinan sin.

54 In mbu têtñ in ndê malachu gi, ma kêdôhôn lau mbo nac si lôm wê-nga. Dec nac sêhêdaê ma sêndac dandi, “Ei! Gac nayham ti naclai bu kôm gêtñ dalô atu-tu, nan nac dec tap sa yêc nde?”

55 In k apenta ndê atu! In dinda in Maria, ma in asii Jems, Josep, Saimon, ma Judas.

56 Ma in ndê lhuwêi sêmbo sêwhin yac. Bocdinan gêtñ hon dindac in kôc sa yêc nde?”

57 Ma nac atac lu-lu tu in-nga. Magoc Yisu sôm têtñ nac, “Lau hon sêtoc propet dan sa, tigen yêc propet dau ndê malachu, in dau ndê lau sêtoc in sa dom.”

58 Ma tu nac sêkêtñ whin in dom-nga, dec in kôm gêtñ dalô atu-tu daêsam yêc nac si gameñ dom.

14

*Herod Antipas ngô nawae pi Yisu
(Mak 6:14-16; Luk 9:7-9)*

¹ Têtñ ndoc dinan †Herod, nan gêm gôlin gameñ Galili-nga, nan ngô nawae pi Yisu.

²Ma in sôm têt in ndê lau akin bu, “Ngac dê mboe Jon, Ngac Kêku Lau-nga nan tisa akêt lau batê-nga. Ma tu dinan-nga in kôc ñaclai bu kôm gêt dalô atu-tu dinan.”

*Herod gic Jon, Ngac Kêku Lau-nga ndu ñamin
(Mak 6:17-29)*

³⁻⁴Mun-nga, Herod gêm in ndê asi Pilip ndê awhê Herodias ti ndê awhê, dec Jon sôm têt in, “Am kôm gêt so sambuc.” Tu dinan-nga Herod kêkin ndê lau bu sêkôc Jon dôn ma sêkêt in ndôc gapocwalô.

⁵Herod tac whin bu ndic Jon ndu, tigen in töt lau daêsam nan sêlic Jon bu propet dan.

⁶Têt ndoc dan sêndê mwasin tu Herod ndê bêc dinda kôc in-nga, ma Herodias atuwê tê wê yêc mwasin dau ñalôm. Herod gêlic ma tac ñayham atu,

⁷dec in kêmatin yom têt in ma sôm, “Yomandô aö wasôm têt am. Gêt bocke am bu tac whin nan sôm, ma aö oc wakêt têt am.”

⁸Goc bawhê dau sa gi gêlic dinda Herodias. In dinda tec Jon, dec sôm têt bawhê bu ndac Herod bocdec bu, “Aö tac whin bu am tim Jon, Ngac Kêku Lau-nga ndê kachu kic, ma kêt in ndê ñagôlôn sip pele dan ma kêt têt aö, bu walic pi tanôn bu in mbac ndu ñandô.”

⁹Têt ndoc Herod ñgô yom dinan, in ndê ñalôm ñawapac atu. Tigen tu in kêmatin yom yêc lau hon anğô-nga, dec in sôm têt in ndê lau sin-nga bu sêkôm tôm bawhê dau teñ.

¹⁰In kêkin ñac sêsôc gapoc-walô si, ma sêtim Jon ndê kachu kic.

11 Ma sêkêñ ñagôlôn sip pele dan, ma sêkôc sêmen ma sêkêñ têt bawhê. Goc bawhê dau kôc sa gi kêt têt dinda gêlic.

12 Tinambu Jon ndê sêñomi sêmen sêkôc in ñamlan sa ma si sêñsuhun. Goc sêtêt Yisu si ma sic min têt in.

Yisu gôlôm lau 5,000

(Mak 6:32-44; Luk 9:10-17; Jon 6:1-15)

13 Têt ndoc Yisu ngô ñawaê pi Jon, nan in pi wan dan gi bu pi bugicton ñadanga, ma lhô têt gamen sawa dan ndi ma mbo tawasê. Magoc lau malac-nga sêngô ñawaê bu in pi wan dau gi, ma daêsam sêwê sêmbo baö ma sêñkuc in.

14 Têt ndoc Yisu sôc baö gi, nan gêlic lau daêsam dinan ma tawalô ñac. Ma in kôm ñac si gêmbac ñayham sa.

15 Têt telha, kêpin bu ac ndi sip, goc ñgacsêñomi sêtêt in sêmen ma sêsôm, “Gamen dec gamen sawa, ma ac gi su. Kêt lau sêlhô sêtêt malac sêndi bu sênemlhi si gêt sênen-nga.”

16 Magoc Yisu sôm, “Mba! Oc tôm bu sênen gêt yêc dec. Mac daôm akêt gêt têt ñac sênen.”

17 Ma sêsôm, “Yac oc akôm ñalêt nde, bu yac mba bolom amandan ma i lu solop dec yêc.”

18 Goc in sôm, “Akôc gêt dau sa amen.”

19 Ma in sôm têt lau bu sêndôc sic sêndôc kwan. In kôc bolom amandan ma i lu, tatak undambê goc gêm mbec ma pô bolom kôc-kôc. Ma in kêt têt ñgacsêñomi, ma sic sam têt lau.

20 Ñac hon señ gitôm, ma ñgac-sêñomi sic gêt ñadêlê sa sip gatop 12 e menhu.

21 Lau nanj seŋ gêŋ dau, nanj si launƣac ŋanamba gitôm 5,000. Ma lauwhê ti balêkoc daêsam sêmbo sêwhiŋ.

*Yisu kêsêlêŋ mbo bu ŋahô
(Mak 6:45-52; Jon 6:16-21)*

22 Dinaŋ su, goc Yisu kêkiŋ ndê ŋgacsêŋomi sêpi waŋ bu sêmuŋ iŋ sêmbu sêpi bugictonj ŋadaŋga sêndi. Ma iŋ dau gacgeŋ mbo, bu kêŋ lau sêlhô sêndi.

23 Sêlhô si su, goc iŋ pi lôc tawasê gi bu teŋ mbec. Njasec sa, ma iŋ tawasê mbo.

24 Magoc waŋ dau sa awê tibaliŋ gi su, ma mbu ŋadinda gêli bu sa e gic sip waŋ.

25 Têŋ ôbwêc lôm, Yisu kêsêlêŋ mbo bu ŋahô têŋ ŋac gi.

26 Magoc têŋ ndoc ŋgacsêŋomi sêlic iŋ kêsêlêŋ mbo bu ŋahô, nanj sêtöc dau ti sêmbwêc, ma sêsôm, “Êê! Njalau danj!”

27 Goc Yisu sôm têŋ ŋac, “Atöc daôm dom! Njalôm pêŋ dôŋ, bu aö dauŋ dec.”

28 Goc Pita sôm, “Pômdu, bu am daôm dinaŋ, nanj goc sôm aö waŋsêlêŋ wambo bu ŋahô watêŋ am waloc.”

29 Ma Yisu sôm, “Mwenj!” Goc Pita sip yêc waŋ, ma kêsêlêŋ mbo bu ŋahô têŋ iŋ gi.

30 Magoc mbu ŋadinda kôm iŋ töc dau atu ma iŋ kwê bu solonj tigeŋ. Goc iŋ mbwêc, “Pômdu, nem aö sa!”

31 Njagahô Yisu kêmatöc amba gi, hê iŋ sa ma sôm, “O am ŋac kêŋ whiŋ babalê-ŋga. Bocke ma am atac lu-lu tu aneŋ ŋaclai-ŋga?”

32 Goc iŋlu sêpi waŋ si, ma mbu timalô.

³³ Ma ngacsêñjomi nanj sêndöc wanj sêpônj haduc ma sêmpinj inj ma sêsôm, “Yomandô, am Anötö ndê Atu!”

*Yisu gêm lau gêmbac sa yêc malac Genesaret
(Mak 6:53-56; Jon 6:22-25)*

³⁴ Sêlac wanj si e sêsôc baö yêc malac Genesaret.

³⁵ Ma têtj ndoc lau malac-nga sêlic bu Yisu meñ, nanj sêkêñj ñawaê têtj gamenj ñamakê-nga honj, ma lau sêkôc si lau gêmbac honj sa sêtêtj inj sêmeñ.

³⁶ Ñac sêteñj bu sêmasec inj ndê ñakwê ñadali ñambwa, ma lau honj nanj sêmasec inj, nanj ñayham sa.

15

*Gêñ nanj kôm ñamalac ñadômbwi sa yêc Anötö anjô-
ñga
(Mak 7:1-23)*

¹ Têtj dinanj lau Palêsai ti kêdôhônjwaga yomsu-nga ñatô sêmeñ akêñj Jerusalem sêtêtj Yisu si, ma sêndac inj,

² “Tu sake-nga am nem ngacsêñjomi sêkôm ñagôlinj nanj lau andô sic dulu têtj yac, nanj popoc? Têtj ndoc sêneñ gêtj, nanj sêtjngwasinj amba muñ su dom.”

³ Ma Yisu ô ñac si yom bocdec bu, “Ma bocke? Tu sake-nga mac atoc lau andô si ñagôlinj sa ma akôm Anötö ndê yomsu popoc?”

⁴ Anötö dau sôm, ‘*Toc damam lu dinam sa,*’ ma inj sôm tiyham bu, ‘*Asa nanj sôm yom sac pi inj damba me dinda, nanj oc sêndic inj ndu.*’

⁵ Tigeñ mac anjuc yomsu dau dom. Ngac danj ndê awa me gêtj bu yêc bu nem damba lu dinda sa, magoc inj sôm têtj injlu, ‘Oc tôm dom bu wanem amlu sa, bu gêtj dindac aö wakêñj ti da têtj Anötö,’

⁶ goc mac alic ñayham bu inñ toc damba sa dom. Bocdinañ mac asenñ Anötö ndê yom nañ sôm bu atoc damam lu dinam sa, nañ popoc, tu bu anñkuc lau andô si ñagôlinñ.

⁷ Mac lau atim yom lau-ñga! Yom nañ propet Aisaya hoc asê munñ su, nañ hêganônñ mac solop. Inñ sôm bu,

⁸ *‘Lau dindec sêtoc aö sa ña whasunñ ñambwa, tigenñ ñac si ñalôm yêc danñ dau-ñga.*

⁹ *Ñac sem akiñ aö ñandô dom, ma yom nañ sêndôhônñ têtñ lau, nañ ñamalac si yomsu ñambwa.’ ”*

¹⁰ Goc Yisu ta lau honñ ma sôm, “Anğô ma anñyalê ñapep.

¹¹ Gêñ danenñ-ñga nañ sip ñamalac whasunñ, nañ kôm ñac ñadômbwi sa yêc Anötö anğô-ñga dom. Tigenñ yom nañ sa akêñ ñamalac whasunñ, nañ kôm ñac ñadômbwi sa.”

¹² Têtñ dinañ Yisu ndê ñgacsêñjomi sêtigasuc inñ ma sêsôm têtñ inñ, “Lau Palêsai sêngô am nem yom dinañ, dec kôm ñac sêlic sac. Am kêyalê, me mba?”

¹³⁻¹⁴ Goc inñ sôm têtñ ñac, “Ahêgo daôm tu ñac-ñga dom! Atec ñac. Lau honñ nañ danğga wambu Damañ undambê-ñga ndê yom dom, nañ sêtôm wahô nañ inñ oc puc sa ti ñawakac. Ñac bu sêtôc senñ têtñ lau ñatô, magoc ñac tandô pec. Ma ñgac tapec danñ bu wê tapec danñ, inñ lu-lu oc sêpenñ sêsip sê.”

¹⁵ Dec Pita sôm, “Gitôm bu am whê yom gôlinñ dinañ ñahu sa têtñ yac?”

¹⁶ Goc Yisu ndac, “Ma bocke? Têtñ nde mac oc anñyalê?

¹⁷ Alic! Gêñ nañ sip ñamalac whasunñ, nañ sip inñ ñatac ñalôm gi, ma tinñambu sa menñ tiyham.

18 Tigen yom sac nan sa namalac whasun, nan sa akên in ndê nalom, ma sac nan yêc namalac nalom, dec kôm in nadombwi sa yêc Anötö ango-nga.

19 Gauc sac, mêtê sêndic namalac ndu-nga, mêtê mockain-nga nan lau nan sem dau sa su, ma lau nan sem dau sa su dom, nan sêkôm, mêtê sênem kan gên-nga, yom tasan, ma yom sêpu lau-nga,

20 nan yêc namalac nalom, nan kôm nac nadombwi sa. Tigen yac bu tanwasin aman dom ma danen gên, dec oc kôm yac nadombwi sa yêc Anötö ango-nga dom.”

*Awhê Kanan-nga kên whin nannga
(Mak 7:24-30)*

21 Yisu hu malac dinan sin, ma in ti ndê ngacsênomi sêtên malac Taya ma Saidon nagamen namakê-nga si.

22 Ma awhê Kanan-nga dan, nan ndöc gamen dinan, nan tên in men ma mbwêc, “O Pômdau, †Dawid ndê Atu, tamwalô aö. Nalau sac kên nawapac atu tên aö atunwê, ma kôm in tisac.”

23 Yisu gêm dôn ma ô yom dan dom, goc ngacsênomi sêtigasuc in ma sêsôm, “Kên in lhö ndi, bu in kékuc yac ma mbwêc yom napan.”

24 Ma in sôm, “Awhê dau in awhê Israel-nga dom. Anötö kêkin aö bu wanem lau Israel-nga sa, bu nac sêtôm domba nan sin ga su.”

25 Tên dinan awhê dau men pôn haduc tên in ma ndac tiyham, “Pômdau, nem aö sa.”

26 Ma Yisu sôm, “Solop dom bu dakôc balêkoc si gên danen-nga su ma tambalin tên giam sênen.”

27 Magoc awhê dau ô yom ma sôm, “Aêc Pômdau, tigen giam nanj sêndöc ñadau ndê tebo ñapu, nanj senj gêñ ñapopoc nanj penj yêc tebo.”

28 Yisu ñgô yom dinañ ma sôm, “O awhê, am kêñ whiñ ñaŋga. Aö oc wakôm tôm am ndac.” Ma têtñ acgatu ñasawa dau dinañ, awhê dau ndê atuwê ñayham sa.

*Yisu gôlôm lau 4,000
(Mak 8:1-10)*

29 Yisu kölhö gi ma kêsêlêñ whiñ ndê ñgacsêñomi mbo Bugictonj Galili-ñga ñamakê. Goc inj pi lôc danj gi ma ndöc sic.

30 Ma lau daêsam sêwê sêtêñ inj sêmeñ. Ñac sêkôc lau gahi sac, lau tapec, lau bôliñ, awha mba, ti lau gêmbac daêsam, ma sêkêñ ñac sêyêc Yisu anjô-ñga. Ma inj kôm ñac honj ñayham sa.

31 Têñ ndoc lau sêlic awha mba sêsôm yom asê, ma lau gahi sac ti lau bôliñ sêñsêlêñ tiyham, ma tapec si tandô ñawa sa, nanj sêhêdaê ñandô. Ma sêmpinj Anötö Israel-ñga.

32 Yisu ta inj ndê ñgacsêñomi sêmeñ, goc sôm têtñ ñac, “Aö tañwalô lau dindec, bu sêmo sêwhiñ aö gitôm bêc tö su. Ñac si gêñ danen-ñga pacndê, ma aö gatec bu wakêñ ñac sêlhö sêndi ti gêñ yô ñac, mbo ñac tagôlô yêc senj.”

33 Magoc ñgac-sêñomi sêsôm, “Bocke? Gamenj dec gamenj sawa, ma danemlhi bolom yêc nde, bu dakêñ têtñ ñac sêneñ?”

34 Ma Yisu ndac, “Mac nem bolom hinga ndöc?” Ma sêsôm, “Bolom 7 ma i mwambwa ñatô.”

35 Goc Yisu sôm têtñ lau bu sêndöc sic.

³⁶ Dec in̄ k ôc bolom 7 ma i sa ma gêm dan̄ge, p ô kôc-kôc, ma kêñ têt̄ñ ñgacsêñomi, ma ñac sic sam têt̄ñ lau.

³⁷ Ñac hon̄ señ e gitôm, ma tin̄ambu ñgac-sêñomi sic gêt̄ñ ñadêlê sa sip gatop 7 e men̄hu.

³⁸ Lau daêsam señ gêt̄ñ dinan̄ e gitôm. Ñac si laun̄gac ñanamba gitôm 4,000, ma lauwê ti balêkoc sêmbo sêwhin̄.

³⁹ Tin̄ambu Yisu kêñ lau hon̄ sêlhô si, goc in̄ ti ndê ñgacsêñomi sêpi wan̄ dan̄ ma sêtêt̄ñ malac Magadan ñagameñ si.

16

Lau Palêsai sêndac gêt̄ñ dalô

(Mak 8:11-13)

¹ Lau Palêsai ti lau Sadiusi ñatô sêtêt̄ñ Yisu sêmen̄ bu sêñsahê in̄. Ñac sêndac in̄ bu kôm gêt̄ñ dalô bu tôc asê bu in̄ kôc ñaclai yêc Anötö ndê.

² Dec in̄ sôm, “Mac bu alic umbon̄ tikoc, goc mac asôm bu ‘Ac oc pi ñayham.’

³ Ma mac bu alic umbon̄ tiyec, goc mac asôm, ‘U oc ndic.’ Mac alic gêt̄ñ dalô umbon̄-ñga dinan̄, ma an̄yalê ñahu. Ma bocke dec mac an̄yalê gêt̄ñ dalô daêsam nan̄ aô gakôm têt̄ñ ñasawa dindec, nan̄ ñahu dom?

⁴ Mac lau sac nan̄ apuc dômwêm Anötö, ma asa nem lêt̄ñ bambalin̄ gitôm lau mockain̄-ñga. Mac an̄salê gêt̄ñ dalô, tigen̄ Anötö oc kêñ gêt̄ñ dalô tigen̄ têt̄ñ mac alic, gitôm gêt̄ñ dalô nan̄ in̄ kôm pi Jona.” Yisu sôm yom dinan̄ su, goc hu ñac sin̄ ma kôlhô gi.

Yisu puc lau Palêsai ti lau Sadiusi si giso asê

(Mak 8:14-21)

5 Têñ ndoc Yisu ti ñgacsêñomi sêmbu akêñ bug-icton ñadañga sêmeñ, nañ ñgacsêñomi sêkôc bolom dom, sêñlhiñ dau siñ.

6 Ma Yisu sôm têñ ñac, “Ayob daôm ñapep tu lau Palêsai ti lau Sadiusi si yist.”

7 Goc ñac sem yomgalôm sêwhiñ dandi ma sêsôm, “In sôm yom dinañ ñahu bu yac dakôc bolom dom.”

8 Magoc Yisu kêyalê ñac si yom dau, dec sôm, “O mac lau nañ akêñ whiñ gwalec! Tu sake-ñga mac am yomgalôm awhiñ daôm, ma gauc gêm bu aö gasôm yom pi yist, ñahu bu mac nem bolom mba?

9 Bocke mac nem gauc sa pi gêñ honñ nañ aö gakôm, nañ dom? Gauc nem bolom amañdanñ nañ gakêñ têñ lau 5,000 señ. Tinjambu mac ahonñ ñadêlê sa sip gatop hiñga?

10 Ma têñ ndoc lau 4,000 señ bolom amañdanñ ñandôlu, nañ ñadêlê sip gatop hiñga?

11 Aö gasôm yom pi bolom kaiñ dinañ dom, ma bocke dec mac anyalê aneñ yom ñahu dom? Ayob daôm ñapep pi lau Sadiusi ti lau Palêsai si yist.”

12 Têñ dinañ ñac si gauc sa. Ma sêñyalê bu inñ ndê yom hêganônñ yist bolom-ñga dom. Sêñyalê bu inñ kêñ puc ñac bu sêyob dau pi yom nañ lau Sadiusi ti lau Palêsai sêndôhônñ têñ lau.

*Pita hoc Yisu ñahu asê
(Mak 8:27-30; Luk 9:18-21)*

13 Yisu ti ndê ñgacsêñomi sêhóc asê gameñ nañ sêsam bu Sisaria Pilipai, ma inñ ndac ñac, “Lau sêsôm sake pi Ñamalac ndê Atu? Sêsôm bu inñ asa?”

14 Ma sêsôm, “Lau ñatô sêsôm bu am Jon, Ngac Kêku Lau-ñga, ma ñatô sêsôm bu am Elaija, ma ñatô

sêsôm bu am Jeremaya me propet akwa-kwa si danj.”

¹⁵ Goc Yisu ndac njac, “Ma mac daôm, mac asôm bu aö asa?”

¹⁶ Ma Saimon Pita ô yom ma sôm, “Am Mesaya, Anötö Tali Njatau ndê Atu am.”

¹⁷ Dec Yisu sôm, “O Saimon, Jona ndê atu, aö awhañ hóc am, bu ñamalac danj hoc yom dau asê têtj am dom. Damañ undambê-ñga kêtj gauc dinañ têtj am.

¹⁸ Aö wasôm têtj am, bu am Pita, ma aö wandic aneñ gôlôwac dabuñ sa sêlhac hoc dau ñahô.* Ma ñaclai lambwam-ñga gitôm dom bu ku njac dulu.

¹⁹ Ma aö wakêtj ki têtj am bu yob gatam lau sêsôc Anötö ndê gôliñ ñapu-ñga. Ma gêtj bocke nañ am bu êmbwala su yêc nom, nañ wambwala su yêc undambê. Ma gêtj bocke nañ am bu sô dôñ yêc nom, nañ wasô dôñ yêc undambê bocdinañ.”

²⁰ Yisu sôm yom dinañ su, goc gic yao in ndê ñgacsêñomi ti ñañga, bu sêsôm asê têtj lau bu in Mesaya dau dom.

*Yisu sôm gwanaj bu in oc hóc ñandê
(Mak 8:31-33; Luk 9:22)*

²¹ Têtj têtj dinañ Yisu gic hu sôm yom têtj ndê ñgacsêñomi, pi gêtj nañ oc hóc asê in. In whê sa bu

* **16:18:** Yêc Yom Grik Pita ndê ñaé sêsam bu ‘Petros,’ ma hoc sêsam bu ‘petra.’ Lau ñatô gauc gêm bu Yisu ndê yom pi hoc nañ in ndê gôlôwac dabuñ oc sêlhac ñahô, nañ hêganônj yom nañ Pita hoc asê pi Yisu. Bu Pita hoc yom asê ma sôm bu Yisu in Mesaya, Anötö Atu, ma yom dau ti gôlôwac dabuñ honj si yom sêkêtj whin-ñga ñahu.

in̄ gic waê bu têt̄ Jerusalem ndi, ma lau bata Israel-nga ti dabun̄siga atu-tu, ma kêdôhôn̄waga yomsu-nga oc sêkên̄ n̄awapac daêsam têt̄ in̄ e lau sêndic in̄ ndu. Ma têt̄ bêc titô-nga Anötô oc un̄ in̄ sa mbo tali tiyham.

²² Goc Pita kôc in̄ sa n̄asawa sauñ gi, ma sôm in̄ bocdec bu, “Pômdau, mba! Tu Anötô-nga, oc mba! Gêt̄ dinañ oc tap am sa dom andô!”

²³ Yisu kac dau kwi ma sôm têt̄ Pita, “Sadañ, kôc daôm sa lhö su! Am gauc gêm bu lhac aö ahuc, a? Am kêyalê Anötô ndê lêt̄ dom, am bu êmkuc n̄amalac si gauc n̄ambwa.”

*Lau nan̄ sêt̄kuc Yisu oc sêhôt̄ n̄awapac
(Mak 8:34-9:1; Luk 9:23-27)*

²⁴ Goc in̄ sôm têt̄ in̄ ndê ngac-sêt̄nomi, “Asa nan̄ tac whin̄ bu êñkuc aö, nan̄ êñgwiniñ dau ma hôt̄ ndê a gicso dau sa, ma êñkuc aö.

²⁵ Bu asa nan̄ tac whin̄ bu sap gêt̄ nom-nga dôñ n̄apan̄ tu mbo tali-nga, nan̄ oc niñga. Magoc asa nan̄ bu hu gêt̄ nom-nga sin̄ tu êñkuc aö-nga, nan̄ oc niñga dom.

²⁶ N̄amalac dan̄ bu po gêt̄ nom-nga hon̄ sa, magoc in̄ dau gatu bu niñga, dec gêt̄ nom-nga hon̄ dinañ oc tôm dom bu nem in̄ sa. Gêt̄ n̄ayham bocke yêc, nan̄ gitôm bu dakên̄ têt̄ Anötô ô yac neñ gatuñ?

²⁷ Tin̄ambu N̄amalac ndê Atu oc mbu meñ ti Damba ndê n̄aclai ti n̄awasi undambê-nga, ma whin̄ an̄ela hon̄. Têt̄ dinañ in̄ oc kên̄ n̄agêyô têt̄ n̄amalac hon̄ tôm ndi, êñkuc mêtê nan̄ n̄ac sêkôm.

²⁸ Aö wasôm yom n̄andô têt̄ mac! Lau n̄atô nan̄ sêlhac dec, nan̄ oc gacgen̄ sêmbo tali e sêlic N̄amalac ndê Atu meñ ti ndê n̄aclai nem gôlin̄-nga.”

17

*Pita, Jems ma Jon sêlic Yisu ndê ñawasi
(Mak 9:2-13; Luk 9:28-36)*

¹ Bêc 6 giŋga su, goc Yisu kôc Pita, ma Jems lu asi Jon sêwhiŋ iŋ, ma ñac tawasê sêpi lôc baliŋ daŋ si.

² Yêc dindê sêlic Yisu ndê ñamlic kaiŋ daŋ sa. Iŋ aŋgô andô ñawê sa gitôm ac pô gameŋ, ma iŋ ndê ñakwê ñawasi sêp sambuc.

³ Ma sêlic Moses lu Elaija sêhoc dau asê ma iŋlu sem yomgalôm sêwhiŋ Yisu.

⁴ Goc Pita sôm têŋ Yisu, “Pômdau, ñayham kêlêc bu dambo dec. Am bu tac whiŋ, goc aô wakwê bac tö bu mac ambo-ŋga, am nem bac daŋ, Moses ndê daŋ, ma Elaija ndê bac daŋ.”

⁵ Iŋ sôm yom dau mbo, ma dao ti ñawê atu daŋ sip meŋ ma kêgatôc ñac ahuc. Ma awha daŋ sa yêc dao ñalôm, naŋ sôm, “Aô neŋ atuŋgac dau dindêc. Aô gatisambuc iŋ, ma atac whiŋ iŋ ndu andô. Aŋgô iŋ ndê yom maŋ!”

⁶ Têŋ ndoc ñgac-sêŋomi tö sêŋgô awha dinaŋ, naŋ sêtôc dau ñalêŋ sac, ma sêhu dau aŋgô andô sip nom.

⁷ Magoc Yisu têŋ ñac gi, kêmasêc ñac ma sôm, “Atisa ma atôc daôm dom.”

⁸ Ma sêhóc tandô sa ma sêlic bu Yisu tawasê mbo.

*Gêndac pi Elaija
(Mak 9:11-13)*

⁹ Tiŋambu ñac sêsip akêŋ lôc dau sêmeŋ, ma Yisu kêŋ yao ñac bocdec bu, “Andic miŋ pi gêŋ naŋ mac alic naŋ dom, e ñamalac ndê Atu tisa akêŋ lau batê-ŋga.”

¹⁰ Ma ñgacsêŋomi tö dinaŋ sêndac iŋ bocdec bu, “Lau †Skraib naŋ sêndôhôn yomsu, naŋ sêsôm bu

Elaija oc meņ hóc asê muņ, ma tiņambu Mesaya oc meņ. Yom dau ŋahu bocke?”

¹¹ Goc Yisu ô yom ma sôm, “Elaija gic waê bu meņ ma êmasaņ gêņ hon tisolop.

¹² Ma aô wasôm têņ mac, bu Elaija meņ su, tigen lau sênyalê iņ dom. Ma sêkôm mêtê sac têņ iņ tôm ŋac atac whiņ. Ma ŋalêņ tigen Ŋamalac ndê Atu oc sip ŋac si amba, ma sêkêņ ŋandê atu têņ iņ.”

¹³ Têņ dinaņ ŋac si gauc sa bu Yisu ndê yom pi Elaija hêganôņ Jon, Ŋgac Kêku Lau-ŋga.

*Yisu soc ŋalau sac su yêc balê daņ
(Mak 9:14-29; Luk 9:37-43)*

¹⁴ Têņ têm ŋac sêmbu sêmeņ, naņ sêtap lau toņ atu sa, ma ŋgac daņ têņ Yisu gi ma pôn haduc.

¹⁵ Ma iņ sôm, “Pômdau, tamwalô aneņ balê ma nem iņ sa. Iņ hóc ŋawapac atu daņ, ma ndoc daêsam kôm iņ titoņ e peņ sip ya me bu.

¹⁶ Aô gakôc iņ gatêņ nem ŋgac-sêņomi ga, magoc ŋac sêtôm dom bu sêkôm iņ ŋayham sa.”

¹⁷ Ma Yisu sôm, “O mac lau sac! Aô gambo gawhiņ mac ŋasawa hic baliņ su, ma bocke mac atôm dom bu akôm gêņ daņ? Aô wambo wawhiņ mac tu wanem mac sa-ŋga ŋapaņ dom! Mac nem akêņ whiņ mbasi. Akôc balê dau sa amen.”

¹⁸ Goc Yisu hec yom ŋalau sac naņ mbo balê dau ŋalôm, ma soc iņ sa awê gi, ma ŋgahô eņ balê dau ŋayham sa.

¹⁹ Tiņambu ŋgacsêņomi sêtêņ Yisu si, ma sêndac iņ gelec, “Tu sake-ŋga yac atôm dom bu aseņ ŋalau sac dinaņ su?”

²⁰ Ma iņ ô yom ma sôm, “Mac atôm dom, bu mac akêņ whiņ Anötö ndê ŋaclai gitôm dom. Yomandô

aö wasôm têt mac, bu mac nem akêt whiñ bu nditôm gêt saun andô dan, tôm soc ñamatu saun, dec oc tôm bu mac asôm têt lôc dan bu puc dau sa ma têt gameñ wakuc ndi, goc lôc dau oc ndi. Akêt whiñ, ma mac oc atôm bu akôm gêt hoñ. [

²¹ Yac bu dasoc ñalau sac kainñ dinañ su, goc gêt ñamata-ña dahu gêt danen-ña siñ tu gauc nem Anötö-ña, ma daten mbec ñañga.]”

Yisu sôm tiyham bu in oc mbac ndu ma tisa tiyham

(Mak 9:30-32; Luk 9:43-45)

²² Tiñambu Yisu ndê ñgac-sêñomi sêkac dau sa yêc gameñ Galili-ña, ma in sôm têt ñac, “Tiñambu oc sêkêt ñamalac ndê Atu sip lau ñatô amba.

²³ Ñac oc sêndic in ndu, magoc têt bêc titö-ña Anötö oc un in sa mbo tali tiyham.” Yisu ndê yom dinañ kôm ñgacsêñomi si ñalôm ñawapac ñandô.

Takis Lôm Dabuñ-ña

²⁴ Tiñambu Yisu ti ndê ñgac-sêñomi sêhóc asê malac Kapenaom, ma lau nañ sêkóc takis lôm dabuñ-ña,* nañ sêtêt Pita si ma sêndac in bocdec bu, “Bocke? Mac nem kêdôhônwaga oc kêt mone nemlhi takis lôm dabuñ-ña, me mba?”

²⁵ Ma Pita sôm, “Hecen, in oc nemlhi.”

Têt ndoc Pita sôc andu gi, nañ in gic miñ yom dau têt Yisu dom, magoc Yisu dau ndac in, “Sai-mon, am gauc gêm sake? Kiñ nom-ña sêkóc takis

* **17:24:** Tôm yala tigen-tigen launñac Israel-ña hoñ nañ si yala hóc gêlêc 20, nañ semlhi takis lôm dabuñ-ña. Takis dau gitôm lau Grik si mone drakma lu, gitôm ñaôli nañ sêkóc tu gwelen bêc lu-ña. Alic Eks 30:13; ma 38:26.

yêc lau asa? Sêkôc yêc ñac dau si atui, me sêkôc yêc lau ñatô?”

²⁶ Goc Pita ô yom ma sôm, “Ñac sêkôc takis yêc lau ñatô.” Ma Yisu sôm, “Bocdinañ yomsu takis-nga hêganôñ Kin ndê atui dom.

²⁷ Tigen yham dom bu ñac sêlic yac sac. Bocdinañ sa ndi ma kêñ gam yêc bugictoñ. Ma i ñamata-nga nañ am hê sa, nañ kac i dau whasuñ sa, ma am oc tap mone sa gitôm bu nemlhi hêclu neñ takis lôm dabuñ-nga. Kôc sa, ma kêñ têtñ ñac.”

18

Asa ti ñamalac ñamata-nga?

(Mak 9:33-37; Luk 9:46-48)

¹ Têtñ ndoc dinañ ñgac-sêñomi sêtêtñ Yisu si, ma sêndac in bocdec bu, “Lau nañ sêmbo Anötö ndê gôlinñ ñapu, nañ si asa ti ñamalac ñamata-nga?”

² Goc Yisu ta balêkoc saunñ danñ meñ, ma kêñ in kalhac ñac ñalhu.

³ Ma in sôm, “Anem daôm kwi ma angwiniñ daôm e atôm balêkoc saunñ. Bu mba, nañ wasôm yom ñandô têtñ mac bu mac atôm dom bu asôc Anötö ndê gôlinñ ñapu.

⁴ Asa nañ bu êñgwiniñ dau nditôm balêkoc dindec, nañ ti ñamalac ñamata-nga yêc Anötö ndê gôlinñ ñapu.

⁵ Ma asa nañ kôc balêkoc saunñ danñ gitôm in dindec, nañ sa tu aneñ ñaê-nga, nañ gitôm in kôc aô daun sa.”

Puc pi lêtôm

(Mak 9:42-48; Luk 17:1-2)

⁶ Ma Yisu sôm, “N̄amalac daŋ bu tim balêkoc saun dindec si daŋ naŋ kêŋ whiŋ aö bu kôm mêtê sac, naŋ kôm giso atu. Oc ŋayham bu dasô hoc atu daŋ pi iŋ kachu, ma tambaliŋ iŋ sip gwêc tim ndi, ma gwêc kô iŋ mbac ndu. Ma boc-dinaŋ oc tôm dom bu iŋ tim balêkoc dau, ma tiŋambu tap Anötö ndê matôc sa.

⁷ “Aö wasôm têŋ mac, bu gêŋ lêtôm-ŋga oc sêmeŋ, ma sêkêŋ ŋawapac têŋ lau nom-ŋga. Tigeŋ asa naŋ bu kôc gêŋ lêtôm-ŋga daŋ meŋ, naŋ oc tap Anötö ndê matôc sa. Oyaê!

⁸ Bocdinaŋ am amam me gahim daŋ bu wê am bu kôm sac, goc tim kic. Oc ŋayham bu am sôc undambê ma ndöc tamli ti amam gatuc me gahim gatuc, hôc gêlêc naŋ am kôm sac ti lic sambuc e Anötö tuc am sip ya naŋ sa ŋapaŋ, naŋ ndi.

⁹ Ma am nem tanôm bu wê am bu kôm sac, goc kip sa ma êmbaliŋ niŋga. Am bu mbo tamli ndöc undambê ti tanôm tigeŋ, naŋ hôc gêlêc am mbo ti tanôm lu ma kôm sac, dec tiŋambu Anötö tuc am sip ya lambwam-ŋga ndi.”

*Yom gôliŋ pi domba naŋ giŋga
(Luk 15:4-7)*

¹⁰ “Ma ayob daôm ŋapep bu alic lau saun dindec gitôm gêŋ ŋambwa dom. Aö wasôm têŋ mac, bu ŋac si aŋela naŋ sêmbô undambê, naŋ sêlhac Damaŋ undambê-ŋga ndê aŋgô andô-ŋga. [

¹¹ N̄amalac ndê Atu meŋ bu nem lau naŋ siŋga su, naŋ si.]

¹² “Akôc gauc pi ŋgac daŋ naŋ yob domba 100. Têŋ ndoc domba daŋ bu êŋsêlêŋ bambaliŋ e ndi

ninga, naŋ inŋ oc kôm sake? Inŋ oc hu 99 siŋ sêmbô, ma sa ndi êŋsalê daŋ naŋ giŋga.

¹³ Aô wasôm têŋ mac bu têŋ ndoc inŋ tap sa, naŋ inŋ ndê atac ŋayham tu domba tigenŋ dinaŋ-ŋga oc hôc gêlêc inŋ ndê atac ŋayham pi 99 naŋ sêmbô, naŋ su.

¹⁴ Ma bocdinaŋ, mac nem Damam undambê-ŋga tec bu lau sauŋ daŋ sêninga.”

Lêŋ tamatôc asidôwai si yom-ŋga

¹⁵ “Am nem asidôwa daŋ bu kôm sac têŋ am, goc am tamwasêm têŋ inŋ ndi, ma sôm inŋ ndê giso asê têŋ inŋ. Inŋ bu ŋgô am nem yom ma kac ndê ŋalôm kwi, dec amlu apitigenŋ tiyham ma ambo ti yom malô.

¹⁶ Magoc inŋ bu ŋgô dom, dec kôm tôm yac neŋ ŋagôlinŋ, naŋ sôm bu yom naŋ lau lu me tō sêpuc dôŋ, naŋ dakôc sa ti yom ŋandô. Boc-dinaŋ kôc ŋamalac tigenŋ me lu sêwhiŋ am, tu bu sêpuc am nem yom dôŋ-ŋga, ma atêŋ nem asidôwa dau andi.

¹⁷ Ma asidôwa dau bu sôc lau dinaŋ si yom ŋapu dom, naŋ sôm yom dau asê têŋ gôlôwac dabuŋ hoŋ. Ma inŋ bu tec bu sôc gôlôwac dabuŋ si yom ŋapu, naŋ goc alic inŋ gitôm ŋgac sambuc me ŋgac kôc takis-ŋga naŋ kêyalê Anötô dom.

¹⁸ “Aô wasôm yom ŋandô têŋ mac. Gêŋ bocke naŋ mac ambwala su yêc nom, naŋ wambwala su yêc undambê. Ma gêŋ bocke naŋ mac asô dôŋ yêc nom, naŋ wasô dôŋ yêc undambê bocdinaŋ.

¹⁹ “Ma gêŋ daŋ tiyham. Mac nem ŋamalac lu me tō bu ŋalôm tigenŋ bu atêŋ gêŋ daŋ têŋ Damaŋ undambê-ŋga, naŋ inŋ oc kêŋ têŋ mac.

²⁰ Nahu bu gamej bocke nanj mac nem njamalac lu me tö akac daôm sa tu aneñ njaê-nga, nanj aö oc wambo wawhiñ mac.”

Dasuc asidôwai si sac kwi manj

²¹ Pita têñ Yisu gi, ma ndac in bocdec bu, “Pômdau, sôm têñ aö. Aneñ asidôwa danj bu kôm sac têñ aö napanj, nanj wasuc in ndê sac kwi tidim hiñga? Nditôm 7, me tidim hiñga?”

²² Goc Yisu sôm, “Aö wasôm têñ am, bu tidim 7 dom. Suc in ndê sac kwi tidim 77 ma hóc gêlêc. Sê sa dom!

²³ “Anjô su nanj! Aö bu wawhê sa têñ mac, lêt dasuc sac kwi-nga nanj gic waê lau nanj sêmbo Anötö ndê gôliñ napu. Kiñ danj mbo, ma in tac whiñ bu êmasañ yom whiñ in ndê lau akiñ nanj si töp yêc in.

²⁴ In gic hu gwelenj dau, ma sêkêñ ngac danj kalhac in anjô-nga, nanj ndê töp atu andô, gitôm mone talent 10,000.*

²⁵ Ngac dinanj gitôm dom bu ô ndê töp, goc Kiñ dau sôm bu sêkêñ in ti in ndê awhê ma balêkoc ma in ndê gêñ honj bu lau sênemlhi ô töp dau.

²⁶ Dec ngac akiñ dau hu dau sip gi pôn haduc têñ Kiñ, ma teñ in bocdec bu, ‘Kêñ njasawa têñ aö, ma waö gêñ honj!’

²⁷ Goc Kiñ tawalô in, ma hu yom töp-nga siñ, ma kêñ in sa gi.

²⁸ “Tigenj tiñambu ngac dau tap ngac akiñ danj sa, nanj ndê töp saunj yêc in, gitôm mone †denarii 100.†

* **18:24:** Lau Grik si mone nanj sêsam bu talent, nanj njaöli atu andô - talent tigenj gitôm K5-6,000. Bocdinañ ngac dau ndê töp hóc gêlêc 5 milien kina. † **18:28:** Ngac dau ndê töp gitôm K5-600.

Inj gôlô ngac dau dôḅ, hôc inj sip kachu, ma sôm, ‘Am ndic nem tôp têtḅ aô!’

²⁹ Ma ngac dau hu dau sip gi pôtḅ haduc ma tētḅ inj bocdec bu, ‘Kêtḅ ḅasawa têtḅ aô ma waô nenḅ tôp.’

³⁰ Tigenḅ inj tec, ma kêtḅ ngac dau ndöc gapocwalô e inj ô tôp honḅ pacndê.

³¹ Lau akinḅ ḅatô sêlic gêtḅ dinanḅ, dec ḅalôm ḅawapac ḅandô, ma sêtêtḅ Kinḅ si ma sic minḅ gêtḅ honḅ têtḅ inj.

³² Goc inj ta ngac akinḅ dau ma sôm têtḅ inj, ‘Am ngac sac! Am tētḅ aô bu tanḅwalô am, dec aô gahu am nem yom tôp-ḅga sinḅ.

³³ Tu sake-ḅga am tamwalô ngac dinanḅ dom, gitôm aô tanḅwalô am?’

³⁴ Goc inj tac ḅandê atu, ma kêtḅ ngac akinḅ dau têtḅ lau gapocwalô-ḅga, bu sêndic inj ḅamlic ḅandê ma ndöc gapocwalô e inj ndic ndê tôp sambuc su.”

³⁵ Yisu gic bata yom gôlinḅ dau, goc sôm, “Mac bocdinanḅ, asuc nem asidôwai si sac kwi ma gauc nem tiyham dom. Bu mba, dec aneḅ Damanḅ undambê-ḅga oc kôm têtḅ mac gitôm Kinḅ dinanḅ kôm têtḅ ndê ngac akinḅ.”

19

Anötö tec bu awhê lu ngac sêhu dau sinḅ

(Mak 10:1-12)

¹ Yisu sôm yom dau su, goc hu gameḅ Galili-ḅga sinḅ, ma têtḅ gameḅ Judia-ḅga nanḅ yêc Bu Jordan ḅadanḅa têtḅ ac pi-ḅga, nanḅ gi.

² Lau daêsam sêḅkuc inj, ma yêc gameḅ dinanḅ inj kôm ḅac si gêmbac ḅayham sa.

³ Ma lau Palêσαι ηατô sêtêη in si bu sêtim in, dec sêndac in bocdec bu, “Yom dan yêc, nan tôm bu ηgac dan hu ndê awhê siη, me mba? In oc êngili yomsu, me mba?”

⁴ Goc in sôm, “Mac anjalê Anötö ndê yom nan sêto yêc, me mba? Yom dau sôm bu, *‘Têη têm ηamata-ηga Anötö kêmasaη ηamalac awhê ma ηgac.’*

⁵ Ma yom dan tiyham sôm, *‘Tu dinaη-ηga ηgac dan oc hu damba lu dinda siη, ma sap in ndê awhê dôη. Ma inlu sêti gêη tigen.’*

⁶ Yom dau whê sa bu inlu sêmbo sêtôm ηamalac lu dom, inlu sêti gêη tigen yêc Anötö anğô-ηga. Bocdinaη yham dom andô bu ηamalac sêkac gêη nan Anötö dau kêη pitigen, nan su.”

⁷ Goc sêndac in, “Bocdinaη dec tu sake-ηga Moses to yomsu dan, nan sôm bu ηgac dan gitôm bu to bapia hu nawhê siη-ηga, goc hu in siη?”

⁸ Ma Yisu ô yom bocdec bu, “Moses kêyalê bu mac nem ηalôm ηadandi, dec sôm bu ηgac dan gitôm bu hu ndê awhê siη. Tigen têtêm têm ηamata-ηga Anötö kêmasaη ηamalac awhê ma ηgac tu bu sêhu dau siη-ηga dom.

⁹ Aô wasôm têtêm mac, bu yom tigen yêc bu ηgac dan hu ndê awhê siη, nan awhê dau kôm mêtê mockaiη-ηga whiη ηgac dan. Ma ηgac dan bu hu ndê awhê siη tu gêη dau-ηga dan-ηga, ma nem awhê wakuc, nan kôm mêtê mockaiη-ηga yêc Anötö anğô-ηga.”

¹⁰ Têtêm dinaη Yisu ndê ηgac-sêηomi sêsôm têtêm in, “Bu bocdinaη, dec mboe oc ηayham bu lau sênem dau dom, a? Oc ηawapac atu bu awhê lu ηgac sêsôc yom dau ηapu.”

11 Magoc inj sôm, “Mba! Anötö kêmasañ awhê lu nğac bu sênem dau. Magoc lau tigenj-tigenj inj kêmasañ nğac bu sênem awhê me nğac dom.

12 Lauñgac nğatô dindai sêkôc nğac, nañ sêtôm dom bu sênem awhê. Ma lauñgac nğatô nañ sêsê nğac bu sênem awhê dom. Ma nğatô sêkêñ dau sambuc tu gwelenj nğawaê nğayham-nğac tu bu sêpo Anötö ndê gôlinj sa, ma tu dinañ-nğac dec sem awhê dom. Am asa nañ gitôm bu kôc yom dindec sa ma sôc nğapu, nañ kôc sa.”

Yisu gêm mbec balêkoc

(Mak 10:13-16; Luk 18:15-17)

13 Lau nğatô sêkôc si balêkoc sêtêñ Yisu si. Nğac tac whinj bu inj kêñ amba sac nğac, ma tenj mbec pi nğac. Tigenj nğacsêñjomi sêsôm dinda ti dambai.

14 Goc Yisu sôm, “Atec balêkoc sêtêñ aö sêmenj. Alhac nğac ahuc dom, bu Anötö ndê gôlinj gic lau nañ sêtôm balêkoc saunj dindec, nañ nğawaê.”

15 Ma inj kêñ amba sac nğac honj ma gêm mbec nğac, goc tisa ma kôlhö gi.

Nğac ti lêlôm

(Mak 10:17-22; Luk 18:18-23)

16 Ma nğac dañ têtj Yisu gi, ma ndac inj bocdec bu, “Kêdôhônjwaga, aö wakôm gêñ nğayham bocke, dec tiñambu Anötö oc kôc aö sa wandöc tanjli yêc undambê?”

17 Yisu ô yom ma sôm, “Tu sake-nğac am ndac aö bu gêñ sake inj gêñ nğayham? Anötö tawasê inj nğayham. Am bu ndöc tamli yêc undambê, nañ dañam wambu yomsu nañ Anötö kêñ têtj Moses.”

18 Goc nğac dau ndac, “Yomsu honj, me yomsu bocke?” Ma Yisu sôm, “Yomsu bocdec bu, ‘Ndic

ɲamalac ndu dom. Kôm gêɲ mockaiɲ-ɲga dom. Nem kaɲ gêɲ dom. Sôm yom tasan pi lau dom.

¹⁹ *Toc damam lu dinam sa, ma 'Tac whiɲ lau ɲatô gitôm am tac whiɲ daôm.'* ”

²⁰ Goc iɲ sôm, “Yomsu hoɲ dinaɲ aö kakuc gambo. Ma gêɲ sake yêc tu wakôm-ɲga?”

²¹ Ma Yisu sôm, “Am bu ti ɲgac gitêɲ, naɲ sa ndi ma kêɲ nem gêɲ hoɲ têɲ lau sênemli, ma kêɲ ɲawa têɲ lau ɲalôm sawa. Ma bocdinaɲ dec êmyalê bu am nem awa ɲandô yêc undambê. Ma tiɲambu mweɲ ma êmkuc aö.”

²² ɲgac dau iɲ ndê yala daêsam dom, ma têɲ ndoc iɲ ɲgô Yisu ndê yom dinaɲ, goc iɲ kölhô ti ɲalôm ɲawapac gi. Nahu bu iɲ ɲgac ti lêlôm.

Puc pi awa ti wapa

(Mak 10:23-31; Luk 18:24-30)

²³ Goc Yisu sôm têɲ ndê ɲgac-s êɲomi, “Yomandô wasôm têɲ mac, bu lau ti lêlôm oc tôm dom bu sêsôc Anötô ndê gôliɲ ɲapu ɲagahô, ɲahu bu ɲac si awa ti wapa hê ɲac kwi.

²⁴ Aɲgô! Bôc atu daɲ gitôm kamel, oc tôm bu sôc so ɲalasê ɲagahô hêc gêlêc ɲgac ti lêlôm daɲ, naɲ bu sôc Anötô ndê gôliɲ ɲapu.”

²⁵ Têɲ ndoc ɲgacsêɲomi sêɲgô yom dinaɲ dec sêhêdaê ɲandô, ma sêndac Yisu, “Bu bocdinaɲ dec asa oc tôm bu tap Anötô ndê mwasiɲ nem lau si-ɲga sa? Oc ɲawapac atu!”

²⁶ Magoc Yisu tahê ɲac ma sôm, “Gêɲ naɲ ɲamalac sêtôm dom bu sêkôm, naɲ Anötô gitôm bu kôm.”

²⁷ Ma Pita ô yom ma sôm, “Yac ahu gêɲ hoɲ siɲ tu aɲkuc am-ɲga. Bocdinaɲ yac oc atap mwasiɲ bocke sa?”

28 Dec Yisu sôm têḡ ḡac hoḡ, “Yomandô wasôm têḡ mac, bu têḡ ndoc ḡambu-ḡga naḡ ḡêḡ hoḡ sêtiwakuc, naḡ ḡamalac ndê Atu oc ndoc iḡ ndê pôḡ Kiḡ-ḡga ti ḡaclai ma ḡawasi atu. Ma mac lau naḡ aḡkuc aô, naḡ oc andôc pôḡ 12, ma anem ḡôliḡ lau Israel-ḡga si toḡ 12.

29 Ma lau hoḡ naḡ sêhu andu me damba lu dinda, me asidôwai ma balêkoc, me nom siḡ tu aô-ḡga, naḡ Anötö oc kêḡ ḡêḡ kaiḡ dinaḡ daêsam têḡ ḡac ô. Ma tiḡambu iḡ oc kêḡ ḡac sêwêkaiḡ gameḡ sêndôc tali ḡapaḡ-ḡga.

30 “Magoc lau daêsam naḡ sêti lau ḡamata-ḡga têḡ têm kwahic dec-ḡga, naḡ oc sêti lau ḡambu-ḡga, ma lau ḡambu-ḡga oc sêti lau ḡamata-ḡga.”

20

Yom ḡôliḡ pi lau naḡ sem gwelen yêc ôḡ wain-ḡga.

1 Goc Yisu sôm, “Aḡô yom ḡôliḡ dindec pi Anötö ndê ḡôliḡ, oc whê aneḡ yom dinaḡ sa. ḡḡac danḡ mbo, naḡ wêkaiḡ ôḡ wain-ḡga atu danḡ. Iḡ tisa têḡ bêbêc ganduc ma sôc malac lôḡ gi, ma kêsalê lau tu sênem gwelen yêc iḡ ndê ôḡ-ḡga.

2 Iḡ tap lau ḡatô sa, ma sôm bu iḡ oc nemlhi ḡac ḡa mone ḡitôm †denarias tigeḡ tu gwelen bêc tigeḡ-ḡga. Goc iḡ kêkiḡ ḡac sêsôc iḡ ndê ôḡ si.

3 Ma têḡ acgatu ḡitôm 9 kilok, iḡ sa gi ḡêlic lau ḡatô sêlhac ḡambwa sêlhac malac lôḡ.

4 Ma iḡ sôm têḡ ḡac, ‘Andi akôm gwelen yêc aneḡ ôḡ wain-ḡga, ma aô oc wakêḡ ḡaôli solop têḡ mac ô nem gwelen.’

⁵ Goc sêsôc ôm si ma sem gwelen. Ma in kôm bocdinañ têt ac kalhac lhu ma têt 3 kilok telha-nga. In gi tap lau sa, ma kêkin ñac si sêkôm gwelen.

⁶ Ma têt 5 kilok telha-nga in sa gi tap lau ñatô sa, nañ sêlhac ñambwa. Ma in sôm têt ñac, ‘Tu sake-nga mac ambo ñambwa têt acsalô sambuc dindec?’

⁷ Ma sêsôm, ‘Lau dan sêmen sêkêt gwelen têt yac tu akôm-nga dom.’ Goc in sôm, ‘Mac andi anem gwelen yêc aneñ ôm.’

⁸ ‘Têt ac gi sip, goc ôm ñadau sôm têt in ndê ñac ñamata-nga, ‘M bwêc lau nañ sem gwelen sêmbô, nañ sêmen, ma kêt ñac si ñaôli têt ñac. Nemlhi lau nañ sêmen têt 5 kilok telha-nga nañ mun, goc tinambu nemlhi lau nañ sêmen têt bêbêc.’

⁹ Ma lau nañ ñadau kôc ñac sa têt 5 kilok, nañ sêkôc denarias tigen-tigen ti ñac si ñaôli tôm gi.

¹⁰ Tu dinañ-nga dec lau nañ sic hu gwelen têt bêbêc, sêkêt bata bu oc sêkôc ñaôli hôc gêlêc denarias tigen su. Magoc ñac hon sêkôc denarias tigen.

¹¹ Têt dinañ ñac sic hu sêtucdin ñadau,

¹² ma sêsôm, ‘Lau nañ sêmen tinambu, nañ sem gwelen gitôm ñasawa apê, ma yac am gwelen atu ma ac pec yac acsalô sambuc dindec. Magoc yac hon akôc ñaôli kain tigen.’

¹³ Magoc ñadau sôm têt ñac si dan, ‘O aneñ silip! Bocke dec am sôm bu aô gakôm gêt so têt am? Bêbêc lec am gôlôc bu kôc denarias tigen ti am nem ñaôli gwelen-nga.

¹⁴ Boc-dinañ kôc nem ñaôli sa, ma lhö ndi. Aô tac whin bu wakêt ñaôli têt lau nambu-nga gitôm aô gakêt têt am.

¹⁵ Mone dindec aneñ gêt, ma wakôm tôm aô

atac whiņ. Bocke dec am gêlic sac bu aö ngac wamwasinġ lau-ņga.’ ”

¹⁶ Goc Yisu sôm têtġ ndê ngac-sêņomi, “Bocdinaņ, lau ņambu-ņga oc sêti lau ņamata-ņga, ma lau ņ amata-ņga oc sêti lau ņambu-ņga.”

*Yisu sôm tiyham bu inġ oc mbac ndu
(Mak 10:32-34; Luk 18:31-33)*

¹⁷ Tiņambu Yisu ma lau nanġ sêņkuc inġ, sêņsêlêņ sêmbo seņ bu sêpi malac Jerusalem sêndi. Ma Yisu wê ngacsêņomi 12 sêsa si sêmbo dau-ņga, ma sôm têtġ ņac,

¹⁸ “Kwahic dec yac oc dapi malac Jerusalem dandi, ma ngac danġ oc kêņ ņamalac ndê Atu sip dabuņ-siga atu-tu ti kêdôhônġwaga yomsu-ņga amba. ņac oc sêkic yom bu sêndic inġ ndu,

¹⁹ ma sêkêņ inġ sip lau Rom-ņga amba. Ma lau Rom-ņga oc sêsu inġ susu, ma sêndic inġ ņamlic ņandê atu, goc sêndic inġ ndu pi a gicso dau. Ma têtġ bêt titö-ņga, Anötö oc unġ inġ sa mbo tali tiyham.”

*Jems lu Jon bu sêhôt gêlêc ngac-sêņomi ņatô
(Mak 10:35-45)*

²⁰ Têtġ ndoc dinaņ Jems lu Jon dinda bu teņ gêņ danġ têtġ Yisu nem inġlu awħa, goc kôt Sebedi ndê atu lu dinaņ sa sêtêtġ Yisu si, ma pônġ haduc yêc inġ anġô-ņga.

²¹ Ma Yisu ndac, “Am tac whiņ sake?” Goc awħê dau sôm, “Aö tac whiņ bu am toc aneņ atuņ lu dindec sa, ma sôm bu inġlu sêndöt sêwhiņ am têtġ ndoc am ndöt nem pônġ kinġ-ņga ma nem gôlinġ lau. Kêņ danġ ndöt amam andô-ņga, ma danġ ndöt gasê-ņga.”

22 Dec Yisu sôm têñ inlu, “Amlu anyalê gêñ nan amlu andac, nan dom. Amlu atôm bu anôm gêñ sip laclhu ñawapac-nga nan aö wanôm, a?” Ma inlu sêsôm, “Aêc, alu atôm.”

23 Ma Yisu sôm, “Yomandô, amlu oc ahôc ñawapac gitôm aö wahôc. Magoc aö dec oc wanyalin lau sa bu sêndöc aö aman andô-nga me gasê-nga, nan dom. Aneñ Daman ti ñadau bu ênyalin lau sa bu sêndöc dinañ.”

24 Têñ ndoc ñgacsêñjomi amanlu sêñgô yom dau ñawaê, dec kôm ñac atac ñandê têñ Jems lu Jon.

25 Goc Yisu mbwêc ñac sêtêñ in si, ma sôm, “Mac anyalê bu lau sambuc si gôlinwaga sêtoc dau sa têñ ñac si lau, ma ñac si lau bata sêñgwiniñ lau nan sêmbo ñac ñapu.

26 Tigen mac ankcuc ñac si mêtê dau dom. Mba! Mac nem asa nan tac whin bu ti ñamalac tiwaê yêc Anötö anğô-nga, nan nem akin mac.

27 Aêc! Asa nan bu ti mac nem ñamalac ñamata-nga, nan êñgwiniñ dau ma ti mac nem ñgac akin ñambwa.

28 Ñalêñ tigen Ñamalac ndê Atu meñ bu lau sênem akin in dom. In meñ bu nem akin lau, ma bu kên dau ti da bu nemlhi lau daêsam si sac ñatôp.”

*Yisu kôm ñgac tapec lu ñayham sa
(Mak 10:46-52; Luk 18:35-43)*

29 Têñ ndoc Yisu ti in ndê ñgac-sêñjomi sêhu malac Jeriko sin, nan lau daêsam sêñkcuc in.

30 Ñgac tapec lu sêndöc señ ñamakê, ma sêñgô ñawaê bu Yisu kêsêlêñ meñ, goc sêmbwêc, “Pômdau, Dawid ndê Atu, tamwalô alu.”

³¹ Goc lau sêsôm inĵu bu sênem dau dônĵ. Magoc inĵu sêmbwêc ti ŋaŋga, “Pômdau, Dawid ndê Atu, tamwalô alu.”

³² Yisu kwê dônĵ kalhac ma ta inĵu sêmeŋ. Ma inĵ ndac, “Amlu atac whiŋ bu wakôm sake têtĵ amlu?”

³³ Ma sêo yom ma sêsôm, “Pômdau, alu atac whiŋ bu tanônĵ ŋayham sa.”

³⁴ Dec Yisu tawalô inĵu, ma kêmasec inĵu tandô. Ma ŋagahô inĵu tandô ŋayham sa, ma sêŋkuc inĵ.

21

Yisu hôc asê Jerusalem

(Mak 11:1-10; Luk 19:29-38; Jon 12:12-15)

¹ Ŋac sêsuŋ sa Jerusalem ma sêhôc asê malac Betpagi yêc Lôc Olib. Ma Yisu kêkiŋ ndê ŋgacsêŋomi si ŋac lu,

² ma sôm têtĵ inĵu, “Amlu asôc malac dindê andi, ma amlu oc atap donĵki dinda daŋ sa, naŋ sêo dônĵ kalhac, whiŋ donĵki dau ŋatu. Aŋgapwêc su, ma akôc sa atêtĵ aô amêŋ.

³ Ma ŋamalac daŋ bu ndac amlu pi gêtĵ dau, naŋ asôm têtĵ inĵ bu, ‘Pômdau tac whiŋ bu donĵki lu dindêc sênem inĵ sa,’ ma ŋagahô inĵ oc kêŋ donĵki lu dau têtĵ amlu.”

⁴ Ŋalêtĵ dinaŋ dec yom naŋ propet akwa daŋ sôm, naŋ ŋandô sa. Yom dau sêto yêc bocdec:

⁵ Asôm têtĵ lau †Sayon-ŋga bu, “Alic su naŋ! Mac nem Kiŋ têtĵ mac meŋ. Inĵ ŋac malô, ma inĵ meŋ ndôc donĵki ŋatu daŋ ŋahô.” *[Sek 9:9; Ais 62:11]*

⁶ Ŋgacsêŋom lu dinaŋ sêsôc malac si, ma sêkôm tôm Yisu sôm.

⁷ Sêwê donki dinda lu n̄atu sêtêḅ Yisu si, ma sêkêḅ ḅac si ḅakwê awê-ḅga sac donki, ma Yisu pi gi ndöc ḅahô.

⁸ Ma lau daêsam sêhê si ḅakwê yêc seḅ, ma sêhêako a ḅalauḅ ma sêkêḅ yêc seḅ.

⁹ Ma lau toḅ atu naḅ sêḅsêlêḅ sêmuḅ Yisu, ti lau naḅ sêḅkuc iḅ, naḅ sêmbwêc, “Hosana têḅ Dawid ndê Atu. Anötö nem mbec iḅ naḅ meḅ gêm Pômdau aḅgô. Hosana têḅ Anötö lôlôc-ḅga.”

¹⁰ Têḅ ndoc Yisu sôc malac Jerusalem gi, naḅ lau malac-ḅga hoḅ gauc gêm yom daêsam ma sêndac, “Iḅ asa dê?”

¹¹ Ma lau daêsam sêḅgô ḅac si yom ma sêsôm, “Iḅ Yisu, propet atu naḅ meḅ akêḅ malac Nasaret yêc gameḅ Galili-ḅga.”

*Yisu soc lau su yêc lôm dabuḅ
(Mak 11:15-18; Luk 19:45-46)*

¹² Yisu sôc lôm dabuḅ ḅabatêm-ndö gi, ma soc lau naḅ sic dulu gêḅ ti semlhi gêḅ, naḅ su. Ma iḅ tac lau naḅ sêô mone,* naḅ si tebo sa, ma lau naḅ sêkêḅ balusi† tu lau sênemlhi-ḅga, naḅ iḅ kêbalip ḅac si gêḅ hoḅ giḅga.

* **21:12:** Lau sêmeḅ akêḅ gameḅ baliḅ bu sêlic om atu-atu yêc malac Jerusalem, ma bu sêkêḅ da ya ti sêtoc Anötö sa yêc lôm dabuḅ. ḅac gitôm dom bu sênemlhi gêḅ bu sêkêḅ ti da, me sênemlhi takis lôm dabuḅ-ḅga ḅa mone akêḅ ḅac si gameḅ, ma bocdinaḅ lau ḅatô sêkôm gwelen yêc lôm dabuḅ ma sêô ḅac si mone ḅa mone naḅ gitôm bu sênemlhi gêḅ-ḅga. † **21:12:** Lau ḅalôm sawa naḅ gitôm dom bu sênemlhi domba bu sêkêḅ ti da, naḅ semlhi balusi bu sêkêḅ ti da. (Alic Lev 5:7; 12:6; 14:22; ma Luk 2:22-24).

13 Ma in sôm, “Sêto Anötö ndê yom yêc, nan sôm, ‘*Aneŋ andu gic waê bu lau sêteŋ mbec sêmboneŋga.*’ Tigeŋ mac akôm Anötö ndê andu ti lau kaŋ si gameŋ.”

14 Lau bôliŋ ti lau tapec sêtêŋ Yisu si yêc lôm dabuŋ ŋamakê, ma in kôm ŋac ŋayham sa.

15 Ma balêkoc nan sêmboneŋ gameŋ dinaŋ, n aŋ sêmbwêc yom bocdec, “Hosana têŋ Dawid ndê Atu!” Magoc têŋ ndoc dabuŋsiga atu-tu ma kêdôhônwaga yomsu-ŋga sêlic gêŋ dalô nan Yisu kôm, ma sêŋgô balêkoc dau si yom, dec kôm ŋac atac ŋandê atu.

16 Ma sêndac in, “Am ŋgô balêkoc dindec sêmbwêc yom so, me?” Ma in sôm, “Mba! Sêto yom yêc bocdec bu, ‘*Anötö kêyalin balêkoc ti lau sauŋ sa, tu bu sêhoc in ndê waê asê-ŋga.*’ ”

17 Tiŋambu Yisu hu ŋac siŋ ma sa yêc malac Jerusalem gi, ma têŋ ôbwêc dinaŋ in yêc malac Betani.

*Yisu pucbo a kin daŋ
(Mak 11:12-14, 20-24)*

18 Têŋ bêbêc ganduc Yisu kêsêlêŋ bu mbu têŋ Jerusalem ndi, ma gêŋ yô in.

19 Ma in gêlic a kin daŋ kalhac seŋ ŋamakê, goc têŋ a dau gi ma kêsâlê a ŋandô. Tigeŋ a dau ŋandô mba, in tap ŋalaun ŋambwa sa. Dec in pucbo a dau ma sôm, “Am oc nem ŋandô tiyham dom!” Ma ŋagahô a dau mbac.

20 Têŋ ndoc ŋgacsêŋjomi sêlic gêŋ dau, dec sêhêdaê ma sêndac dandi, “Bocke dec a dindê mbac ŋagahô?”

21 Ma Yisu ô yom ma sôm, “Aö wasôm yom ñandô têtj mac. Akêtj whiñ, ma atac lu-lu pi Anötö ndê ñaclai dom. Ma mac oc atôm bu akôm tôm nañ aö gakôm têtj a dindê. Ma mac oc atôm bu akôm gêtj dalô atu-tu ñatô whiñ. Oc nditôm mac asôm têtj lôc dindê bu, ‘Puc daôm sa, ma sip gwêc ñalôm ndi,’ ma gêtj dau oc ñandô sa.

22 Mac bu akêtj whiñ, goc gêtj nañ mac atetj têtj Anötö, nañ iñ oc kêtj têtj mac.”

*Gêndac pi Yisu ndê ñaclai ñahu
(Mak 11:27-33; Luk 20:1-8)*

23 Yisu têtj lôm dabuñ gi, ma kêdôhôn lau mbo lôm ñamakê, ma dabuñsiga atu-tu ti lau bata Israel-ña sêtêtj iñ si. Ma sêndac iñ, “Am kôc ñaclai yêc nde, bu kôm gêtj hon nañ am kôm? Asa kêtj têtj am?”

24 Ma iñ sôm, “Gêtj ñamata-ña aö wakêtj gêndac dan têtj mac. Mac aö anetj yom muñ, goc wasôm anetj ñaclai ñahu asê têtj mac.

25 Mac asôm têtj aö, asa kêtj ñaclai têtj Jon, dec iñ kêku lau? Anötö kêtj ñaclai têtj iñ, me mba?”

Goc ñac sem yomgalôm pi Yisu ndê gêndac, ma sêsôm têtj dandi, “Yac bu dasôm bu Anötö kêtj ñaclai têtj Jon, goc iñ oc ndac yac, “Tu sake-ña mac akêtj whiñ Jon dom?”

26 Magoc yac bu dasôm bu Jon kêku lau kêkuc ñamalac nom-ña si gauc ñambwa, dec lau oc sêkôm yac ñayom, ñahu bu sêlic Jon bu Anötö ndê propet dan.”

27 Bocdinañ sêsôm têtj Yisu, “Yac añyalê dom.” Ma iñ sôm têtj ñac, “Ma bocdinañ aö wasôm anetj ñaclai ñahu asê têtj mac dom.”

Yom gôliñ pi balê lu

28 Goc Yisu sôm têtj ñac, “Akôc gauc pi yom din-dec. Ngac dañ ti inñ ndê atu lu sêmbo. Têtj bêc dañ inñ ndac balê dañ bocdec bu, ‘Aneñ balê, kwahic dec aö bu wandac am bu sôc ôm wain-ñga ndi ma nem gwelenj.’

29 Ma balê dau sôm, ‘Mba, aö gatec!’ Tigenñ tinjambu inñ kac ndê ñalôm kwi, ma sôc ôm gi ma gêm gwelenj.

30 Ma damba gi tap balê tilu-ñga sa, ma ndac inñ bu nem gwelenj ôm-ñga. Ma inñ sôm, ‘Aêc, oc wandi.’ Tigenñ tinjambu inñ tec ma gi dom.”

31 Dec Yisu ndac ñac, “Mac gauc gêm sake? Balê lu si asa kôm tôm damba tac whinñ?” Ma sêsôm, “Balê ñamata-ñga.” Goc inñ sôm têtj ñac, “Yomandô aö wasôm têtj mac. Lau nañ sêkôc takis ma lauwhê señ-ñga sêsôc Anötö ndê gôlinñ ñapu, sêhôt gêlêc mac lau dabuñsiga ti lau bata su.

32 Bu Jon hôt asê mac bu tôc lêtj gitêtj têtj mac, tigenñ mac akêtj whinñ inñ dom. Lau nañ sêkôc takis ma lauwhê señ-ñga sêkêtj whinñ inñ ndê yom ma sem dau kwi. Ma têtj têtj mac alic gêtj nañ lau dau sêkôm, nañ mac am daôm kwi dom, ma akêtj whinñ dom.”

*Yom gôlinñ pi lau sêyob ôm wain-ñga
(Mak 12:1-12; Luk 20:9-19)*

33 Ma Yisu sôm, “Anğô yom gôlinñ dañ tiyham. Ngac dañ sô ôm wain-ñga dañ, sô tunñ kêtjihi, kêmaseñ gameñ sêmaseñ wain ñakwi-ñga, ma kwê andu baliñ dañ, bu lau sêlhac ma sêtjip lau kañ. Goc inñ kêtj ôm dau têtj lau ñatô sêyob, ma kôlhô gi mbo gameñ dañ.

34 Têñ ndoc sêhoñ ôm dau ñandô sa-ñga, nañ in kênin lau akin ñatô sêtên lau sêyob ôm-ñga si, bu sêkên wain ñandô ñatô têtñ ñac.

35 Magoc ñac sêlô lau akin dau dôñ. Sic ñgac akin dan ñamlic ñandê, sic dan ndu, ma sêtuc dan ña hoc.

36 Ma tinambu ôm ñadau kênin lau akin tonñ hic atu tiyham, magoc lau nañ sêyob in ndê ôm, nañ sêkôm mêtê kain tigen têtñ ñac.

37 Tinambu in kênin in ndê atunñac têtñ ñac gi, bu in gauc gêm bu ñac oc sêtoc in ndê atu dau sa.

38 Tigen têtñ têtñ lau sêyob ôm-ñga sêlic ñadau ndê atu dau kêsêlên meñ, nañ sêsôm têtñ dandi, ‘Balê kêlê oc wêkain ôm dindéc ti ndê gên lêsêm. Bocdinañ dandic in ndu, ma dakôc ôm dindéc su ti yac neñ.’

39 Goc sêlô in dôñ ma sêhê in sa awê gi, ma sic in ndu.”

40 Yisu gic bata yom gôlin dau, ma ndac, “Têtñ ndoc ôm ñadau mbu meñ, nañ in oc kôm sake?”

41 Ma sêsôm têtñ in, “Ôm ñadau oc ndic lau sac dinañ ndu, ma kên ndê ôm têtñ lau ñatô sêyob. Ma ñac oc sêkên ôm ñandô têtñ in têtñ ndoc sêhoñ ñandô sa-ñga.”

42 Goc Yisu sôm têtñ ñac, “Gauc nem yom nañ sêto yêc bocdec bu, ‘Hoc nañ lau sêkwê andu-ñga sêtéc, nañ kwahic dec ti hoc ñamata-ñga yêc andu dau. Pômdau kôm gên dau, ma yac alic ñayham.’ Mac asam yom dau su, me mba?

43-44 [Asa nañ peñ tu hoc dinañ-ñga, nañ oc ninña, ma hoc dau bu peñ pi ñamalac, dec oc sec in popoc.] Bocdinañ aô wasôm têtñ mac, bu Anötö oc señ mac su bu ayob lau nañ sêmbo in ndê gôlin ñapu, nañ

tiyham dom. Ma in oc ênyalin lau natô sa bu sêyob in ndê lau, nan oc sêkôm gwelen napep ma sênem nandô nayham.”

⁴⁵ Dabuŋsiga atu-tu ti lau Palêsai sêngô Yisu ndê yom gôlin dinan, ma sênyalê bu yom dau hêganôn nâc.

⁴⁶ Dec sênsalê lên bu sêkôc in dôŋ, magoc sêtôc lau, bu lau hon sêlic in bu propet dan.

22

Yom gôlin pi mwasiŋ atu (Luk 14:16-24)

¹ Ma Yisu sôm yom gôlin dan tiyham têŋ nâc bocdec bu,

² “Nalên nan Anötö kêgalêm lau sa bu sêmbô in ndê gôlin nâpu, nan bocdec. Kin dan kêmasan mwasiŋ atu dan tu in ndê atunŋac nan bu nem awhê-nâga.

³ Ma in kêkin in ndê lau akin bu sêkêŋ ahen lau nan sic waê bu sênen mwasiŋ dau. Magoc nâc hon sêtec bu sêmen.

⁴ Goc in kêkin lau akin natô ma sôm, ‘Mac asa andi asôm têŋ lau nan aô kagalêm nâc sa su, bu aô kamasan gêŋ hon pacndê su. Anen lau sic makao tôp nayham ndu su, bocdinan dec amen anen mwasiŋ dau.’

⁵ Tigen lau hon sêtec in ndê yom dau, ma sêmbô si gêŋ. Natô sêsôc ôm si, ma natô sem si gwelen awa-nâga.

⁶ Ma natô sêlô Kin ndê lau akin dôŋ, sêkôm natô nayom, ma sic natô ndu.

⁷ Goc Kiñ dau tac ñandê atu. Ma in kênin in ndê lau sin-nga ma ñac sic lau sac dinan ndu. Ma sêkên ya gên ñac si malac hon su.

⁸ “Goc in sôm tên ndê lau akin, ‘Aö kamasan gên hon su. Magoc aö galic lau nan aö kagalêm ñac sa, nan gitôm dom bu sênen mwasin dau.’

⁹ Bocdinan asa sen malac-nga andi, ma angalêm lau bocke nan mac bu atap sa, nan sa sêmen ma sênen mwasin dau.’

¹⁰ Goc ñac sêsa sen si ma sênşalê lau, ma sêhon lau daêsam sa, lau ñayham ma lau sac sêwhin sêmen, e andu ñalôm atu sênen mwasin-nga menhu.

¹¹ “Tên ndoc Kiñ men bu lic in ndê ñaclen dinan, dec in gêlic ñac dan nan sôc ñakwê mwasin-nga dom.

¹² Ma in ndac, ‘Bocke dec am sôc mwen, magoc am sôc ñakwê mwasin-nga dom?’ Ma ñac dau ndê yom mba.

¹³ Goc Kiñ sôm tên in ndê lau akin, ‘Mac asô in ndê amba ti gahi dôñ, ma atuc in sa awê ndi mbo gamen ñasec-nga. Yêc dê lau oc sêtan atu ti lhô êñsin pi dau.’ ”

¹⁴ Goc Yisu gic bata yom dau ma sôm, “Anötö kêgalêm lau daêsam sa, magoc in oc kôc ñac hon sa dom.”

*Lau bu sêtim Yisu pi yom takis-nga
(Mak 12:13-17; Luk 20:20-26)*

¹⁵ Tên dinan lau Palêsai sêsa si, ma sêmasan yom bu sêtim Yisu bu sôm yom so dan.

¹⁶ Goc sênkin ñac si lau ñatô sêwhin lau Israel-nga ñatô nan sêpuc Herod ma lau Rom-nga si gôlin dôñ, nan sêtên in si, ma sêsôm tên in, “Kêdôhônwaga, yac

anÿalê bu am ñgac sôm yom ñandô-ñga, ma bu am whê Anötö ndê lêñ sa ti yom ñandô. Ma am gauc gêm lau si waê dom, magoc toc ñac hoñ sa ñalêñ tigenÿ.

¹⁷ Boc-dinañ sôm asê têtñ yac. Solop bu dakêñ takis têtñ †Sisa, me mba?”

¹⁸ Yisu kêyalê su bu ñac bu sêtim inÿ, dec sôm, “Mac lau daêtim-ñga! Tu sake-ñga mac bu atim aö?”

¹⁹ Atôc mone anemlhi takis-ñga danÿ têtñ aö.” Goc sêkêñ denarias tigenÿ têtñ inÿ.

²⁰ Ma inÿ ndac ñac, “Asa ndê ñagatu ti ñaê yêc mone dindec?”

²¹ Ma sêsôm, “Sisa ndê.” Goc inÿ sôm, “Bocdinañ atoc Sisa sa ña gêtñ nanÿ gic inÿ ñawaê, ma atoc Anötö sa ña gêtñ nanÿ gic inÿ ñawaê.”

²² Têtñ ndoc sêñgô Yisu ndê yom dinañ, nanÿ sêhêdaê tu inÿ ndê gauc-ñga, ma sêhu inÿ siñ ma sêlhö si.

Lau Sadiusi bu sêtim Yisu pi yom datisa akêñ lau batê-ñga

(Mak 12:18-27; Luk 20:27-40)

²³ Têtñ bêc dinañ lau ñatô akêñ Sadiusi si tonÿ sêtêtñ Yisu si bu sêkêñ gêndac têtñ inÿ. Lau dau sêkêñ whinÿ bu dom lau batê oc sêtisa tiyham.

²⁴ Ma sêsôm têtñ inÿ, “Kêdôhônwaga, Moses to yom pi ñgac nanÿ gêm awhê sa su magoc mbac ndu ma inÿ ndê balêkoc mba. Moses ndê yom sôm têtñ yac bu ñgac dau ndê asi nem awhê sawa dau, ma kwê balêkoc asê tu dôwa-ñga.

²⁵ Têtñ ndoc danÿ, asidôwa 7 sêmbo sêwhinÿ yac. Ñgac ñamata-ñga gêm awhê sa magoc inÿ mbac ndu

ma balêkoc mba. Ma ñgac tilu-ñga gêm dôwa ndê awhê sawa.

²⁶ Magoc in mbac ndu, ma ñalên tigen ñgac titö-ñga sip e gi tên ñgac ñambu-ñga ñac sem awhê sawa, magoc sêmbac ndu ma balêkoc mba.

²⁷ Ma tiñambu awhê dau mbac ndu.

²⁸ Kwahic dec yac bu andac am bocdec bu. Lau batê bu sêtisa tiyham tôm lau ñatô sêsôm, goc awhê dau oc ti asidôwa 7 dinañ si asa nawhê? Bu ñac hon sem in su tên ndoc sêmbo tali.”

²⁹ Goc Yisu ô yom ma sôm, “Mac akôc gauc so, bu mac aňyalê Anötö ndê yom ti in ndê ñac lai dom.

³⁰ Tên têm ñambu-ñga nañ lau batê sêtisa, nañ lau oc sênem dau dom. Ñac oc sêmbo sêtôm aňela undambê-ñga.

³¹ Ma yom dañ tiyham tôle asê bu lau batê oc sêtisa. Gauc nem Anötö dau ndê yom, nañ mac asam su.

³² In sam dau bu Abraham, ma Aisak, ma Jakob si Anötö. Lau batê bu sêtisa dom, dec tu sake-ñga Anötö sam dau bu lau tö dinañ si Anötö? In lau batê si Anötö dom, in lau tali si Anötö.”

³³ Ñalên dinañ Yisu kédôhôn lau, ma lau hon nañ sêngô in ndê yom dinañ sêhêdaê.

Yomsu ñamata-ñga

(Mak 12:28-34; Luk 10:25-28)

³⁴ Lau Sadiusi sêngô Yisu ndê yom dinañ ma ñac si yom mba. Ma lau Palêsai sêngô gên dau ñawaê, goc ñac si lau ñatô sêtên Yisu si.

³⁵ Ñac si dañ in gwalam akwa yomsu-ñga ma in bu êñsahê Yisu dec ndac in bocdec bu,

³⁶ “Kédôhôn-waga, yêc Moses ndê buku, yomsu bocke ti yomsu ñamata-ñga?”

³⁷ Ma Yisu ô yom ma sôm, “Yomsu nanj sôm, ‘*Am atac whiñ Pômdau am nem Anötö, ti nem ñalôm sambuc, ma ti gatôm sambuc, ma ti nem gauc sambuc.*’

³⁸ Yomsu dinañ tinjamata ma hóc gêlêc yomsu ñatô hoñ su.

³⁹ Ma yomsu tilu-ñga nanj gitôm ñamata-ñga, nanj sôm, ‘*Atac whiñ nem asidôwai gitôm am atac whiñ daôm.*’

⁴⁰ Yomsu lu dinañ sêpiñ yom hoñ nanj Moses ti lau propet sêto, nanj dôñ sêpitigeñ.”

*Yisu kêsahê lau si gauc pi Mesaya
(Mak 12:35-37; Luk 20:41-44)*

⁴¹ Lau ñatô akêñ Palêsai si toñ sêlhac dinañ, dec Yisu ndac ñac,

⁴² “Mac asôm sake pi Mesaya? Inj asa ndê atunjac?” Ma sêsôm têtñ inj bu, “Mesaya inj Dawid ndê Atu.”

⁴³ Goc Yisu sôm, “Ma bocke Dawid dau sam Mesaya bu inj dau ndê Pômdau? Nalau Dabuñ puc Dawid dôñ, dec inj to yom yêc bocdec bu,

⁴⁴ ‘*Anötö sôm têtñ aneñ Pômdau, “Am ndöc aö aman andô-ñga e nditôm aö wakêñ nem ñacyo sêsôc am gahim ñapu.”*’

⁴⁵ Bocdinañ Dawid dau sam Mesaya bu Pômdau, ma bocke mac asam Mesaya bu Dawid ndê Atu?”

⁴⁶ Ma ñac si dañ gitôm dom bu ô inj ndê yom. Ma tinjambu lau hoñ sêtöc dau bu sêkêñ gêndac têtñ inj tiyham.

23

*Yisu pu lau bata Israel-ñga
(Mak 12:38-39; Luk 13:34-35; 20:45-46)*

1 Goc Yisu sôm têḡ lau daêsam naḡ sêkac dau sa sêmbo, ma têḡ iḡ ndê ḡgacsêḡjomi bu,

2 “Lau Palêsai ti lau †Skraib sêndôhônḡ Anötö ndê yomsu têḡ lau, tôm Moses kôm têḡ têm ḡamata-ḡga.

3 Bocdinaḡ asôc ḡac ḡapu, ma aḡḡô ḡac si yom. Magoc aḡkuc ḡac si mêtê dom, bu ḡac lau sêtim yom lau-ḡga. Sêsôm yom ḡayham-ḡayham, magoc ḡac dau sêḡkuc si yom dau dom.

4 Ma yomsu daêsam naḡ sêkêḡ têḡ lau, naḡ kêḡ ḡawapac atu têḡ ḡac, magoc ḡac dau sêkôm ḡêḡ daḡ tu sênem lau dau sa-ḡga dom.

5 “Ma ḡêḡ hoḡ naḡ ḡac sêkôm, naḡ sêkôm yêc lau si aḡḡô-ḡga tu sêtoc dau sa-ḡga. Yomsu ti apanḡ naḡ sêkic pi dau, naḡ sêmasaḡ atu-tu tu lau sêlic-ḡga, ma sêsôc ḡakwê ti ḡabala baliḡ.*

6 ḡac atac whiḡ bu sêndöc lau tiwaê si pônḡ yêc lau si mwasinḡ ḡalôm, ma yêc lôm wê-ḡga.

7 ḡac tac whiḡ bu lau sêhê mwalêc ḡac yêc malac lôm, ma bu lau hoḡ sêtoc ḡac sa ma sêsam ḡac bu ‘Kêdôhônḡwaga.’

8 “Magoc aḡkuc ḡac si mêtê dom. Mac hoḡ ambo nom atôm asidôwai, ma mac nem kêdôhônḡ-waga tigeḡ mbo. Tu dinaḡ-ḡga solop dom bu lau sêsam mac bu ‘Kêdôhônḡwaga.’

9 Ma asam lau nom-ḡga bu mac nem damami dom, bu mac nem Damam tigeḡ mbo undambê.

* **23:5:** Lau Palêsai sêto yomsu ḡatô sip bapia ma sêkêḡ sip apanḡ saḡ, goc sêkic pi si sêcbala ti amba têḡ ndoc sêteḡ mbec. ḡac gauc ḡêm bu Anötö ḡic yomsu ḡac bu sêkôm bocdinaḡ - alic Eks 13:9, 16; Diut 6:4-9; ma 11:13-21. Ma sêsôc ḡakwê ti ḡabala bu sêtoc asê bu ḡac lau sem akiḡ Anötö-ḡga - alic Nam 15:37-41. Magoc lau Palêsai ti lau Skraib sêmasaḡ apanḡ atu, ma ḡakwê ti ḡabala baliḡ, tu bu sêtoc dau sa ma sêhóc ḡêlêc lau ḡatô su-ḡga.

¹⁰ Ma mac nem ɲadau tigen ɲ mbo, naɲ Mesaya, dec solop dom bu lau sêsam mac bu ɲac si ɲadau.

¹¹ Asa naɲ gêm akiɲ mac, naɲ ti ɲamalac ɲamata-ɲga yêc Anötö aɲgô-ɲga.

¹² Bu asa naɲ toc dau sa, naɲ Anötö oc êɲgwiniɲ iɲ, ma asa naɲ kêgwiniɲ dau, naɲ Anötö oc toc iɲ sa.

¹³ “Oyaê mac lau Skraib ti Palêsai! Mac lau atim yom lau-ɲga! Mac nem lêɲ kalhac lau ahuc bu sêsôc Anötö ndê gôliɲ ɲapu dom. Mac daôm asôc iɲ ɲapu dom, ma lau naɲ tac whiɲ bu sêsôc iɲ ɲapu, naɲ mac alhac ɲac ahuc. [

¹⁴ Oyaê mac lau Skraib ti lau Palêsai, mac lau atim yom lau-ɲga. Mac aten ɲmbec baliɲ bu atoc daôm sa yêc lau si aɲgô-ɲga, magoc têtɲ ndoc lau sêlic mac dom, naɲ mac aɲsau lauwhê sawa bu aɲgaho ɲac si andu su. Tu dinaɲ-ɲga Anötö oc kêɲ ɲagêyô sac sambuc têtɲ mac.]

¹⁵ “Oyaê mac lau Skraib ti Palêsai! Mac lau atim yom lau-ɲga! Mac aɲsêlêɲ seɲ baliɲ yêc b aô ma yêc gwêc, bu atap sêɲom daɲ sa tu êɲkuc mac-ɲga. Mac Sadaɲ ndê lau mac! Ma têtɲ ndoc mac ahê sêɲom daɲ kêkuc mac, naɲ mac akôm iɲ ti Sadaɲ ndê balêkoc daɲ, hôc gêlêc mac daôm su.

¹⁶ “Oyaê! Mac bu atôc seɲ têtɲ lau ɲatô, magoc mac daôm tampec. Têtɲ ndoc lau sêsôm yom pi lôm dabuɲ tu bu sêpuc si yom dôɲ-ɲga, naɲ mac asôm bu ɲac si yom iɲ yom ɲambwa. Magoc têtɲ ndoc sêsôm yom pi gôlôn gol naɲ yêc lôm dabuɲ tu bu sêpuc si yom dôɲ-ɲga, naɲ mac asôm bu yom dau tidôn su, ma gitôm dom bu sêseɲ su.

¹⁷ Mac lau tampec, gauc mbasi. Gêɲ sake hôc gêlêc su? Gol, me lôm dabuɲ naɲ kôm gol dau ti

gêñ dabuñ?

¹⁸ Ma lau bu sêsôm yom pi alta nañ kalhac lôm dabuñ tu bu sêpuc si yom dôñ-nga, nañ mac asôm bu ñac si yom in yom ñambwa. Magoc ñac bu sêsôm yom pi da nañ kalhac alta ñahô, nañ mac asôm bu yom dau tidôn.

¹⁹ Mac lau tampec! Gêñ sake ti gêñ ñamata-nga? Da, me alta nañ kôm da dau ti dabuñ?

²⁰ Asa nañ sôm yom pi alta, nañ sôm pi alta ma pi gêñ hoñ nañ kalhac alta ñahô whiñ.

²¹ Ma asa nañ sôm yom pi lôm dabuñ, nañ sôm pi lôm dau, ma pi Anötö nañ ti lôm dabuñ ñadau, nañ whiñ.

²² Ma asa nañ sôm yom pi undambê, nañ sôm pi Anötö ndê pôn atu, ma pi Anötö nañ ndöc pôn ñahô, nañ whiñ.

²³ “Oyaê mac lau Skraib ti Palêsai. Mac lau atim yom lau-nga! Mac awhê gêñ sauñ-sauñ ôm-nga hoñ kôc gi toñ amanlu, ma akêñ toñ dan ti da. Magoc mac ahu mêtê ñandô yomsu-nga siñ. Mêtê atu hêganôn mac tamwalô lau, ma amatôc lau si yom ñalêñ gitêñ, ma akôm nem yom ñandô sa. Mêtê hoñ dinañ in gêñ atu! Solop bu mac akôm gêñ sauñ-sauñ tôm yomsu sôm, magoc akôm gêñ atu-tu whiñ.

²⁴ “Mac lau tampec nañ akôm bu atôc señ têt lau ñatô. Mac atôm lau nañ sêhêgo dau bu sêngati gêñ golop atêc nañ poc bu ñahô, nañ sa, magoc gêñ ñadômbwi atu nañ poc bu dau ñalôm, nañ sêlic apu.

²⁵ “Oyaê mac lau Skraib ti Palêsai, mac lau atim yom lau-nga! Mêtê tamgatu gêñ ti aneñ gêñ ñawahô-nga hôc mac nem ñalôm ahuc. Bocdinañ

mac atôm laclhu ti pele nan sêngwasinj ñadômbwê-
nga ñambwa ñawasi sa.

²⁶ O lau Palêsai, mac lau tampec! Gêñ ñamata-
nga anğwasinj laclhu ti pele ñalôm ñawasi sa, goc gêñ
awê-nga oc ñawasi sa bocdinañ.

²⁷ “Oyaê mac lau Skraib ti Palêsai, mac lau atim
yom lau-nga! Mac atôm sêhò nan sêsê pen pi gi
e ñawasi sêp sambuc ma lau sêlic ñayham. Magoc
yêc sêhò dau ñalôm lau batê si ñakwa ti gêñ mbôp
meñhu.

²⁸ Ma mac lau daôm bocdinañ. Lau sêlic gêñ awê-
nga nan mac akôm, dec gauc gêm bu mac lau gitêñ.
Magoc yêc mac nem ñalôm, mêtê tasan ma mêtê
anğili yomsu-nga hóc mac ahuc.

²⁹ “Oyaê mac lau Skraib ti Palêsai, mac lau atim
yom-nga! Mac amasan sêhò ti gôlôn atu, tu bu atoc
lau propet ti lau gitêñ nan mac apami sic ndu mun
su, nan sa.

³⁰ Ma mac asôm bu mac bu ambo têñ apami si
têm, dec mac oc anğuc ñac si lêñ sêkêc propet dau si
dac sin-nga dom.

³¹ Mac nem yom dinañ tôc asê bu mac asa akêñ
lau Israel-nga nan sic lau propet ndu.

³² Bocdinañ dec mac akôm mêtê sac tôm apami
sêkôm.

³³ Mac mboc, ma mboc ñatui mac! Gitôm dom bu
mac awê Anötö ndê matôc sa. Inj oc êñkinj mac asip
lambwam andi.

³⁴ “Anğô! Aô wanğinj lau propet ma lau tigauc,
ma lau ñatô bu sêndôhôn mac. Magoc mac oc andic
ñac lic ñandê yêc mac nem lôm wê-nga, ma ambulu
ñac alom-alom malac. Ma ñac si lau ñatô mac oc
andic ndu, ma andic ñatô pi a gicso dau sêndi.

³⁵ Bocdinaŋ mac oc atap ŋagêyô sa tu lau gitêŋ hoŋ si dac, naŋ apami sêkêc siŋ-ŋga. Abel iŋ ŋgac ŋamata-ŋga, ma Berekaya ndê atu Sekaria iŋ ŋgac ŋambu-ŋga.† Sekaria iŋ ŋgac naŋ sic ndu yêc lôm dabuŋ ma alta naŋ kalhac lôm dau ŋasactô, naŋ ŋalhu.

³⁶ Yomandô wasôm têŋ mac. Mac lau têt dindéc-ŋga oc atap matôc sa pi lau hoŋ dinaŋ si dac.

³⁷ “O Jerusalem, Jerusalem. Mac ac Anötö ndê lau propet ndu, ma lau gitêŋ naŋ iŋ kêkiŋ têŋ mac, naŋ mac atuc ŋa hoc ndu. Ndoc daêsam aö tac whiŋ bu wandic mac sa asôc Anötö ndê gôliŋ ŋapu tiyham, gitôm mbac dalec dinda gic ŋatu sa sêsôc ŋamakê ŋapu. Tigeŋ mac atec.

³⁸ Bocdinaŋ Anötö oc hu mac ti mac nem andu siŋ.

³⁹ Aö wasôm têŋ mac, bu mac oc alic aö tiyham dom e mac asôm, ‘Tampiŋ Mesaya naŋ meŋ gêm Pômdau aŋgô.’ ”

24

Yisu sôm yom pi lôm dabuŋ Jerusalem-ŋga (Mak 13:1-2; Luk 21:5-6)

¹ Yisu hu lôm dabuŋ ŋagameŋ siŋ ma bu êŋsêlêŋ ndi, ma iŋ ndê ŋgacsêŋomi sêtêŋ iŋ si. Ma sêsôm yom pi lôm dabuŋ ma pi gêŋ ŋayham hoŋ naŋ lau sêkwê yêc gameŋ dinaŋ.

² Magoc iŋ sôm, “Mac alic gêŋ hoŋ dindéc. Aö wasôm yom ŋandô têŋ mac, bu ŋacyo oc sêseŋ hoc

† **23:35:** Yisu sôm yom dinaŋ hêganôŋ lau gitêŋ hoŋ naŋ lau Israel sic ndu, naŋ sêto ŋamiŋ yêc Yom Lêŋsêm Akwa. Abel iŋ ŋgac ŋamata-ŋga - alic Gen 4:8, ma Sekaria iŋ ŋgac ŋambu-ŋga - alic 2 Kr 24:20-22.

hoj dindec su e hoc dan ndoc hoc dan nahô tiyham dom.”

*Gêñ wapac têm nambu-nga-nga
(Mak 13:3-13; Luk 21:7-19)*

³ Tinambu Yisu ndoc Lôc Olib, ma inj ndê ngacsêñomi tawasê sêtêñ inj si, ma sêndac, “Sôm têtñ yac, nawapac nan am sôm yom pi, nan oc hôc asê Jerusalem têtñ têm bocke? Ma gêtñ sake oc kêtñ puc yac bu am oc mbu mwen, ma bu bêc nambu-nga oc hôc asê?”

⁴ Goc inj sôm, “Ayob daôm napep bu lau dan sêtñsau mac dom.

⁵ Bu lau daêsam oc sêtñsau bu sênem aö anjôn ma sêsôm, ‘Aö Mesaya daun dec!’ Ma nac oc sêtñsau lau daêsam.

⁶ Ma têtñ ndoc mac anjô nawaê bu lau sic sinj têtñ dau me sêmasanj dau tu sêndic sinj-nga, nan asô dom. Bu gêtñ hoj dinañ gic waê bu menj hôc asê, magoc têm nambu-nga yêc dôn yêc.

⁷ Kinj nom-nga oc sêkêtñ kisa dau, ma lau gameñ danj oc sêndic sinj têtñ lau gameñ danj. Ma tôbôm ti tiyhô atu oc sêkôm gameñ natô tisac.

⁸ Gêtñ hoj dinañ oc ndic hu nawapac têm nambu-nga-nga gitôm awê nan kêsahê balêkoc tunj inj ma gêtñ dau gic hu nandê atu nan inj oc hôc tu kôc balêkoc-nga.

⁹ “Têtñ ndoc dinañ lau oc sêkôc mac dôn ma sêkôm mac nayom, ma sêndic mac nem natô ndu. Lau nom-nga hoj oc atac tec mac tu mac anjuc aö-nga.

¹⁰ Têtñ têm dinañ lau daêsam oc sêhu si sêkêtñ whinj aö sinj, ma nac oc sêhoc si lau natô asê ma sêtec dandi.

11 Ma propet tasanj daêsam oc sêhóc asê ma sêhsau lau daêsam.

12 Mêtê sac oc êhsôwec tiatu e lau daêsam oc sêhu mêtê atac whiņ asidôwai-ņga siņ.

13 Magoc asa naņ bu lhac ņanņa ma hu aö siņ dom e ndê têm pacndê, naņ oc tap Anötö ndê mwasiņ nem iņ si-ņga sa.

14 Ma bêc ņambu-ņga oc hóc asê dom, e lau sêhoc ņawaê ņayham pi Anötö ndê gôliņ asê, tôm nom ņagameņ sambob, ma lau honj sêņgô su.”

*Ñawapac gameņ Judia-ņga
(Mak 13:14-23; Luk 21:20-24)*

15 Ma Yisu gic têku yom ma sôm, “Propet Daniel hoc yom asê gwananj su, pi gêņ sac sambuc* naņ lau oc sêkêņ lhac lôm dabuņ, naņ oc kôm gameņ tisac.” (Asa naņ sam yom dindec, naņ kôc gauc pi ņapep, bu ņahu yêc siņ dau.)

16 “Têņ ndoc mac alic gêņ sac dinaņ, naņ mac lau honj naņ ambo gameņ Judia-ņga alhö api gameņ lôc-ņga andi.

17 Alhö ņagahô, ma gauc nem mac nem gêņ danj dom. Lau naņ sêndöc andu ņasactô, naņ sêsôc andu ņalôm bu sêkôc ņac si gêņ danj sa dom.

18 Ma ņac naņ sêmbo ôm, naņ bocdinaņ. Sêkac dau kwi bu sêkôc si gêņ ņatô dom.

* **24:15:** Alic Dan 9:27; 11:31; ma 12:11. Daniel ndê yom hêganôņ anötö tasanj Seus ndê gwam naņ Antiokus Epipanes kêņ kalhac lôm dabuņ têņ yala 168BC. Yisu ndê yom tóc asê bu gêņ kaiņ dinaņ oc hóc asê tiyham têņ têm ņambu-ņga. Lau ņatô gauc gêm bu yom dau hêganôņ lau Rom-ņga naņ sej lôm dabuņ popoc têņ yala 70AD. Ma lau ņatô gauc gêm bu yom dau hêganôņ gêņ naņ sêto yom pi yêc 2 Tes 2:4; ma Rev 13:14-15.

19 Oyaê. Lauwhê tidaê, ma ñac nañ sêkêñ su têtñ balêkoc, nañ oc sêtap ñawapac atu sa têtñ têtñ dinanñ.

20 Ateñ mbec bu têtñ ñawapac-ñga dinanñ tap ma sa têtñ ndoc uhô-ñga me têtñ bêc Sabat-ñga danñ dom.

21 Bu ñawapac têtñ dinanñ-ñga oc hôc gêlêc ñawapac hoñ su. Têtñ têtñ ñamata-ñga e meñ têtñ kwahic dec, ñawapac atu kainñ dinanñ danñ hôc asê su dom. Ma tiñambu ñawapac kainñ dinanñ oc hôc asê tiyham dom.

22 Anötö oc tawalô lau nañ inñ kêyalinñ ñac sa su, ma tu dinanñ-ñga inñ oc kêñ têtñ ñawapac-ñga dau tiapê. Bu mba, ma têtñ d au tibalinñ, goc lau hoñ oc sêniñga.

23 “Têtñ têtñ dinanñ, lau danñ bu sêsôm têtñ mac bu, ‘Alic, Mesaya dec meñ,’ me ‘Mesaya dau dê,’ nañ akêñ whinñ ñac dom.

24 Bu lau nañ sêñsau bu ñac Mesaya, ma propet tasanñ oc sêhôt asê sêmeñ, ma sêkôm gêtñ dalô atu-tu bu sêñsau lau. Ma ñac oc sêñsahê bu sêtinñ lau nañ Anötö kêyalinñ ñac sa, nañ sêwhinñ.

25 Anğô ñapep, bu aö gasôm gêtñ hoñ dindéc têtñ mac gwananñ.

26 Bocdinanñ, lau bu sêsôm, ‘Mesaya kêlê mbo gamenñ sawa,’ nañ asa andi dom. Ma bu sêsôm, ‘Mesaya kelec mbo andu danñ ñalôm,’ nañ akêñ whinñ dom.

27 Ñamalac ndê Atu oc mbu meñ ñagahô enñ, gitôm sickac nañ gic hep tigenñ, ma umbonñ ñasawa sambuc ñawê sa.

28 Mac bu alic macmponñ sêñgihi sêmbo, nañ añyalê bu gêtñ danñ mbac ndu yêc. Ma bocdinanñ gêtñ hoñ dindéc kêñ puc mac pi ndoc Ñamalac ndê Atu mbu meñ-ñga.”

*Namalac ndê Atu ndê bêc mbu meñ-nga
(Mak 13:24-31; Luk 21:25-33)*

²⁹ “T êñ ndoc ñawapac-nga dinañ pacndê, goc ac oc nem ganduc, ma ayô oc ñawê sa dom. Gêñ ti ñaclai nañ sêlhac umbonj oc wiwic sa, ma tata oc sêpeñ akêñ umbonj.

³⁰ Têñ ndoc dinañ lau titonj-titonj nom-nga honj oc sêlic gêñ dalô yêc umbonj, nañ kêñ puc ñac bu Ñamalac ndê Atu oc mbu meñ, ma ñac honj oc sêtañ dañgibo atu. Ma ñac oc sêlic Ñamalac ndê Atu dau meñ ndöc dao ñahô ti ñawasi ma ñaclai atu.

³¹ Goc inj oc êñkiñ inj ndê anjela sêndic dahuc tañ atu, ma sêsa sêtêñ nom ñabatinj ti undambê ñabatinj honj, bu sêndic lau nañ inj kêyalinj ñac sa su, nañ sa.

³² “Gauc nem a lañ. Têñ ndoc mac alic ñalauñ wakuc bu lêc, nañ anyalê bu ndoc ac-nga meñ kêpiñ.

³³ Ma bocdinañ têtñ ndoc mac alic gêñ nañ aö gasôm yom pi, nañ anyalê bu Ñamalac ndê Atu ndê bêc mbu meñ-nga meñ kêpiñ su, gitôm inj meñ kalhac gatam nem andu-nga.

³⁴ Yomandô! Lau têtñ dinañ-nga oc sêmbac ndu dom e gêñ honj dinañ hóc asê.

³⁵ Undambê ti nom oc niñga, magoc aneñ yom dañ oc niñga dom. Gêñ honj oc ñandô sa tôm aö gasôm.”

*Lau dañ sênyalê Yisu ndê bêc mbu meñ-nga dom
(Luk 17:26-36)*

³⁶ Ma Yisu sôm, “Ñamalac dañ kêyalê bêc me acgatu nañ Ñamalac ndê Atu oc mbu meñ, nañ dom. Anjela undambê-nga sênyalê dom, ma Anötö ndê Atu kêyalê dom. Damba tawasê kêyalê.

37 Têḅ ndoc ḅamalac ndê Atu mbu meḅ, naḅ lau oc sêḅbo tôm lau sêḅbo têḅ Noa ndê têm.

38-39 Têḅ ndoc dinaḅ, lau sêḅlhiḅ dau siḅ ma seḅ ti sêḅôm gêḅ, ma sem dandi e Noa sôc waḅ gi, ma bu suḅ meḅ ma seḅ ḅac hoḅ su siḅga. Ma lau nom-ḅga oc sêḅbo ḅalêḅ tigerḅ dinaḅ, têḅ ḅamalac ndê Atu ndê bêc mbu meḅ-ḅga.

40 ḅgac lu oc sêkôm gwelenḅ sêḅbo ôḅ, ma Anötö oc kôc iḅlu si daḅ sa, ma hu daḅ siḅ.

41 Ma awhê lu oc sêḅdê gêḅ sêḅbo, ma iḅ oc kôc daḅ sa, ma hu daḅ siḅ.

42 “Bocdinaḅ amasaḅ daôm ḅapeḅ, bu mac am gauc bêc bocke mac nem Pômdau oc mbu meḅ.

43 Gauc nem yom dindec. Andu ḅadau daḅ, bu êḅyalê ndoc naḅ ḅgac kaḅ daḅ oc meḅ, naḅ iḅ oc yob iḅ ndê andu bu ḅgac kaḅ dau sôc meḅ dom.

44 Ma bocdinaḅ, amasaḅ daôm tôm bêc hoḅ, bu ḅamalac ndê Atu oc mbu meḅ têḅ ndoc naḅ mac akêḅ batam, naḅ dom.”

*Yom gôliḅ pi ḅgac akiḅ ḅayham ma sac
(Luk 12:42-46)*

45 Ma Yisu sôm, “ḅgac akiḅ ḅayham ma ti gauc, iḅ ḅgac kainḅ bocdec. Iḅ ndê ḅadau bu lhö têḅ gamenḅ daḅ ndi, goc iḅ oc kêḅ iḅ yob lau akiḅ ḅatô, ma kêḅ gêḅ danenḅ-ḅga têḅ ḅac tôm ḅandoc.

46 Ma têḅ ndoc ḅadau mbu meḅ, ma tap iḅ sa kôm iḅ ndê gwelenḅ ḅapeḅ mbo, naḅ iḅ oc lic iḅ ḅayham ma kôm ḅayham têḅ iḅ.

47 Yomandô! ḅadau oc kêḅ iḅ yob iḅ ndê wapa hoḅ.

48 Magoc ḅgac akiḅ sac oc sôm têḅ dau, ‘Anenḅ ḅadau oc mbu meḅ ḅagahô dom.’

⁴⁹ Goc in oc ndic lau akin natô, ma sa ndi nôm ti neŋ gêŋ whin lau nan sênôm gêŋ êŋin ŋac-ŋga ŋapan.

⁵⁰ Nđau oc mbu meŋ hóc asê têŋ bêc ti acgatu nan ŋac akin dau kêŋ bata, nan dom.

⁵¹ Ma in oc kêŋ ŋagêyô sac sambuc têŋ in, ma soc in su ndi mbo whin lau sêtim yom lau-ŋga. Yêc dindê lau oc sêŋsahê ŋandê atu e sêtan ma lhô êŋsin pi dau ŋapan.”

25

Yom gôlin pi lauwhê akin amanlu

¹ Ma Yisu sôm yom gôlin dan bocdec bu, “Têŋ ndoc Nđamalac ndê Atu mbu meŋ bu nem gôlin gêŋ hon, nan lau natô oc sêmasan dau napep, ma lau natô oc mba. Oc tôm lauwhê akin amanlu nan sêkôc si lam ma sêsa si bu sêhôn ŋac nem awhê-ŋga, nan sêkêŋ bata bu oc meŋ.

² Nac si amanđan ŋac lauwhê tigauc, ma amanđan ŋac lauwhê gauc mbasi.

³ Lauwhê gauc mbasi dinaŋ sêkôc si lam, magoc sêkôc buya natô whin dom.

⁴ Ma lauwhê tigauc sêkôc si lam, ma sêkôc buya natô sip bu akôp tôhôn.

⁵ Nac sêhôn ŋac nem awhê-ŋga sêmbo, magoc in hóc asê ŋagahô dom e ŋac kwapac sa, ma sêyêc bêc.

⁶ “Timaninhu goc ŋac aheŋ-ŋga dan ta yom bocdec bu, ‘Oê! Nđac dau meŋ! Asa andi ma akôc in sa.’

⁷ Goc lauwhê akin sêtisa, ma sêmasan ŋac si lam.

⁸ Ma amanđan gauc mbasi dinan sêndac lauwhê tigauc bocdec, ‘Akêñ buya ñatô têtñ yac, bu yac mba lam sêmbac.’

⁹ Magoc ñac sêô yom ma sêsôm, ‘Mba! Mboe buya oc tôm yac hoñ dom. Magoc mac andi alic lau nan sêkêñ buya tu lau sênemli-ñga, ma anemli nem.’

¹⁰ Magoc têtñ ndoc sêlhô si bu sênemli buya, goc ñgac nem awê-ñga meñ hóc asê. Ma lauwhê akin nan sêmasan dau gwanan, nan sêwhiñ in sêsôc in ndê gamen si, bu sêneñ mwasin awê-ñga. Goc in gic gatam ahuc.

¹¹ Tiñambu lauwhê akin gauc mbasi dinan sêmbu sêmeñ ma sêmbwêc, ‘Ñadau! Ñadau! Lêc gatam su têtñ yac.’

¹² Magoc ñadau sôm, ‘Mba! Aô wasôm yomandô bu kayalê mac dom!’ ”

¹³ Yisu gic bata yom gôliñ dinan ma sôm, “Boc-dinan anem ali ma ayob daôm ñapep, bu mac anjalê bêc ti acgatu nan aô oc wambu wameñ, nan dom.”

*Yom gôliñ pi mone gol
(Luk 19:12-27)*

¹⁴ Ma Yisu sôm yom gôliñ dan tiyham pi têtñ ñambu-ñga bocdec bu, “Ñgac tiwaê dan bu sa têtñ gamen baliñ dan ndi. Bocdinan in mbwêc in ndê lau akin, ma kêtñ ndê gêtñ ñatô têtñ ñac bu sêyob e in mbu meñ.

¹⁵ In kêtñ mone gol nan sêsam bu talent* têtñ ñac, kêtñ ñac si licwalô ti ñac si gauc. In kêtñ talent

* **25:15:** Alic yom pi talent yêc Mat 18:24.

amanđan têtŋ ŋgac daŋ, ma talent lu têtŋ daŋ, ma talent tigenŋ têtŋ daŋ. Goc inŋ hu ŋac sinŋ ma kölhö gi.

¹⁶ Ma ŋgac akinŋ naŋ kôc mone amanđanŋ, naŋ gi kôm gwelenŋ pi mone dau e t ap mone amanđanŋ tiyham sa.

¹⁷ Ma inŋ naŋ kôc mone lu naŋ kôm boc-dinaŋ, ma tap mone lu tiyham sa.

¹⁸ Magoc ŋgac naŋ kôc mone tigenŋ, naŋ sa gi kwê sê daŋ ma sinŋ ŋadau ndê mone kwi yêc sê dau ŋalôm.

¹⁹ “Ŋasawa hic baliŋ gi su, goc lau akinŋ dinaŋ si ŋadau mbu meŋ, ma bu ŋgô ŋac si yom pi mone dau.

²⁰ Ma ŋgac naŋ kôc mone amanđanŋ, naŋ kôc amanđanŋ naŋ inŋ tap sa, naŋ whinŋ ma sôm, ‘Pômdau, am kêŋ mone amanđanŋ têtŋ aö gayob, ma lic, aö gakôc amanđanŋ tiyham.’

²¹ Goc ŋadau sôm, ‘O aneŋ ŋgac ŋayham, am kôm ŋayham. Am yob gêtŋ amanđanŋ ŋapep, dec wakêtŋ am yob gêtŋ daêsam. Mweŋ ma mbo whinŋ aö ti atac ŋayham.’

²² Ma ŋgac akinŋ naŋ kôc mone lu, naŋ meŋ ma sôm, ‘Pômdau, am kêŋ mone lu têtŋ aö gayob, ma aö gakôc mone lu tiyham whinŋ.’

²³ Ma ŋadau sôm, ‘O aneŋ ŋgac akinŋ ŋayham, am kôm ŋayham. Am yob gêtŋ lu ŋapep, dec wakêtŋ am yob gêtŋ daêsam. Mweŋ ma mbo whinŋ aö ti atac ŋayham.’

²⁴ “Têtŋ dinaŋ ŋgac naŋ kôc mone tigenŋ, naŋ meŋ ma sôm, ‘Pômdau, aö kayalê bu am ŋgac lêlê-ŋga dom, ma bu am oc kêŋ batam bu ndic gêtŋ ŋandô sa yêc gameŋ naŋ am daôm kêbalip gêtŋ ŋawhê me

sô gêñ dom.

²⁵ Bocdinañ aö gatöc daun ma kasalê lêñ bu am nem mone niñga dom, dec gasa ga gasiñ kwi yêc nom ñalôm. Lic, gêñ dau kelec.’

²⁶ Goc ñadau ô yom ma sôm, ‘Am ñgac sac solop! Am ñgac oyom. Am kêyalê su bu aö oc wandic gêñ ñandô sa yêc gameñ nañ aö gasô gêñ dom.

²⁷ Bocdinañ am gitôm bu kêñ aneñ mone têñ lau sêyob mone-ñga bu sêyob e aö wambu wameñ, dec oc tôm bu sêkêñ mone ñagec sac mone dau ñahô, ma aö wakôc hoñ sa.’

²⁸ Goc ñadau sôm têñ iñ ndê lau ñatô, ‘Akôc mone su yêc iñ, ma akêñ têñ ñgac nañ kôc mone amanñu.

²⁹⁻³⁰ Ma atin ñgac akind sac dindec sa awê ndi bu mbo gameñ ñasec-ñga nañ lau sêtañ, ma ñalhô êñsiñ pi dau. Bu asa nañ yob gêñ nañ gakêñ sip iñ amba, nañ ñapep, nañ wakêñ gêñ ñatô tiyham têñ iñ whiñ, ma iñ ndê gêñ oc ti daêsam. Magoc asa nañ yob ndê gêñ ñapep dom, nañ wakôc iñ ndê gêñ hoñ su.’ ”

Pômdau oc whê lau kôc têñ bêc ñambu-ñga

³¹ Goc Yisu sôm, “Têñ ndoc Ñamalac ndê Atu mbu meñ whiñ añela hoñ, nañ iñ oc ndöc iñ ndê pôñ kin-ñga ti iñ ndê ñaclai ma ñawasi atu undambê-ñga.

³² Ñac oc sêndic ñamalac hoñ sa sêlhac iñ añgô-ñga. Ma iñ oc whê ñac kôc gitôm ñgac yob domba-ñga, nañ whê iñ ndê domba ti naniñ kôc.

³³ Iñ oc kêñ domba sêlhac iñ amba andô-ñga, ma naniñ sêlhac gasê-ñga.

³⁴ “Dec Kin atu dau oc sôm têñ lau nañ sêlhac iñ amba andô-ñga, ‘Ameñ mac lau nañ Damañ gêlic mac ñayham. Ma andöc mac nem malam yêc

gamenj undambê-nga, nanj Damanj kêmasanj tu mac-nga têtj ndoc inj kêtj undambê ma nom. Dinanj ti mac nem gêtj lênsêm.

³⁵ Yom dinanj ña-ñandô inj bocdec. Têtj ndoc aö gêtj yô aö, nanj mac akêtj gêtj aö ganj. Ma têtj ndoc bu yô aö, nanj mac akêtj bu têtj aö ganôm. Aö ñgac apa, ma mac akôc aö sa ma ayob aö.

³⁶ Anenj ñakwê mba, ma mac akêtj têtj aö. Aö gêmbac, ma mac am yaom aö. Aö gandöc gapocwalô, ma mac amenj ac aö kêsi.'

³⁷ "Ma têtj dinanj lau gitêtj oc sêô yom ma sêndac, 'Pômdu, bocke? Têtj nde yac alic am gêtj yô am me bu yô am, ma yac akêtj gêtj danenj-nga me bu têtj am?"

³⁸ Ma têtj nde yac alic am ñgac apa, ma akôc am sa, me am pônnda ñakwê, ma akêtj têtj am?"

³⁹ Ma têtj nde yac alic am gêmbac me am ndöc gapocwalô, dec yac amenj alic am?"

⁴⁰ Goc Kinj atu dau oc ô yom ma sôm, 'Alic lau sêkêtj whinj-nga honj nanj sêti anenj asinj ti lhuñwêi. Yomandô wasôm têtj mac, bu gêtj bocke nanj mac akôm têtj ñac si ñamalac tiwaê me ñamalac waê-mba danj, nanj gitôm mac akôm têtj aö dauj.'

⁴¹ "Goc inj oc sôm têtj lau nanj sêlhac inj amba gasê-nga, 'Mac lau atap Anötö ndê atac ñandê sa-ñgal! Alhö su yêc aö, asip ya nanj sa ñapanj andi. Ya dau, Anötö kêmasanj gic Sadanj ti inj ndê anjela sac ñawaê.

⁴² Yom dinanj ña-ñandô inj bocdec. Aö gêtj yô aö, magoc mac akêtj gêtj danenj-nga têtj aö dom. Ma bu yô aö, magoc mac akêtj têtj aö dom.

⁴³ Aö ñgac apa, magoc mac akôc aö sa dom. Aö gapônnda ñakwê, ma mac akêtj têtj aö dom. Aö

gêmbac, ma gandöc gapocwalô, magoc mac amenj alic aö dom.’

⁴⁴ “Ma njac oc sêndac, ‘Pômdau, bocke? Têj nde yac alic am gêj yô am, bu yô am, am njac apa, am pônâ ñakwê, gêmbac kôm am, me am ndöc gapocwalô, ma yac am am sa dom?’

⁴⁵ Ma inj oc sôm, ‘Yomandô wasôm têj mac, bu têj ndoc mac alic anej lau tiwaê me lau waêmâ danj nanj pônâ dau, magoc am inj sa dom, nanj gitôm mac am aö dauj sa dom.’

⁴⁶ “Têj dinanj inj oc êjkinj njac sêtêj gamenj sêhôc ñandê-nga sêndi, bu sêmbo njapanj. Magoc lau gitêj inj oc kôc njac sa sêndöc tali njapanj.”

26

Lau bata sêkic yom bu sêndic Yisu ndu

(Mak 14:1-2; Luk 22:1-2)

¹ Yisu sôm yom honj dinanj su, goc sôm têj inj ndê njacsêjomi,

² “Bêc lu yêc dônj yêc tu lau Israel-nga sêlic om atu †Pasowa-nga. Ma lau oc sêkêj Ñamalac ndê Atu sip lau amba, bu sêndic inj ndu pi a gicso dau.”

³ Têj ndoc dinanj dabunjsiga atu-tu ti lau bata Israel-nga sic dau sa sêmbo †dabunjsiga ñamata-nga Kayapas ndê andu.

⁴ M a njac sêjnsalê lêj bu sêkôc Yisu dônj gelec ma sêndic inj ndu.

⁵ Magoc njac sêsôm, “Dakôm têj Mwasiñ Pasowa-nga ñandoc dom, mbo lau daêsam nanj sêmbo Jerusalem tu Pasowa-nga, nanj oc sêlic ma sêli dau sa.”

*Awhê danj gêm oso Yisu
(Mak 14:3, 9; Luk 7:36-50; Jon 12:1-8)*

⁶ Tinjambu Yisu mbo whinj ngac danj ñaê Saimon yêc malac Betani. Mun-nga inj ngac ti gêmbac lep-rasi.

⁷ Yisu ndöc tebo, ma awhê danj menj kôc bu ñamalu ñayham nanj ñaôli atu sip kac danj, ma kéc pi inj ñagôlôñ.

⁸ Yisu ndê ngacsêñomi sêlic gêñ dinanj ma tac ñandê. Ma sêsôm têtj dandi, “Tu sake-nga inj kêyainj gêñ ñamalu ñayham dinanj?”

⁹ Gitôm bu dakêñ têtj lau sênemlhi ña-awa atu, goc dakêñ têtj lau ñalôm sawa.”

¹⁰ Yi su kêyalê bu ñac sêsôm yom dinanj, goc sôm, “Akêñ ñawapac têtj inj dom! Inj kôm gêñ ñayham kêlêc têtj aö.”

¹¹ Lau ñalôm sawa oc sêmbo sêwhinj mac ñapanj. Tigen aö oc wambo wawhij mac ñapanj dom.

¹² Inj kéc gêñ ñamalu dec pi aö, tôm inj kêmasanj aö neñ ñamlic gwananj tu sêñsuhuj aö-nga.

¹³ Yomandô aö wasôm têtj mac, bu tinjambu lau oc sêhoc ñawaê ñayham asê yêc gameñ honj, ma têtj dinanj ñac oc sêsôm yom pi gêñ nanj awhê dindec kôm, ma lau oc gauc nem inj.”

*Judas sôm tidôñ bu hoc Yisu asê
(Mak 14:10-11; Luk 22:3-6)*

¹⁴ Têtj dinanj ngacsêñomi 12 si danj, ngac nanj sêsam bu Judas Iskeriot, nanj têtj dabunjsiga atu-tu gi,

¹⁵ ma ndac, “Aö bu wahoc Yisu asê têtj mac, goc mac oc akêñ sake têtj aö?” Dec sêlic ñayham ma semlhi inj ña mone silba 30.

16 Ma Judas gic hu kêsalê lêñ tu bu hoc Yisu asê-nga.

*Sêmasañ Mwasiñ Pasowa-nga
(Mak 14:12-16; Luk 22:7-13)*

17 Têñ †Mwasiñ Bolom Yist Mba-nga ñabêc ñamata-nga, nañ ñgacsêñomi sêtêñ Yisu si, ma sêndac in bocdec bu, “Am tac whiñ bu yac amasañ gamenñ tu danenñ Mwasiñ Pasowa-nga yêc nde?”

18 Goc in sôm yom pi ñgac malac Jerusalem-nga danñ, ma kêkiñ ñac sêtêñ in si ma sôm, “Asôc malac ma atêñ ñgac dau andi, ma asôm têt in, ‘Yac mba kêdôhônwaga sôm bu in ndê têt menñ kêpiñ su. Ma in bu neñ Mwasiñ Pasowa-nga whiñ in ndê ñgacsêñomi yêc am nem andu.’ ”

19 Bocdinañ ñgacsêñomi sêkôm tôm in sôm têt ñac, ma sêmasañ Pasowa.

*Yisu sôm bu ñgac danñ oc hoc in asê
(Mak 14:17-21; Luk 22:21-23)*

20 Têt òbwêc dinañ, Yisu ti ndê ñgacsêñomi 12 sêtêñ andu dau si, ma sêndöc sêwhiñ dau.

21 Ñac señ gêt sêmbo, ma in sôm, “Yomandô aö wasôm têt mac bu mac nem danñ oc hoc aö asê.”

22 Yom dau kôm ñac sêsö ma ñalôm ñawapac atu, ma ñac tigenñ-tigenñ sêsôm têt in, “Pômdau, mboe aö, a?”

23 Ma Yisu ô yom ma sôm, “In ñgac nañ alu añ gêt sip pele tigenñ, nañ oc hoc aö asê.

24 Gêt dau oc ñandô sa pi Ñamalac ndê Atu, tôm yom nañ sêto yêc. Tigenñ ñgac nañ bu hoc aö asê, nañ oc tap ñawapac atu sa, ma tu dinañ-nga in dinda bu kôc in dom, dec oc ñayham.”

25 Goc Judas, nañ oc hoc iñ asê, nañ sôm, “Kêdôhôn-waga, mboe aö, a?” Ma Yisu sôm, “Tôm nañ am daôm sôm.”

Yisu gic hu Mwasin Dabun
(Mak 14:22-26; Luk 22:15-20)

26 Têñ ndoc ñac señ gêñ sêndöc, nañ Yisu kôc bolom, gêm danje ma pô kôc-kôc. Goc iñ kêñ têtñ ñgac-sêñomi ma sôm, “Akôc loc ma aneñ. Aö neñ ñandô dau dec.”

27 Goc iñ kôc laclhu wain-ñga dan ma gêm danje, ma kêñ têtñ ñac ma sôm, “Mac hoñ akôc loc anôm.

28 Aneñ dac wamatiñ pwac-ñga dau dec. Wakêc siñ tu wasuc lau daêsam si sac kwi-ñga.

29 Aö wasôm têtñ mac bu aö oc wanôm wain tiyham dom e wanôm wawhiñ mac têtñ ndoc Daman ndê göliñ meñ sa tiawê.”

30 Tiñambu ñac sem wê dan ma sêsa sêtêtñ Lôc Olib si.

Yisu sôm gwanan bu Pita oc sêc iñ ahuc
(Mak 14:27-31; Luk 22:31-34)

31 Ma Yisu sôm têtñ ñac, “Tu gêñ nañ oc hôc asê aö têtñ ôbwêc dindec-ñga, dec mac hoñ oc ahu aö siñ, tôm yom nañ sêto yêc bocdec bu, ‘Aö wandic ñgac yob domba-ñga, ma domba oc sêlhö babalip.’

32 Magoc tiñambu aö oc watisa tiyham, ma wamuñ mac watêtñ gameñ Galili-ñga wandi.”

33 Ma Pita ô yom ma sôm, “Lau hoñ bu sêhu am siñ, magoc aö oc wahu am siñ dom.”

34 Goc Yisu sôm, “Aö wasôm yom ñandô têtñ am, têtñ ôbwêc dec am oc sêc aö ahuc tidim tö muñ, nañ goc dalec oc tañ.”

³⁵ Magoc Pita sôm têtj inj, “Mba! Gitôm sêndic aö ndu wawhiñ am, aö oc wasêc am ahuc dom!” Ma ñgacsêñomi hoñ sêsôm yom kainj tigenj.

*Yisu tej mbec mbo ôm Getsemani
(Mak 14:32-42; Luk 22:39-46)*

³⁶ Goc Yisu ti ndê ñgacsêñomi sêtêtj gameñ nanj sêsam bu Getsemani, nanj si. Ma inj sôm têtj ñac, “Andöc dec ma aö wasa dê wandi ma watenj mbec.”

³⁷ Goc inj kôc Pita, ma Sebedi ndê atu lu sêwhiñ inj si. Têtj ndoc dinanj inj ndê ñalôm ñawapac atu ma kedehe inj.

³⁸ Ma inj sôm têtj ñac, “Aö neñ ñalôm kêsahê ñawapac atu, kêpiñ bu oc wambac ndu. Andöc dec ma anem ali awhiñ aö.”

³⁹ Goc inj hu ñac siñ ma sa ahic gi, ma hu dau añgô andô têtj nom, ma tej mbec bocdec bu, “Damanj, aö wandac am bu nditôm, nanj goc kôc laclhu ñawapac-ñga dindéc su yêc aö. Magoc êmkuc aö neñ atac whiñ dom, kôm tôm am daôm nem atac whiñ bu kôm.”

⁴⁰ Inj tej mbec su, goc tisa ma mbu têtj ñgacsêñomi tö dinanj gi, ma gêlic ñac sêyêc bêc sêyêc. Inj unj ñac sa, ma ndac Pita, “Bocke? Mac atôm dom bu anem ali awhiñ aö gitôm acgatu ñasawa danj, a?”

⁴¹ A nem ali, ma atenj mbec bu lêtôm tap mac sa dom. Mac nem gatôm licbalê, tigenj ñamlic kwapac.”

⁴² Goc inj sa gi ma tej mbec tiyham ma sôm, “Damanj, am bu kôc ñawapac dindéc su yêc aö dom, nanj aö wahôc, ma wakôm am nem yom ñandô sa.”

⁴³ In tenj mbec dau pacndê, ma mbu gi tiyham ma gêlic ñac sêyêc bêc sêyêc. Ñac tandô hê ñac sa ñandô.

⁴⁴ Dec in hu ñac sinj ma sa gi tenj mbec tidim tö-nga, ma sôm yom tigenj dinanj tiyham.

⁴⁵ Pacndê, ma in mbu têtj ñgac-sêñomi gi, ma sôm têtj ñac, “Tu sake-nga mac ayêc bêc ma aŋwhañ daôm ñapanj? Aŋgô su nanj! Sêhoc Ñamalac ndê Atu asê su, ma ndoc meñ sa bu sêkêñ in sip lau sac amba.

⁴⁶ Atisa ma dandi, bu ñgac nanj hoc aô asê dec meñ su.”

Sêkôc Yisu dôtj

(Mak 14:43-50; Luk 22:47-53; Jon 18:1-11)

⁴⁷ Yisu sôm yom dinanj mbo, ma Judas, ñgacsêñomi 12 si danj, meñ hóc asê whinj lau daêsam nanj sêkôc bienj baliñ ti sinj. Dabuñsiga atu-tu ti lau bata Israel-nga sêñkinj lau dau sêwhinj Judas.

⁴⁸ Judas kêtj puc ñac gwananj su bocdec bu, “Ñgac nanj mac aŋsalê, nanj aô wanjutô in tu bu watôc in asê, ma mac akôc in dôtj.”

⁴⁹ Bocdinañ in têtj Yisu gi, ma sôm, “Ôbwêc, Kêdôhônjwaga,” ma ñgutô in.

⁵⁰ Ma Yisu sôm, “Aneñ silip, gêtj nanj am gauc gêm bu kôm, nanj kôm.” Têtj dinanj lau nanj sêwhinj Judas, nanj sêtêtj Yisu si ma sêkôc in dôtj.

⁵¹ Goc Yisu ndê ñgacsêñom danj puc in ndê bienj sa, ma pa dabuñ-siga ñamata-nga ndê ñgac akinj ndê danjalaun danj su.

⁵² Magoc Yisu sôm têtj in, “Kêtj nem bienj mbu sip ñapanj tiyham. Asa nanj kôc bienj sa tu ndic lau-nga, nanj oc sêndic in ndu ña bienj.

⁵³ Anɣyalê ɳapep bu oc tòm bu aõ wateɳ Daman ma inɳ oc kêɳ anɣela tausen ma tausen sêmeɳ ɳagahô ma sênem aõ sa.

⁵⁴ Tigeɳ aõ bu wateɳ bocdinaɳ, dec gêɳ naɳ sêto yêc muɳ su, naɳ oc ɳandô sa ɳalêɳ nde?”

⁵⁵ Goc Yisu sôm têɳ lau daêsam dinaɳ, “Bocke dec mac akôc bienɳ ti wapa siɳ-ɳga, ma asa amenɳ bu akôc aõ dôɳ gitôm ɳgac kaɳ daɳ? T ôm bêc hoɳ aõ gandôc ti kadôhôn lau gambo lôm dabuɳ ɳabatêmdô, magoc mac akôc aõ dôɳ dom.

⁵⁶ Tigeɳ gêɳ hoɳ dindéc hóc asê bu kôm yom naɳ lau propet sêto pi aõ muɳ su, naɳ ɳandô sa.” Têɳ dinaɳ Yisu ndê ɳgacsêɳomi hoɳ sêhu inɳ siɳ ma sêlhô si.

Lau bata Israel-ɳga sêmatôc Yisu

(Mak 14:53-65; Luk 22:54-55, 63-71; Jon 18:12, 13, 19-24)

⁵⁷ Lau naɳ sêndôhôn yomsu ti lau bata Israel-ɳga sêkac dau sa su ma sêhôn sêmbô dabuɳsiga ɳamata-ɳga Kayapas ndê andu. Ma lau naɳ sêkôc Yisu dôɳ, naɳ sêwê inɳ sêtêɳ andu dau si.

⁵⁸ Pita kêsêlêɳ kêkuc Yisu mbo ahê e hóc asê dabuɳsiga ɳamata-ɳga ndê andu. Goc inɳ sôc gi ndôc andu ɳatuɳlôm whiɳ lau siɳ sêyob lôm dabuɳ-ɳga ɳatô, bu lic gêɳ bocke oc hóc asê Yisu.

⁵⁹ Dabuɳsiga atu-tu ma lau bata hoɳ naɳ sêndôc †Sanedrin si toɳ, naɳ sêɳsalê yom tu sêɳgôliɳ pi Yisu-ɳga ma sêkêɳ inɳ sip lau Rom-ɳga amba bu sêndic inɳ ndu.

⁶⁰ Lau tasanɳ daêsam sêtisa ma sêsôm yom tasanɳ pi inɳ, magoc yom ɳandô bu sêɳgôliɳ pi inɳ, naɳ sêtap daɳ sa dom. Tiɳambu ɳac si lu sêtisa,

⁶¹ ma sêsôm, “Inj ngac dec sôm bu inj gitôm bu senj Anötö ndê lôm dabunj su, ma kwê sa tiyham tôm bêc tö.”

⁶² Goc dabunjsiga ñamata-nga tisa ma sôm têtj Yisu, “Am ngô yom dê sêngôlinj pi am, me? Am bu ô yom, me mba?”

⁶³ Magoc Yisu gêm dôñ. Ma dabunjsiga dau sôm, “Sôm yom ñandô yêc Anötö Tali anğô-nga! Sôm asê têtj yac bu am Mesaya, Anötö ndê Atu, me mba?”

⁶⁴ Ma Yisu ô yom ma sôm, “Tôm nanj am sôm. Tigenj aô wasôm têtj mac honj, tiñambu mac oc alic Ñamalac ndê Atu ndöc Anötö Ñaclai Ñadau ndê andô-nga, ma sip meñ ndöc dao ñahô.”

⁶⁵ Têtj ndoc dabunjsiga ñamata-nga ngô yom dinanj, nanj tac ñandê atu dec kêc dau ndê ñakwê kic ma sôm, “Inj ndê yom pi dau dê sac sambuc. Mac honj anğô su. Yac dapônda yom danj tu tanğôlinj pi inj-nga dom.

⁶⁶ Mac gauc gêm sake?” Ma sêo yom ma sêsôm, “Inj mbac ndu manj.”

⁶⁷ Ma sêhê gasôp p i inj anğô andô, ma sêngulunj amba ma sêpêñ inj. Ma lau ñatô sêtap inj,

⁶⁸ ma sêsôm, “Am Mesaya, a? Am bu propet, dec sôm asê bu asa tap am?”

Pita sêc Yisu ahuc

(Mak 14:66-72; Luk 22:55-62; Jon 18:15-18, 25-27)

⁶⁹ Têtj têtj dinanj Pita ndöc andu dau ñamakê, ma awhê akinj danj têtj inj gi, ma sôm, “Am ngac nanj kêkuc Yisu Galili-nga whinj.”

⁷⁰ Magoc inj pa dau yêc ñac honj anğô-nga ma sôm, “Mba! Aô kayalê am nem yom ñahu dom.”

⁷¹ Goc in sa gi kalhac gatam. Ma bawhê dan gêlic in ma sôm têj lau, “In ngac dê, in ngac dan nan kékuc Yisu Nasaret-nga.”

⁷² Ma Pita pa dau tiyham ma sôm yom nanga, “Yom nandô! Aö kayalê in dom!”

⁷³ Nasawa sauñ ma lau nan sêlhac dinan, sêtên Pita si ma sêsôm, “Lau nan sêñkuc in, nan si dan am! Yomandô! Am sôm yom na awha nan gi tap lau Galili-nga dinan si sa.”

⁷⁴ Goc in sôm, “Mba! A ö bu wasôm yom tasan, nan Anötö ndic aö. Aö kayalê in dom andô!” Ma ngahô dalec tan.

⁷⁵ Dec Pita gauc gêm Yisu ndê yom bocdec, “Am oc sêc aö ahuc tidim tö, goc dalec oc tan.” Goc in kölhö sa awê gi, ma tan dau ndu.

27

Sêwê Yisu têj Pailot gi (Mak 15:1; Luk 23:1-2; Jon 18:28-32)

¹ Têj bêbêc ganduc dabuñ-siga atu-tu ti lau bata Israel-nga hon si nalôm pitigen bu sêndic Yisu ndu.

² Goc sêsô in amba dön, ma sêwê in gi ma sêkên in sip Pailot amba. Pailot in Rom si gôliñwaga nan gêm gôliñ gamen Judia-nga.

Judas kin dau ndu

³ Têj ndoc Judas gêlic gên dinan, ma ngô bu sêsôm tidôn bu sêndic Yisu ndu, nan in nalôm nawapac bu in hoc in asê. Goc in kên mone silba 30 dinan mbu têj dabuñsiga atu-tu ti lau bata gi.

⁴ Ma in sôm, “Aö gakôm so, bu aö gahoc ngac gitên dan asê, ma oc sêkêc in ndê dac sin.” Ma nac sêo in

awha ma sêsôm, “Tu sake-nga am sôm têtj yac? Am daôm nem njawapac!”

⁵ Dec Judas kêbaliņ mone dau yêc lôm dabuņ njamakê, ma sa gi kiņ dau ndu.

⁶ Ma lau dabuņsiga dau sêsôm, “Dac hi mone dindec ahuc, ma yac bu dakêņ sip apa da-nga yêc lôm dabuņ, dec oc daso yomsu.”

⁷ Goc sêsôm yom tidôņ bu sêkôc mone dau ma sênemlhi ngac pec lôņ-nga ndê nom dan, ma sêņyaliņ nom dau sa ti lau apa si ôm sêhô-nga.

⁸ Tu dinaņ-nga lau têtj dindec-nga sêsam gamen dau bu ‘Nom ti Dac.’

⁹ Bocdinaņ yom naņ propet Jeremaya sôm, naņ dec njandô sa. Sêto yom dau yêc bocdec bu:

Lau Israel-nga sêkôc mone silba 30 naņ sêņyaliņ sa ti iņ ndê njaôli, naņ sa,

¹⁰ ma semlhi ngac pec lôņ-nga ndê nom, tôm Pômdau kêņ yatu aô. *[Sek 11:12-13]*

Pailot kêsu Yisu

(Mak 15:2-15; Luk 23:2-3, 18-25; Jon 18:29-19:16)

¹¹ Sêkêņ Yisu kalhac gôliņwaga Pailot aņgô-nga, ma iņ ndac Yisu, “Am lau Israel si Kiņ, a?” Ma Yisu ô yom ma sôm, “Tôm naņ am daôm sôm.”

¹² Têtj dinaņ dabuņsiga atu-tu ma lau bata Israel-nga sêņgôliņ yom pi iņ, magoc iņ ô nac si yom dom.

¹³ Goc Pailot ndac iņ, “Am ngô yom naņ sêņgôliņ pi am, me mba?”

¹⁴ Magoc Yisu ô yom naņ sêņgôliņ pi iņ, naņ dan dom. Ma tu dinaņ-nga Pailot hêdaê njandô.

¹⁵ Tôm yala hoņ, têtj ndoc lau Israel sêndê Mwasin Pasowa-nga, naņ Pailot kêkuc lêtj dan

bocdec bu. Lau Israel-nga oc sêndac ngac gapocwalô-nga dan, dec inç oc êngapwêc inç su têtj nac.

¹⁶ Têtj ndoc dinanç ngac danç ndöc gapocwalô. Inç ndê ñaê Barabas, ma lau honç sênçyalê bu inç ngac sac sambuc.

¹⁷ Goc Pailot ndac lau daêsam dinanç bu, “Mac atac whinç bu wahu asa sinç têtj mac? Barabas, me Yisu nanç sêsam bu Kilisi?”

¹⁸ Pailot kêyalê bu lau dabunçsiga dau sem lêmunç Yisu ñambwa, ma tu dinanç-nga dec sêkêtj Yisu têtj inç. Bocdinanç inç gauc gêm bu êngapwêc Yisu su.

¹⁹ Ma gêtj danç tiyham. Têtj n doc Pailot ndöc inç ndê pônç êmatôc yom-nga, nanç inç ndê awê kêtj yom têtj inç bocdec bu, “Kôm gêtj danç têtj ngac gitêtj dinanç dom, bu kwahic dec aö gayêc mbê pi inç, nanç kôm aneñ ñalôm ñawapac ñandô.”

²⁰ Magoc dabunçsiga atu-tu ti lau bata sêli lau ñalôm sa, ma sêndac Pailot bu hu Barabas sinç têtj nac, ma ndic Yisu ndu.

²¹ Dec Pailot ndac nac tiyham, “Mac atac whinç bu wahu ngac lu dec si asa sinç têtj mac?” Ma sêsôm, “Barabas!”

²² Goc inç ndac, “Bocdinanç aö wakôm sake têtj Yisu nanç sêsam bu Kilisi?” Ma nac honç sêsôm bu, “Ndic inç pi a gicso dau ndi.”

²³ Magoc Pailot ndac, “Tu sake-nga? Inç kôm giso bocke?” Tigenç nac sêmbwêc atu, “Ndic inç pi a gicso dau!”

²⁴ Pailot kêyalê bu nac oc sêsôc inç ndê yom ñapu dom, ma nac sêli dau sa ñandô. Bocdinanç inç kôc bu, ma kêgwasinç amba yêc nac honç ançgô-nga, ma sôm, “Gêtj dec sip mac amam. Aö wawêkainç ngac dindec ndê dac ñagêyô wawhinç mac dom.”

²⁵ Ma lau honj sêsôm, “Inj ndê dac ñagêyô menj pi yac ti yac mba balêkoc.”

²⁶ Goc Pailot kêgapwêc Barabas su têtj ñac, ma kêj Yisu têtj inj ndê lau sinj-nga bu sêhi inj ñamlic ñandê, ma sêndic inj ndu pi a gicso dau.

*Lau sinj-nga sêsu Yisu susu
(Mak 15:16-20; Jon 19:2-3)*

²⁷ Pailot ndê lau sinj-nga sêwê Yisu sêsa Pailot ndê andu ña-malac lôm si, goc sêta lau sinj-nga honj sêkac sa sêmenj, ma sêngihi inj ahuc.

²⁸ Sêkôc inj ndê ñakwê baliñ su, ma sêkêj inj sôc ñakwê kokoc baliñ tôm kinj sêsôc.

²⁹ Ma sêwhê wac kêma ma sêkêj inj uñ gitôm sunsunj. Ma sêkêj a danj inj gêm kôm yêc amba andô-nga gitôm kinj si tôc. Goc sêpônj haduc têtj inj, ma sêsu inj susu ma sêsôm, “Ei! Datoc lau Israel si kinj dindec sa manj!”

³⁰ Sêhê gasôp pi inj, ma sêkôc a dau su yêc inj, ma sic inj pi ñagôlônj tidim daêsam.

³¹ Sêsu inj susu pacndê, goc sêkac ñakwê dinanj su, ma sêkêj inj sôc dau ndê ñakwê sa tiyham. Goc sêwê inj sêsa malac Jerusalem ñamakê si, bu sêndic inj ndu pi a gicso dau.

*Sic Yisu pi a gicso dau
(Mak 15:21-32; Luk 23:26-43; Jon 19:17-27)*

³² Têtj ndoc sêwê Yisu sêsa si, nanj sêtap ñgac apa danj sa, nanj menj akêj malac Sairin. Inj ndê ñaê Saimon. Ma sêkac inj bu êmbalanj Yisu ndê a gicso dau.

³³ Ma ñac si e sêhêc asê gamenj nanj sêsam bu Golgota. (Ñaê dau danem kwi bu ‘Gamenj Ñakêcyha-nga.’)

34 Lau siŋ-ŋga sêkêŋ bu ŋamakic sip laclhu dan whiŋ wain, ma sêkêŋ têtŋ Yisu nôŋ. In kêsahê ma tec.

35 Goc ŋac sic in pi a gicso dau. Ma tiŋambu sêwhê in ndê ŋakwê kôc, ma sêpuc gapoc bu sêlic asa oc kôc ŋakwê bocke.

36 Pacndê su, goc sêndöc sic ma tatiŋ in.

37 Ma yom naŋ lau bata Israel-ŋga sêŋgôliŋ pi in, naŋ sêto ma sêkêŋ kalhac a gicso dau ŋahô. Yom dau sôm bu, “Ŋgac dindec in Yisu, lau Israel-ŋga si Kiŋ.”

38 Têtŋ bêc dinaŋ ŋac sic ŋac kaŋ lu sêpi a gicso dau sêwhiŋ Yisu, dan kêgalêŋ Yisu ndê andô-ŋga, ma dan kêgalêŋ gasê-ŋga.

39 Lau naŋ sêŋsêlêŋ si sêmeŋ sêndahiŋ ŋasu ma sêtaŋ bôlê Yisu.

40 Ma sêsôm, “Am ŋac naŋ sôm bu seŋ lôm dabuŋ su, ma kwê sa tiyham tôm bêc tö. Am bu Anötö ndê Atu, naŋ goc nem daôm si ma sip mweŋ!”

41 Ma ŋalêŋ tigeŋ dinaŋ dabuŋsiga atu-tu ti lau naŋ sêndôhônŋ yomsu ma lau bata seŋgec in.

42 Ma sêsôm têtŋ dau, “In gêm lau ŋatô sa, magoc gitôm dom bu nem dau sa! In lau Israel-ŋga si Kiŋ, a? In bu sip meŋ akêŋ a gicso dau meŋ, dec yac oc dakêŋ whiŋ in.

43 In kêŋ whiŋ Anötö ma sam dau bu Anötö ndê Atu. Anötö bu tac whiŋ in, dec oc nem in si.”

44 Ma ŋac kaŋ lu naŋ sic inlu sêpi a gicso, naŋ sêsôm yom kaiŋ tigeŋ dinaŋ pi Yisu.

*Yisu mbac ndu
(Mak 15:33-41; Luk 23:44-49; Jon 19:28-30)*

45 Têñ ac kac lhu, ñasec atu gêm gameñ sambuc ahuc e acgatu gitôm 3 kilok telha-nga.

46 Ma têtñ 3 kilok Yisu mbwêc awha atu, “Eloi, Eloi, lama sabaktani?” (Yom dau danem kwi bu ‘Aneñ Anötö, aneñ Anötö, tu sake-nga am hu aö siñ?’)

47 Lau nañ sêlhac sêmpin, nañ sêngô in ñapep dom ma sêsôm, “In ta Elaija.”

48 Ma ñgac dañ kêtî gi ma kêñ sôwam dañ sip wain ñamakic, goc sô dôñ pi a baliñ dañ, ma puc pi Yisu whasuñ bu in nôm.

49 Ma lau ñatô sêsôm, “Hu in siñ ma dalic. Elaija oc meñ nem in sa, me mba?”

50 Têtñ dinañ Yisu mbwêc awha atu tiyham, ma mbac ndu.

51 Têtñ ndoc dinañ po baliñ nañ kêgalêñ lôm dabuñ ñalôm, nañ dau kic gi lu, kalhac ñahô-nga e gi têtñ ñapu-nga. Ma tiyhô gêm ma hoc atu-tu daêsam popoc.

52 Ma sêhô sêhóc kôc, ma lau dabuñ daêsam nañ sêmbac ndu su, nañ sêtisa sêmbo tali tiyham.

53 Ñac sêsa akêñ sêhô sêmeñ, ma tiñambu têtñ ndoc Yisu tisa su, goc sêsôc malac dabuñ Jerusalem si, ma sêhoc dau asê têtñ lau daêsam sêlic.

54 Têtñ ndoc ñgac bata siñ-nga ti in ndê lau nañ sêyob Yisu sêmbo, nañ sêlic tiyhô ti gêtñ hon dinañ, dec sêtôc dau atu, ma sêsôm, “Yomandô! Ñgac dec in Anötö Atu!”

55 Ma lauwhê daêsam sêlhac ahê ma sêlic gêtñ hon dinañ. Ñac lauwhê nañ sêñkuc Yisu akêñ gameñ Galili-nga sêmeñ, ma sem akiñ in.

56 Maria Magadala, ti Jems lu Joses dinda Maria, ma Sebedi nawhê (Jon lu Jems dinda) sêmbo

sêwhiñ lauwhê dinañ.

*Josep kêñ Yisu ndê ñamlañ yêc hoc ñasuj
(Mak 15:42-47; Luk 23:50-56; Jon 19:38-42)*

⁵⁷ Lau nañ sêñkuc Yisu, nañ si dañ in ñgac ti lêlôm nañ ndê ñaê Josep, ma in meñ akêñ malac Arimatiya. Têñ telha dinañ,

⁵⁸ in têñ Pailot gi, ma ndac Yisu ndê ñamlañ. Pailot gôlôc ma kêñ yom têñ in ndê lau siñ-nga bu sêhu Yisu ndê ñamlañ siñ têñ Josep.

⁵⁹ Dec Josep sa gi, kôc Yisu ndê ñamlañ ma kêpan si ña po ñawasi dañ.

⁶⁰ Ma in kôc sa gi ma kêñ yêc in dau ndê sêhò, nañ sêlêñ gwanañ su yêc hoc ñalôm. Ma Josep kêpi hoc atu dañ gi ndöc sê awha ahuc, goc kölhö gi.

⁶¹ Têñ ndoc dinañ Maria Magadala lu awê dañ ñaê Maria, sêndöc sêhò ñamakê ma sêlic.

Lau siñ-nga sêyob sêhò

⁶² Sic Yisu pi a gicso dau têñ bêc nañ lau Is-rael sêmasañ dau tu Sabat-nga, ma têñ ñagalañsê dabuñsiga atu-tu ti lau Palêsai sêtêñ Pailot si.

⁶³ Ma sêsôm, “Ñgac atu. Yac gauc gêm yom dañ nañ ñgac tasan dau sôm têñ ndoc in mbo tali. In sôm bu mbac ndu ma tiñambu bêc tö niñga in oc tisa tiyham.

⁶⁴ Bocdinañ ndic atu lau bu sêyob sêhò e bêc tö niñga su. Mboe in ndê ñgacsêñomi oc sêmeñ ma sênem kañ in ndê ñamlañ, ma sêsôm têñ lau bu in tisa su. In kêsau lau ma sôm bu in Mesaya dau, magoc ñac bu sêkôm tasan dau, oc hóc gêlêc tasan nañ in kôm ñamata-nga, nañ su.”

⁶⁵ Goc Pailot sôm têtj ñac, “Akôc lau sinj-nga sa andi, ma akêtj ñac sêyob sêhô ñannga.”

⁶⁶ Goc sêsa si ma sêsap hoc nanj ti gatam sêhô-nga, nanj dôñ ñannga ña a ñakwi bu lau danj sêkac sa dom. Ma sêkêtj lau sinj-nga sêyob.

28

Yisu tisa

(Mak 16:1-13; Luk 24:1-12)

¹ Bêc Sabat-nga meñ gi su, ma têtj wake ñabêc ñamata-nga, Maria Magadala lu awhê danj ñaê Maria sêti têtj bêbêc ganduc ma sêsa si bu sêlic sêhô dau.

² Têtj ndoc dinanj tiyhô gêm atu, ma Pômdau ndê anjela danj sip akêtj undambê meñ, ma kêpi hoc nanj ndöc sê awha ahuc, nanj su, goc pi gi ndöc ñahô.

³ Inj ndê ñawasi pô gameñ gitôm sickac, ma inj ndê ñakwê sêp sambuc.

⁴ Têtj ndoc lau sinj-nga sêlic inj, nanj sêtöc dau atu ma sêntitec. Ma ñac tagôlô ma sêhu dau sêyêc gitôm lau batê.

⁵ Ma anjela dau sôm têtj awhê lu, “Atöc daôm dom. Aö kayalê bu amlu anjalê Yisu nanj sic inj ndu pi a gicso dau.

⁶ Inj mbo lec dom. Inj tisa su tôm inj sôm gwananj su. Amenj alic gameñ nanj sêkêtj inj yêc nanj.

⁷ Goc ambu andi ñagahô, ma asôm têtj inj ndê ñgacsêñomi bu inj tisa akêtj lau batê-nga su. Ma inj oc muñ mac ndi mbo gameñ Galili-nga. Yêc dindê mac oc alic inj. Kwahic dec aö gahoc yom dindêc asê têtj amlu, ma amlu anjô su.”

⁸ Têtj ndoc dinanj awhê lu dau sêlhö si bu sêkêtj ñawaê dau têtj Yisu ndê ñgacsêñomi. Injlu si ti atac

ņayham atu, magoc ņalôm lu-lu ma sêtöc dau. Sênti sêmbo seņ,

⁹ ma ņagahô Yisu hoc dau asê têņ inļu ma hê mwalêc inļu. Goc inļu sêtigasuc in ma sêhu dau sêyêc nom. Ma sêkôc in sip gahi ma sêmpin in.

¹⁰ Goc Yisu sôm têņ inļu, “Atöc daôm dom. Andi ma asôm têņ aneņ asidôwai hoņ bu sêtêņ Galili sêndi, ma ņac oc sêlic aô yêc dindê.”

Lau siņ-ņga sêsôm Yisu tisa ņawaê

¹¹ Têņ ndoc naņ awhê lu dinan sêmbo seņ, naņ lau siņ-ņga ņatô naņ sêyob sêhô dau, naņ sêmbu sêtêņ Jerusalem si. Ma sêkêņ ņawaê têņ dabuņsiga atu-tu, pi gêņ hoņ naņ sêlic.

¹² Goc lau dabuņsiga dau sêkac lau bata sa, ma sêmasaņ yom pi gêņ dau. Ȇac semlhi lau siņ-ņga Ȇa mone atu,

¹³ ma sêsôm têņ Ȇac, “Mac asôm têņ lau bu, ‘Têņ ôbwêc yac ayêc bêc ayêc. Ma in ndê Ȇgacsêņomi sêmeņ, ma sem kaņ in ndê Ȇamlan.’

¹⁴ Ma Pailot bu Ȇgô bu mac ayêc bêc, dec yac oc amasaņ yom awhin in, bu mac atap matôc sa dom.”

¹⁵ Bocdinaņ lau siņ-ņga sêkôc mone dau sa, ma sêkôm tôm lau bata Israel-ņga sêsôm têņ Ȇac. Ma yom dau tiapa yêc lau Israel-ņga Ȇalôm, ma lau Ȇatô sêsôm e meņ têņ kwahic dec.

Yisu hoc dau asê têņ Ȇgacsêņomi

¹⁶ Têņ ndoc dinaņ Ȇgacsêņomi 11 sêsa sêtêņ lôc naņ yêc gameņ Galili-ņga si, gitôm Yisu sôm têņ Ȇac muņ su.

¹⁷ Têņ ndoc sêlic in, naņ sêpôņ haduc ma sêmpin in. Magoc Ȇac si lau Ȇatô atac lu-lu.

¹⁸ Goc Yisu tigasuc ñac ma sôm, “Anötö kêñ ñaclai têtñ aö pi gêtñ undambê ti nom-ñga honñ.

¹⁹ Bocdinañ atêtñ gameñ honñ andi ma andôhônñ lau e sêñyalê aö ma sêkêtñ whiñ aö. Anku ñac anem Damba, Atu, ma Nalau Dabuñ añgô.

²⁰ Ma andôhônñ ñac bu danğa wambu yom honñ nañ aö gac atu mac. Ma añyalê pi ñandô bu aö oc wambo wawhiñ mac ñapañ, e nom ñatêm pacndê.”

Anötö ndê Yom Lêñsê^m Wakuc
The New Testament in the Bukawa language of Papua
New Guinea
Nupela Testamen long tokples Bukawa long Niugini

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 18 Apr 2025 from source files dated 31 Aug 2023

545e5ca3-1e95-59e4-8380-93951e023cf7